

**NATIONAL ASSEMBLY OF  
SEYCHELLES**

*Wednesday 19<sup>th</sup> July, 2023*

*The Assembly met at 0902am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou Manm Onorab. Bonzour tou bann zofisyé Lasanble ki pe asiste nou; bonzour bann viziter dan Galeri ki sorti dan Lekol Segonder Anse Royale, e mon swet zot labyenveni dan Lasanble. E byensir byenveni manm piblik ki pe swiv nou. Mon asire ki mon reflekte byenveni *MNA* Anse Royale e osi tou Manm Lasanble pour bann viziter ki dan Galeri.

Alor nou a pas direkteman lo nou Biznes pou ozordi e sa se Mosyon. E premye Mosyon i dan non onorab Waven William. E Onorab mon ava envit ou pou met ou Mosyon premye.

**HON WAVEN WILLIAM**

Mersi Mr Speaker. Bonzour tou bann envite ki dan Galeri sorti Lekol Anse Royale. Bonzour tou

dimoun ki a lekout. Mr Speaker, avan ki mon prezan mon Mosyon, mon ti a kontan pas mon senser kondoleans pou lafanmir Clarisse Lanmizer, prezizaman Souvenir, ki'n perdi enn zot pros – frer, zanmi – en msye byen koni Jean-Claude Clarisse ki'n kit nou e nou pou mazin li Mr Speaker. E mon asire Mr Speaker ki ou osi ou konn sa msye.

Mr Speaker, avek sa 2 mo, i en plezir pou mwan prezant ek Lasanble Mosyon ki lir konm swivan;- Mr Speaker, me avek mon lir mon Mosyon, mon ti a kontan ganny ou gidans; – mon anvi azout 2 pti mo ki pa pou sanz merit ouswa lesansyel dan mon Mosyon; sa se apre letid “pli profon” – sa 2 mon ki mon a kontan azoute.

**MR SPEAKER**

Mon pa ganny letan konsilte *Standing Orders*, me selman lo mon Lotorite mon a permet ou fer sa.

**HON WAVEN WILLIAM**

Mersi Mr Speaker pou ou konsiderasyon

An rekonesan ki Sesel i en pti pei, avek en marse vreman limite, Lasanble i demann Gouvernman pou fer en letid pli profon, pli aprofondi, ki enplik

tou sektor kle ekonomik, avek bi pou revwar Polisi e stratezi ki a permet Sektor Prive reste soutenab e kree plis larises e lanplwa.

### **MR SPEAKER**

Onorab nou a permet Mosyon ganny segonde avan ou prosede? Onorab John Hoareau.

### **HON JOHN HOAREAU**

Bonzour Mr Speaker. Bonzour tou dimoun a lekout. Mon oule segonn sa Mosyon ki'n anmennen par Onorab William. Mersi.

### **MR SPEAKER**

Mersi. Mosyon in ganny segonde, Onorab ou kapab prosede avek prezantasyon ou Mosyon.

### **HON WAVEN WILLIAM**

Mr Speaker, mon pa pou rat sa sans ankor enn fwa pou remersye nou Bondye Tou Pwisan, e dir tou louanz ek laglwar i pou Li Tousel. Mon remersi li ki mon vivan an bann sante, ranpli ek lenerzi pou servi sa pep.

Mr Speaker, en pwen klarifikasyon pou sitye piblik ki pe ekoute e Manm Lasanble, lo kwa ki mon pe refer avek letan mon pe servi sa mo "akter"

ouswa "sektor kle ekonomik," se bann lantrepriz mwayen, mikro e gro koman en fourniser ouswa donn servis, prodiksyon ouswa dan aktivite valer azoute, mon pe koz pou bann lasosyasyon osi tel parey *omnibus*, *taxi driver*, peser, lotelri parmi lezot.

Mr Speaker, ler Mosyon pe refer ek Sesel koman sa pti pei, ouswa sa gran letan losean, mon osi anvi azout sa laspe vilnerabilite asosye ek son natir.

La mon pe refer ek pti popilasyon, limitasyon dan sirfas later ki kapab ganny devlope, ouswa konserve pou sektor parey *zone* rezidansyel, tourizm, endistriyel, lagrikiltir e *zone* proteze.

Lezot *challenge* tel parey lokasyon an term zistans, ek bann gran marse pou enporte, fre transportasyon an term bato, avyon, to *tax* i ganny enpoze pou sekirite loperasyon fourniser.

Lefe lager zeopolitik, pandemik mondyal i kapab deklare, potansyel latak teroris, ouswa anvaisman imigran ek sityasyon lanvironnman enstab lo Kontinan Lafrik e lezot kontinan; zot potansyel lenpak direk ou endirek lo aktivite sosyoekonomik nou ti pei Sesel.

Mr Speaker, sa Mosyon i vin dan en bon moman, lefe ki Gouvernman fek lans lo en platform pou lenvestisman dan bann sekter ki annan potansyel. E Gouvernman pe osi koz lo en plan devlopman stratezik nasyonal, Mr Speaker, ozordi iniverselman *the buzz word* se “devlopman soutenab.”

Mr Speaker, “devlopman soutenab.” E dan lankadremman devlopman ekonomik, nou rekonnèt rol Gouvernman koman fasilitater. E Sekter Prive koman moter lekonomi 2 akter kle e prensipal dan sa lankadremman lantreprenarya.

Koman en Manm Lasanble, koman reprezantan Lepep e portvwa sitwayen, i mon devwar e nou devwar koman lenstitisyon parlamanter, sivre de pros plan devlopman nasyonal e bann stratezi ki pe kree kondisyon e loportinite pou devlopman dan Sesel.

Pa zis develop an fou, me pou touzour swiv en model devlopman ki soutenab Mr Speaker. Mr Speaker, ek lasosyasyon nou lenstitisyon ek bann plizyer groupman Parlman Sou-Rezyon Komisyon Losean Endyen Rezyonal *SADC, Pan African Parliament*; Lasosyasyon Parlamanter *Commonwealth*, Groupman Parlman Lafrik; Lafrik ek

Pasifik e Linyon Eropeen e finalman Linyon Enter-Parlmanter ki ankouraz e angaz Manm Parlman Mondyal ki asire ki koman reprezantan Lepep, nou Lenstitisyon Parlamanter i asire ki devlopman nasyonal i reste enn nou lobligasyon pou sirvey depans bidzeter, pou asire ki lobzektif plan i ganny zwenn dan lentere nasyonal.

Nou ganny demande pou asire ki prensip bonn governans, rankont e latransparans dan lentere nasyonal, zot ganny sofgarde. Ki fason sa pe ganny fer Mr Speaker, se atraver kestyon, Mosyon, sesyon piblik – *Hearing* e vizit ki bann diferan komite Lasanble i angaz zot ladan.

Mr Speaker, bann diferan lorganizasyon enternasyonal tel ki parey Fon Monneter Enternasyonal (*IMF*), Lorganizasyon pou Devlopman Ekonomik – *OECD*, Linyon Eropeen Labank e Mondyal, zot met bann kondisyon e kriter ki pei manm asosye ek zot, bezwen sivre, pou kalifye pou bann sipor ki zot gannyen. Parmi sa bann kriter pou kalifye se ki pei manm i bezwen asosye osi ek Lorganizasyon Komers Mondyal.

Mr Speaker, *Chatham House*, ki ganny rekonnèt koman en lenstitisyon Royal Zafer Enternasyonal baze an Lonn *UK*, son misyon se ki pou ed Gouvernman e sosyete sivil parmi lezot akter relevan pou batir en monn soutenab, an sekirite e prosper.

I lorizin *Chatham House Rule*. Sa lenstitisyon i angaze dan bokou aktivite e letid e resers dan diferan domenn, tel parey size ki Mosyon pe refer avek ozordi Mr Speaker. Ki analiz bann size mazer, enternasyonal tel parey lekonomi, sanzman klima, imigran eksetera, zot in pibliy plizyer rapor lo size aktivite ekonomik e komers mondyal lo *the pros and cons* Mr Speaker.

Zot enfliyans e organiz bann diskisyon lo lenerzi e lanvironnman e Polisi devlopman, pou gid bann ki pran desizyon tel parey Gouvernman, sosyete sivil e Sekter Prive, pou pran meyer desizyon Mr Speaker, fonde lo larealite pou en devlopman nasyonal, rezyonal e enternasyonal progresif e soutenab.

Bann resers e diskisyon i kontinyel dan laliny Mosyon ki pe demann fer en letid aprofondi. Mosyon pe demann fer en letid, ki enplik

partisipasyon tou akter kle, devlopman ekonomik ver en revizyon Polisi e stratezi; fer sa letid pou asire ki Polisi nasyonal e stratezi, i reste azour ek larealite dinamiz ek devlopman mondyal, menm si i modifye dan nou model "*home grown Seychelles*" Mr Speaker.

Sa letid ava diriz Gouvernman e tou akter kler ekonomik pei, pou konpran kwa ki merit ganny fer an term azisteman e sanzman dan Polisi e stratezi pou reste soutenab dan lanvironnman sa vilaz global, tirbilan de zour an zour Mr Speaker, parey nou vwar lo zournal ouswa atraver bann diferan platform medya.

Mr Speaker, nou annan sitan pou remersi Bondye, pou son gidans e lagras pou nou pri pei, an fas ek tou sa bann kriz global. En Gouvernman proaktif zanmen letid e evalyasyon pa ganny fer. O kontrè i sa legzersis ki pou donn li otan endikater enportan lo kote in arive ek son vizyon v3er lobzektif nasyonal konpreansif.

Mr Speaker, sa letid parmi lezot letid, pou donn Gouvernman e lezot akter *real time* lenformasyon an plis, pou pran bann desizyon pli byen enformen e kalkile pou kontinyen egziste an loperasyon

pou kre larises, permet Gouvernman anmas plis *tax*, gard travayer dan lanplwa, kree nouvo lanplwa e menm agrandi e diversifye aktivite ekonomik Mr Speaker.

Mr Speaker, ler Gouvernman ek tou akter kle i lo menm paz lo sa size devlopman ekonomik Sesel, a permet presizyon dan aksyon pou etabli touzour sa meyer lanvironnman e kondisyon pou fer biznes dan pei.

Gouvernman dan rol fasilitater ek Sekter Prive koman moter lekonomi a adopte meyer pratik e kondisyon ki rezilyans pou ranforsi lekonomi Sesel; pou fer fas ek defi ek lensertitid ek defi konteks mondyal aktyel.

Mr Speaker, Sesel koman sa gran pei losean, i bezwen ozordi menm met zefor lo plis diversifikasyon dan aktivite ekonomik Sesel, letan nou koz lo sa size soutenabilite. Mon rekonnèt zefor ki pe ganny fer lo nivo Gouvernman, la mon felisit tou bann diferan lazans ek Sekter Prive ki pe donn zot tou menm.

Mon obzerv nouvo lenerzi ver plis transformasyon aktivite nimerik, mon osi apresye zefor Sekter Prive. Mon sezi lokazyon pou felisit tou endividi e tou group endividi ki pe fer biznes

Sesel. Sepandan mon konstata, ki i ankor annan travay pou fer pou vizavi *the ease of doing business* Sesel Mr Speaker.

Sa en fraz ki plizyer lannen nou'n tonm nonmen Mr Speaker. E mon realiz ki i en gro *challenge* pou bann pti pei parey nou. Mr Speaker, kestyon ki touzour reste relevan dan lespri endividi pe swiv de pros devlopman dan sa vilaz global, se eski Gouvernman koman fasilitater pe ankouraz plis partisipasyon e pe promot konsiltasyon adekwat?

Eski lankadremman legal i adekwat e pe reponn a bezwen a realite devlopman ozordi?

Eski Polisi e stratezi an plas, i konvenab pou atir nouvo biznes, pou ankouraz sa ki deza dan biznes, motiv nouvo lentere pou agrandi baz ekonomik ek diversifikasyon?

Eski bann labank ki donn *loan* zot ase azour ek realite pou siport e finans bann lentere ki annan potansyel?

Eski Gouvernman i annan ase lenformasyon lo biznes ki fermen e konpran akoz pou ofer pli meyer konsey tek ki; formasyon *training*, investir dan aktivite ki bezwen e pou reste soutenab?

Mr Speaker, se atraver bann letid pli aprofondi, dialog e konsiltasyon kontinyel, ki pou

permet tou akter kle konpran e reste azour e relevan dan konteks etabli e mentenir sa eleman kapasite lankadremman soutenablilite.

Mr Speaker, mon asire ki plizyer Manm zot annan en levantay leksperyans zot distrik e nasyonalman vizavi sa Mosyon pou koz lo la. Dan sa lespri leve al travay e leve debourye, mon pe demande ki Gouvernman koman fasilitater i konsider desantraliz servis e prezans bann diferan lazans dan distrik pou zwenn ek lotorite Distrik pou ki zabitan ki enterese i a kapab inisyé zot demars pou angaz dan en aktivite.

Mr Speaker, aktivite mikro ekonomik, sa *counseling* i pri mondyal dan lantouraz lotorite sa distrik ki konn bezwen kominote e son dimoun. Mr Speaker, i en realite ki partou dan bann pei ki pe devlope, se lakantite bann pti antrepriz, an operasyon parmi bann gro lantrepriz ki fasilite kanmarad ki kontribye signifikan ver lekonomi pei.

Vi ki ozordi dan bann *housing estate*, pe ganny etabli, mon pe demann Gouvernman ki zot balans zot desizyon ki zot pa kre plis lenzistis, letan i annan bann demann pou fer bann pti aktivite mikro

antrepriz dan bann *housing estate*.

Mon dir lenzistis aköz bokou dimoun pa ganny sa sans pou ganny en bout later, ouswa en lespas lwe dan *zone* endistriyel, ouswa dan en batiman ki Gouvernman pe lwe lespas ki ase bonmarse. Rezon ki enn, zot napa mwayen e kapasite pou fer parey serten mwan parey lezot gro biznes ki'n fini etabli Mr Speaker.

Alor ozordi, mon krwar ki dan *housing estate* e dan flat, serten aktivite mikro ekonomik i merit ganny evalye e konsidere. Sa a kapab ganny fer en triparti par lazans Gouvernman aspiran ki anvi fer biznes ek Lotorite Distrik. Gouvernman a evalye e met bann kondisyon ki a permet sa endividi konpran, aplike, e diminyen *burden* lo Gouvernman.

Mon'n a plizyer lenstans rekomande ki lagreman bann *housing estate* par *PMC* i ganny revwar, pou permet serten eleman ki ozordi i relevan Mr Speaker, sirtou dan lendepandans lekonomi sitwayen.

Mon profit sa lokasyon pou felisit e ankouraz lezot pou kontinyen edik nou pep lo sa size *financial literacy* Mr Speaker. I ti en mankman - en

vid ki ozordi mon santi poudir i bezwen vin pli dan en fason proaktiv, ki nou bann dimoun ki kon pran li sa laspe finansyel.

Akoz ki diferan *snacks* pa kapab ganny fer kot en lakour ek gidans lotorite konsernen Mr Speaker?

Akoz depriv bann lentera ki anvi vin formel lokal, e kre kondisyon ek aktivite enformel kot Gouvernman i perdi reveni?

Akoz kot en fanmir ki lakaz i gran, pa kapab vey enn ou de zanfandan vakans, ouswa en trwazyenm-az son vwazen ki bezwen ale aletranze ou en kourt letan Mr Speaker?

Akoz ki sa zenn ki pa dan en lanplwa formel ki anvi fer aktivite repar transpor ouswa lekipman elektronik pa kapab fer li ki reste dan en *housing estate* Mr Speaker?

Mr Speaker, plizyer aktivite apre ler travay e dan *weekend* i kapab ganny organize dan tou distrik, pou touris depans plis larzan? Viziter nou pei a trouv fason pou depans larzan an plis ki a rann lapel Minis *Tourism*. Kominote i bezwen ki lotorite konsernen i zwenn rezidan labaz, pou ansanm anmenn diversifikasyon aktivite pou bann viziter etranze.

Mon demann bann lotorite pou vini e annou koze; annou dyaloge. I annan sitwayen distrik ek lide ater la Mr Speaker. I annan zoli bann lide dan distrik ater la, Mr Speaker. Larepons i avek nou. Me zot pe toufe ek zot lide, zot pa bouze, aköz letan zot mazin pou al dan serten biro pou solisyon, zot pe mazin de fwa Mr Speaker, avek lafreyer, avek lensertitid. Zot santi zot pli konfortab e pli asire pou ganny sa sipor a nivo lokal ek dimoun ki konpran zot, me pa pou touy zot linisyativ Mr Speaker.

Mon pa pe dir ki sa bann zofisyè dan bann diferan lazans konsernen, pa pe fer zot travay; kontrè mon felisit zot parey mon'n dir ki zot pe travay dir. Mon pe demann zot pou konpran santiman dan kominote, Mr Speaker. Konpran bann santiman e bann aspiran ki bann distrik pe ankouraze Mr Speaker. Ed nou pou fer pli byen.

Lo sa baz ki mon demande ki Lotorite i travay pli pros ek distrik, pou ankouraz kreasyon bann pti lantrepriz dan kominote e kot lakour kot i posib. Mon repete "kot i posib."

Atraver sa kalite letid ki Mosyon pe demande, ava ankadre sa bann nouvo devlopman dan distrik, kot

zabitan ki anvi lans dan aktivite mikro ekonomik a ganny sa sans; tel parey mon mazin Mrs Genevieve Basset dan distrik Grand Anse Mahe, Jude Sultan, Tony Isaac, Christine parmi lezot lentere Grand Anse Mahe, Mr Speaker, ki pe espere pou bouze.

Mr Speaker, lemonn pe vin pli inserten e nou anba potansyel menas ki kapab plonz pei dan en kriz. Gouvernman koman fasiliter, i fer li son devwar pou kre kondisyon pou plis partisipasyon e eksklizivite dan aktivite ekonomik Sesel; fasilite aksyon pli vit pou larg lanmen ankor plis nou sitwayen.

Annou liber zot pou kontribye dan sa prosesis vin otosifizan; vin pli rezilyan e finalman etabli en nivo lanvironnman soustenabilite akseptab anba tenm "Sesel pou tou son zanfan."

Mr Speaker, mon soumet lespri e merit sa Mosyon ek Lasanble Nasyonal. Mon espere ki deliberasyon a mars byen e ki nou a santi venker lo sa Mosyon, koman en Lasanble ki zwe sa rol *oversight* byen pou redinamiz ankor plis aktivite ekonomik.

Mon osi sezi sa lokasyon, pou bann zournalis ki pe sivre travay Lasanble, donn zot

versyon nou travay, fer resers e tir zot prop konklizyon pou permet zot ganny zot lavi.

An terminan mon anvi remersye e felisit Komite Plan Devlopman Grand Anse Mahe, pou zot perseverans ki dan en tre pros lavenir, nou distrik Grand Anse, Mahe avan annan en plan devlopman ekonomik pou rezidan distrik e Seselwa ki anvi investir konsidere.

Mon osi remersi Gouvernman atraver tou son lazans ki pe kordinen pou ed Sesel reste dan sa semen devlopman ekonomik soutenab. Mr Speaker, *I beg to move.* Mersi.

**(APPLAUSE)**

**MR SPEAKER**

Mersi Onorab. Mon a donn laparol segonder Mosyon, Onorab John Hoareau.

**HON JOHN HOAREAU**

Mersi Mr Speaker. Bonzour ankor enn fwa tou dimoun ki a lekout. Mr Speaker, sa Mosyon i enn ki vremen enportan, akoz Gouvernman i bezwen annan en vizyon, devlopman ekonomik ki pou deservi pei pou *short, medium e long term*. I pa zis pe zwenn en vizyon, me pli enportan i bezwen osi kre sa lespas pou biznes epanouir,



pour ki i kontinyen annan krwasans dan lekonomi.

Pou kre sa kondisyon ideal, i en responsabilite ek Gouvernman ek Sekter Prive. Biznes prive i annan sa responsabilite pou fer sa bann letid nesese e kalkil byen son risk avan ki i investir.

I bezwen konnen davans ki bann stratezi *marketing* e zesyon ki i pou servi, pou li vin profitab e pou fer ki i kapab reste an konpetitiv, oubyen i kapab fer fas avek bann evantyalite ki kapab arive ler i pe zer son biznes.

Gouvernman lo son kote, i bezwen byen planifye son Bidze o nivo son Minister ki responsab pou devlopman biznes, e met bann Polisi an plans pou permet li realiz son program devlopman.

Resours pou *short-term development program* i ganny adrese par Bidze tou le-z-an, tandis ki pou *medium term*, e *long-term strategy medium plan*, i bezwen ganny fer atraver bann bon *planning*. E souvandfwa avek bann letid ekonomik detaye, fer par bann ekonomis dan Minister Finans e Planifikasyon Ekonomik. E sa deza pe ganny fer.

Petet en dimoun i a demande, be kwa ki sa Mosyon

pe anmennen deplis ki pratik ki la deza an egzistans?

Lanfaz ki loter Mosyon pe mete, se ki Gouvernman pe enkli sekter kle dan lekonomi, i travay ansanm pou etabli bann kondisyon, pour ki biznes i kontinyen agrandi e vin soutenab, an prenan kont bann faktor globalizasyon.

I souvandfwa i bann lafors ki bann pti e mwayen biznes napa kontrol lo la. Si nou mentenir ki Sekter Prive se moter lekonomi, alor i toutafe normal, toutafe byen ki nou met Sekter Prive o sant sa demars. An fezan sa, nou kapab fer pli byen konpran problem ki sa bann pti sekter pe fer fas avek, e permet zot e ed zot pou zot kapab agrandi.

Mr Speaker, pou nenport ki biznes kre larises, i bezwen azout valer avek son prodwi. E ogmant reveni pou son *shareholder*. I bezwen annan en stratezi *marketing* ouswa gard son kliyan eksklisiv, parey an term Angle en *niche market*, oubyen ogmant lakantite kliyan e demann pou son prodwi.

Ler ou demann i ogmante, ou biznes i agrandi, e loportinite pou plis lanplwa, i ganny etabli. Me parfwa bann pti biznes i fer fas avek bann lafors ki zot pa kapab kontrole, lefe ki zot ptipti. E souvandfwa napa akse

avek bann kredi finansyel vitman, zot vwar li difisil pou zot kapab sirviv e reste rezilyan.

Mr Speaker, ordinerman, dan en lekonomi liberal, dan en monn kot konpetisyon i zis, nou war kot biznes i grandi avek letan, e ler i annan tro bokou biznes dan menm sekter, dan menm kalite biznes, serten i fermen e bann ki pli for avek pli bon *customer care*, avek pli bon *strategy marketing*, i kontinyen; vi ki lafors marse i regle lakantite biznes. En prensip ki nou apel *survival of the fittest*.

Me ozordi nou bezwen demann nou lekor, zis sa kalite model biznes, i sa kalite model koman en pti pei avek en pti lekonomi ki nou bezwen? Oubyen nou bezwen ed plis pou ankadre e donn resours pou sonny sa bann pli pti biznes e donn zot lespas pou zot kapab grandi e vin soutenab.

Souvandfwa, ler ou met dimoun o sant devlopman, e ler ou analiz frazilite e vilnerabilite en pti pei avek en pti lekonomi parey Sesel, ler ou marye lefe ki nou ptipti, e nou napa materyo brit, matyer premyer pou transformen; lefe ki nou benzwen enport laplipar materyo aletranze, nou bezwen rekonnnet ki nou bann pti biznes i bezwen serten led pou zot reste konpetitiv e soutenab.

Annou konsider sa legzanp ansanm;

En pti laferm i ki fer elevaz zannimo pou ede anmenn otosifizans lo kot alimantasyon, i en laferm organik ki 100poursan Kreol; ler son poul ek son pork in pare pou vann, i vwar li fer fas avek en konpetisyon direk avek prodwi enporte ki pli bonmarse, par lefe ki sa pri ki sa bann prodwi i sorti pe deza sibvansyon son Sekter Lagrikiltir, e son prodiksyon i enn ki deza lo en lesel gran kantite ki nou apel i ganny lavantaz bann *economies of scale*.

Sa i fer ki i annan en gran lavantaz lo pri, ki i vann an konparezon avek en prodwi ki ganny prodwi lokal e napa okenn sibvansyon.

Eski i dan nou lavantaz, pou les bann pti fermye mor oubyen nou annan en lotorite moral e en lentere pou pei pou nou entrodwi en Polisi pou kit sa kalite bizes soutenab?

Mon pa pe demann retourn sibvansyon mwan, me sa ki nou kapab fer, se eksplor bann mezir ki pou ede koup lo lenportasyon petet sa kalite prodwi ki nou pe fer lokalman, e agrandi lavan prodwi lokal.

Peter annan en Polisi lo pri labatwar, e petet fasilite pou bann fermye petet swazir pou

fer bann *parts* ki zis pou vann zot prodwi antye, zot poul antye.

Solisyon pou sorti avek fermye zot menm, si nou donn zot sa loportinite pou diskite sa bann size. Mr Speaker se sa ki Mosyon pe demann loter Mosyon pe demann Gouvernman, se met bann partner kle dan kle dan lekonomi ansanm, pou diskite e fer bann Polisi.

Mr Speaker, Polisi pou ede diversifye lekonomi e anpes annan tro bokou lanfaz lo en sel kalite biznes o osi enportan. E la par egzamp, mon pe mazin Sekter *Retailer* kot mon krwar i devret annan en *moratorium* lo sa sekter an se moman, e revize e vwar kote ki annan lespas e kote ki napa lespas pou sa bann sekter agrandi.

Souvandfwa dan distrik, ou mars apenn 30 met ou vwar en laboutik, ou vwar en lot, ou vwar en lot, me petet in ler pou nou asize, pou revwar ansanm si nou bezwen etal sa bann laboutik lo en bann landrwa kot vreman, i annan bann sou distrik ki napa. Alor en moratoryonm pou etidye sa size i enpotan.

Osi nou vwar Mr Speaker bann *practice* ki nou apel lentegrasyon orizontal, ki an term biznes i en *unfair practice*.

Parey ou vwar en sel marsan pe fer plizyer menm kalite laboutik, parey nou kapab nonmen Kannus oubyen Virmal, oubyen menm serten *brand* lotel parey *Four Seasons* ki ou vwar li isi, ou war li laba ou war li lot kote la.

E zot petet zot enport serten zot prodwi e zot kapab donn sa servis menm standar partou dan zot laboutik e zot kapab annan serten kontrol lo marse, e zot annan en serten kontrol lo *pattern - pattern* ki dimoun i aste keksoz.

Mr Speaker, an di-z-an sa, nou bezwen respekte lefe ki bann investiser, ler zot investir dan en serten biznes, zot osi annan en lentansyon pou agrandi e pour zot kapab annan *the right to own their property*.

So sa i en drwa konstitisyonnèl ki nou osi nou bezwen byen pran kont, pou ki nou pa osi *infringe* lo sa *right* sa dimoun, ki pou li antre lo bann lezot biznes.

Alor Mr Speaker, ler nou analiz sa Mosyon ki Onorab in anmennen, nou vwar ki i tous en pwen for, en pwen kle dan nou lavenir, e vizyon nou desten, ki bann keksoz ki in ganny ekrir dan nou manifesto; vedir ki si nou permet nou bann pti biznes vin pli for e grosi, nou

pou kapab grosi. Nou pou kapab osi kre larises.

Nou bezwen retir bann baryer. Nou souvandfwa koz lo *ease of doing business* me nou pa vwar ase bann Polisi ki vize fer proteksyonizm pou nou kapab balans Polisi liberalizm dan domenn pti biznes.

E la mon oule fer referans avek serten lenvestisman dan lagrikiltir, sirtou dan prodiksyon pork e volay e ki fer fas avek lenportasyon ki pli bonmarse.

Mr Speaker, mon pe dir ki avek tou senserite, akoz nou en parti ki analize e rod *middle ground* dan tou ann sityasyon sitan konpleks parey sa ki nou pe koz lo la. Nou la pou defann nou zabitan e fer nou Gouvernman mars pli byen, e pran kont e konsyans serten sityasyon ki nou pe fer fas avek.

An se moman nou kapab dir nou Gouvernman pe fer tre byen, selman kot i annan lespas pou amelyore, nou bezwen amelyore.

Mr Speaker, mon distrik i enn ki annan plis lili ou lospitalite. I distrik ki akey plis viziter sorti aletranze; i pa drol ki laplipar nou bann zabitan i travay dan sekter tourizm e la mon pledwari se ki bann lazans Gouvernman i konsilte plis ankor avek bann propriyeter

lotel, *guest house*, restoran, ekskirsyon, *diving centres* e lezot ankor avan ki i determinen ki direksyon ki nou pou ale lo sa bann size tourizm.

Egalman Minister pour Lantreprenarya, e Minister Tourizm, i bezwen kre plis konversasyon avek bann lantreprenner dan distrik. Me selman pou fer biznes tourizm vin pli soutenab e rantab; pou fer pou ki avek larive touris, nou kapab vwar plis retonbe finansyel dan nou lekonomi. Nou bezwen ed nou pei letablisman ki standar i ba, pou zot os zot standar e pou ranmas plis larzan.

Mr Speaker, letid parey *Carrying Capacity studies* i bezwen ganny fer e revize detanzaot, letan sirtou bann paramet i sanze, pou determinen ki kantite lili i kapab mete dan nou Sekter Tourizm, dan nou distrik.

Nou pa pou le war ki lakantite viziter i kre en lenpak negativ lo litilite piblik, parey delo, *sewage*, elektrik, Lespas pou nou prop sitwayen osi kapab enjoy nou zoli lans, sankwa nou pou an konfli – nou bann dimoun pou an konfli avek annan etranze. E sa i pou anmenn en santiman negativ. Nou pa oule ki sa i arive.

Mr Speaker, pou terminen, an di-z-an ki nou teritwar teres i ozordi en resours limite, menm si nou lanmer i *vast*, nou marse i enn ki ptipti, menm ki nou en pei ki annan bann bezwen parey nenport ki gro pei devlope.

Alor nou klima biznes e devlopman i bezwen ankadre li ankor avek plis Polisi pou reflekte sa vilnerabilite.

Fodre ki nou reste touzour soutenab e kontinyen kre plis larises pou nou pei.

An konklizyon, mon oule fer remarke ek nou pep e fer nou mazin nou preanbil nou Konstitisyon, i dir nou ki nou bezwen annan gratitid pour Senyer ki'n donn nou enn bann pli zoli pei o monn pou viv. E nou bezwen dan tou sa ki nou fer mazin nou frazilite e labote inik nou pei.

Koman en Lasanble responsab, i nou devwar pou promot devlopman dan en fason soutenab, an menm tan met lanfaz lo frazilite e vilnerabilite Sesel; ki swa ekonomik ou lanvironnmanal, pour ki nou zanfan e nou pti zanfan, i rezouir dan en pei sen e prospere. Mersi.

**(APPLAUSE)**

### **MR SPEAKER**

Mersi Onorab. Mon a donn laparol Philip Arissol.

### **HON PHILIP ARISSOL**

Mersi Mr Speaker. Bonzour Mr Speaker. Bonzour bann zanfan anler dan Graden e tou bann koleg Onorab e tou bann dimoun ki pe swiv nou.

Mr Speaker, lide pou fer en letid pli aprofondi ki enplik tou sekter kle dan lekonomi Sesel, avek bi pour revwar Polisi e stratezi ki permet Sekter Prive reste soutenab e kre plis larises e lanplwa, ti en bon lide. Sa i kapab ed Gouvernman Sesel konpran pli byen ki sa sekter i enportan, e ki bann mezir ki ganny pran avek bi pou ankouraz devlopman ekonomik dan pei.

Sa Lasanble pe demann Gouvernman, pou fer en letid; sa i kapab enkli konsiltasyon avek diferans sekter lekonomi, tel ki, lendistri, tourizm, lagrikiltir e lezot servis.

Letid i kapab evalye sityasyon e defi ki egziste dan sak sekter, tel ki lenformasyon lo kapasite, prodiksyon, kapasite inovasyon e kapasite pou kre lanplwa. Sa i kapab analiz Polisi e mezir ki deza an plas e idantifye posibilite pou amelyore.

Mr Speaker, dan en sans, sa letid i kapab fourni rekomandasyon ki kapab ed Sekter Prive dan Sesel. Sa i kapab enkli kre klima biznes favorab, kot Gouvernman li i kapab evalye klima bann biznes dan pei, e idantifye mezir ki i kapab pran pou amelyore; abolisyon ouswa redwir baryer administrativ; fasilite prosedir pou kre biznes e amelyor akse avek finansman; lenvestisman dan formasyon e kapasite resours imen.

Mr Speaker, Gouvernman i kapab met an plas mezir ki permet devlopman kapasite resours imen dan bann sekter kle. Sa i kapab lenvestisman dan ledikasyon e formasyon teknik; devlopman kapasite dan sekter kle e akomodasyon pou bann zenn antreprenerye; ankouraz inovasyon.

Gouvernman i kapab ankouraz inovasyon dan sekter ekonomik, pou kapab ankouraz prodiksyon e konpetitivite. Sa i kapab enkli en kad legal e finansman pou enplimant inovasyon, sipor e devlopman e fasilite lantreprenarya ant Sekter Prive e sekter akademi; sipor leksplorasyon nouvo marse. Gouvernman i kapab fasilite akse avek diversifye marse pou Sekter Prive dan Sesel.

Sa i a kapab enkli sipor eksportasyon, ankouraz lentegrasyon dan marse rezyonal e osi enternasyonal, e siport devlopman bann sekter prometan.

Mr Speaker, sa letid i bezwen ganny fer avek latransparans, lenkliksivite, e konsantre lo devlopman dirab e lonterm. I merit ganny servi koman fondasyon pou pran desizyon baze lo laprev e gidans pou pran desizyon en lenplimantasyon Polisi e stratezi, ki promouvwar soutenabilite; kreasyon larises e krwasans, lanplwa dan Sekter Prive Sesel.

Baze lo rezilta e analiz, devlop rekomandasyon spesifik, Polisi e sa bann rekomandasyon i devret ganny adapte avek konteks inik Sesel.

An konsiderasyon bann faktur ekonomik, sosyal e lanvironnman pei e osi byen ki son limit loportinite.

Mr Speaker, avek sa 2 mo, mon krwar mon pou siport sa Mosyon. Mersi.

**(APPLAUSE)**

**MR SPEAKER**

Mersi Onorab. Mon pas laparol Onorab Adelaide.

**HON FRANCOIS ADELAIDE**

Mersi Mr Speaker. Bonzour Mr Speaker, tou Manm Onorab, e tou dimoun a lekout; byensir tou bann etidyan anler dan Galeri. Fotespere zot pe *enjoy* zot sesyon bomaten.

Mr Speaker, sa Mosyon ki Onorab William in anmennen, mon panse i en Mosyon ki i neser pou nou pei, ler nou mazin lo kote stratezik. E parey nou konnen dan pei, nou en pei ki tou dimoun i kontan me solman son leta bann keksoz i reste frazil.

Mr Speaker, Polisi *LDS* mon krwar nou tou nou konnen, se met plis larzan dan pos Seselwa, parey nou kontan dir. E pou kre larises pou Seselwa, mon krwar i nou rev.

Tro bokou letan Seselwa in reste en pe, ler sityasyon kot larzan pa'n zanmen antre dan zot pos, e menm ler pou ganny logmantasyon, zot ganny 4 poursan e nou nou'n donn 10poursan. Savedir i montre poudir nou kontinyen avek sa manner pou nou met larzan dan pos Seselwa.

E ler nou pe koz lo bann plan stratezik e bann Polisi, pou kontinyen fer larzan antre dan pos Seselwa, an mazinan ki nou pei i bezwen reste soutenab.

Byensir i pa pou nou me pou nou bann *future generation*. Bann marmay dan

Galeri, zot osi zot bezwen kapab ganny en keksoz ler zot vin adilt, nou pa kapab pran tou.

E byensir zot zanfan a lavenir, i bezwen kontinyen zere bann keksoz ki Sesel i prodwi. E lide sa Mosyon i koumsa. E mwan mon annan 2 pwen. Mon pou spesifikman koz lo lalimantasyon, akoz mon annan en distrik ki annan nou peser apre nou annan lagrikiltir.

E mon war poudir ki sa sekter e menm mon trouve ki tou dernyerman i annan en revitalizasyon, pou met lenerzi dan sa bann sekter pou ki zot vreman devlope e fer sir li lalimantasyon dan Sesel i reste pozitiv.

Nou'n trouve poudir ki *COVID-19*, ti anmennen; kot ler ti anonse, tou dimoun ti per, sakenn ti pe taye. Sa ki ti annan plis larzan ti aste plis komisyon e sa ki ti napa bokou larzan ti en pe per ki komisyon i a fin i e zot pa pou ganny manze.

E sa i montre ou ki sekirite alimanter, i en keksoz ki nou Gouvernman i devret pran an priorite. Lasante nou vant Seselwa mon krwar, i enn premye ki nou devret pe mazin e fer sir nou mentenir.

Mr Speaker, nou'n dan lendistri ton pou en bon pe letan – en bon pe letan nou'n dan lendistri pwason, me zanmen Sesel – mon pa konnen ki'n arive petet mon pa kapab – mon pa lev lanmen, me solman mon'n war ki zefor pa'n ganny mete pour ki Sesel i kapab annan en bato ton; ki ava annan son bann dimoun ki ganny *train*, ki pou al lo lanmer; pou al rod ton.

E menm ou konnen ler en keksoz i pour ou, ou tant pou an menm tan ou pe eksplwate ou pe proteze; tandis ki ou trouve sa ki vini dan nou delo konmela, zot pran tou e sa ki zot pa bezwen zot zete.

Byensir konmela byensir i annan bann linisyativ – ou petet ou tourn avek bann *bycatch* petet ki nou kapab fer bann lezot keksoz. Me solman i plis destriksyon ki Sesel i sibir pou sa 2 pti 25sou ki nou gannyen ki antre dan nou lekonomi.

Mr Speaker, mwan mon 'n ganny sans gout en pe ton – mon pa kapab dir mon sours kot i ete, me solman ler ou get sa bwat ton ki ou gannyen, apre ou get sa ton, sa laser ki Seselwa pa pe gannyen Mr Speaker, be aköz nou pa kapab ganny sa?

Mr Speaker, me sa bwat ton wi, i en sirplis, petet i en

alternativ ler ou napa en pti bouyon, me son laser ton – be si nou ti annan en dimoun Sesel ki ti ganny sa bann posibilite – pa dir napa, me ti a ganny sa lankourazman depi avan, me ozordi mon krwar pa si nou ti pou le manz lavyann - ouswa bann lezot keksoz.

So, sa bann keksoz in manke e petet la Gouvernman mon krwar ki donn en lide en pe pli inovativ. Nou anvi nou Seselwa ganny plis larises, mon krwar sa lendistri ton, Seselwa i kapab kapitalize e fer *maximum* pou zot kapab benefisy e Seselwa osi.

Menm pou lasante nou pe manz tou fre - pa bann ton dan bwat e mon krwar i en keksoz ki nou devret get\_ladan.

Mr Speaker, ankor en lot zafer, lontan ou pas kot tou lakour, ou vwar i annan en pye friyapen, en pye zak, en lot pye fri e sa ti ede. Petet ozordi si ou napa en diri, me ou kas en friyapen. E ozordi friyapen dimoun i rode.

Friyapen i komans fini dan Sesel. Menm bann zannimo parey sousouri zot ganny problem, bann zwazo zot ganny problem, aköz, ki i fer? I annan bann lalyann anvaisan zot rod tou sa bann lespas pou sa bann pye dibwa pou kapab grandi.



E prezan, ki arive? Sa bann pye dibwa – ki parey bann pye friyapen mon pe dir - pye zak, bann pye fri, i detri. E prezan sa, ki i fer? Nou kontinyen *rely* lo lenportasyon, lenportasyon, e enn de se zour, si nou pa fer atansyon (mon krwar legzanp in arive devan nou) nou kapab ankor dan menm sityasyon.

E mwan mon krwar ki Gouvernman ansanm avek Sekter Prive, zot devret kapab *venture* en pe dan sa domenn, pou ki manze Sesel - sirtou bann gro manze - ki bon pou lasante, mon krwar osi Minister Lasanble pou byen apresye, akoz sa pou ede pou nou redwir bann maladi kardiyovaskiler. E sa i a fer pou nou vin en pe pli an bonn sante Mr Speaker.

Mr Speaker, mon pe gete, parey mon bann koleg in fer resorti oparavan, bann fermye i ganny difikilte pou vann zot bann prodwi, akoz zot pe fer fas avek kantite lenportasyon ki pe antre.

Nou'n trouve Praslin, Mahe ler ti annan tomat, kantite ki ganny gate. E ler napa, en kilo tomat pros pou pa kapab peye! Me mon panse ki osi sa i en keksoz ki Gouvernman i devret get ladan.

Nou tande ki ti pou annan *cold storage*, me eski pa bann

landrwa kot nou ti devret pous bann Seselwa pou antre, donn zot lankourazman? Donn zot later, donn zot fasilite? Ansanm nou travay avek bann *extension officer*. Nou konnen ki kalite legim nou pe gannyen, me si fodre nou pez en pe lenportasyon?

Mon krwar sa i bann desizyon. E mon'n tann Prezidan dir, ki problem Sesel se pou fer dimoun pran bann desizyon. E sa i en keksoz - en *common sense* Mr Speaker. E bann dimoun dan *lotorite*, mon krwar in ler pou nou sakenn *run* nou travay parey en biznes e rod tou loportinite pou Sesel, pou ki Seselwa i benefisyè.

Mr Speaker, manze Sesel i tro an abondans e nou pa pe rod fason pou petet anmase, anmase pou letan dir. Mr Speaker, mon get kantite fri ki ler sezon i tonbe ater. E bann fri lokal, bann *juice* lokal, eski sa bann keksoz ki nou ti kapab fer Mr Speaker! Touris i aste sa – mon pa konnen.

Me sa i en fason pou nou ganny larzan. Me solman ankor i bann Polisi e stratezi ki nou bezwen fer, pou nou kapab atrakte bann dimoun dan lakominote, pou zot al rod bann masin; aste sa bann fri e fer bann lezot keksoz avek, menm asar, bann *juice* lokal, eksetera,

pou zot kapab vann, ganny larises, pei i benefisye, touris depanse e lasante en pep i ganny vremen valorize. I ganny petet *upgrade* vremen parey mon kapab dir.

Mr Speaker, petet mon a ganny gete en pe mal lo sa enn; petet par bann marmay anler mon pa konnen akoz – be sa bann gonaz ki pei i enporte? Tro bokou larzan dan bann gonaz ki detri lasante nou pep. Nou detri lasante nou bann zanfan, nou detri lasante nou adilt, nou detri lasante nou lanvironnman.

Mr Speaker, me tro bokou gonaz i ganny enporte Sesel. Eski pa in ler pou petet Gouvernman atraver son Polisi e stratezi, pa in ler pou nou kapab get en pe sa bann zafer? Wi, mon dakor marmay nou bezwen donn en pti *candy*, petet en pti *twisties*, me nou pa kapab fer enn lokal, en *pti chips* mayok? *Chips* friyapen dan plas fer vini bann *twisties* ou pa konnen ki annan ladan?

Sanmenm sa ki fer nou bann zanfan azite e petet i fer nou annan bann *behaviour* ki petet enn ler nou sey - nou le rode – me enn ler nou dir anmenn kot bonnonm dibwa petet marmay in *posessed*.

Non, petet in kapab en zengredyen dan sa bann keksoz

ki nou fer vini, ki kapab pe deranz nou bann zanfan. Pa zis zanfan, adilt tou. So sa i en keksoz osi ki nou pou bezwen get ladan.

Mon konnen poudir Sesel parey Onorab Hoareau in dir, nou en pei ki ganny *blessed* e sa manti pa vre – wi-wi- wi e menm parey mon ti dir ti deza annan en etranze ki dir,” be Sesel ler ou gete, Seselwa pa bezwen travay, i kapab dormi deor aswar, napa ni bebet feros pou manz li; i kapab pa pey delo *PUC*, larivyer en kantite, i kapab menm manze pa bezwen aste okenn prodwi lo sa *RRP* akoz mang, friyapen partou i annan dan bwa.”

So nou en pei ki *blessed*. E i kapab pa pey *PUC*; i bennyen anba larivyer, *waterfall* partou. So kote ankor nou pou war en pei koumsa? So, ou konpran – nou telman *blessed*, me solman nou pa pe profite. Nou napa bann Polisi. Nou annan en pti gin wi, me solman nou bezwen ankouraz plis Polisi, plis stratezi, pou ki nou kapab benefisye Mr Speaker.

Mwan mon'n dir zil en kantite nou annan – kantite zil. Ozordi Sesel ankor pe enport manze zannimo; eski napa en fason pou nou gete, oli sa zil ki nou kapab petet plant mai? Donn en dimoun en pti larzan,

ankouraz zot. Me donn 2 fermye en bout zil – fer zot al plant mai, fer manze zannimo. Nou pa bezwen enport manze zannimo.

Nou annan bokou bann protein ki lo bato ton partou laba, be nou pa kapab pran sa melanze, petet i annan dimoun ki annan sa bon *formula*? E menm nou kapab eksport sa bann manze zannimo deor e ganny reveni.

Mr Speaker, tousala i bann keksoz ki nou bezwen kalkile, nou bezwen panse. Ankor nou annan nou kannel. Mon tann dir nou kannel i dan tou lesans deor, me solman nou pa ganny preski nanryen lo kannel. Ler nou koz kannel tou dimoun i per, i dir ou non-non pa bat kannel, sa lesklav, nou bezwen tous *computer* – isi, laba.

Be Mr Speaker, nou kannel dimoun deor pe apresye. E menm sa lesans pli ser ki menm nou, nou pa kapab peye atraver nou lesans kannel, so eski i pa en keksoz ki nou devret get ladan?

Mr Speaker, nou dimyel; Mr Speaker, si mon koze, ou pou bezwen aret mwan akoz mon annan tro bokou nide – i annan tro bokou lide ki pa'n ganny mete oparavan – mon pa konnen si in annan en pe pares

osi, ouswa *at least* zot ti get zot pos.

Mon annan ankor nide Onorab mon pou donn ou, me solman mon'n donn ou en pe – ou kapab pran detrwa touzour. Me mon a donn sans bann lezot dimoun koze, akoz mon konnen zot osi zot annan bokou bann nide, e ki mannyer nou kapab vremen met larzan dan pos Seselwa.

Mr Speaker, mwan mon rev ki pansyoner i kapab ganny 10mil zot osi mwan osi, parey zot abitye dir, me solman si nou tou nou debourye, nou tou nu kontribye, me ti ava en bon keksoz pou nou pei e pou nou dimoun an zeneral.

E Mr Speaker, mon panse ki Onorab William, ou Mosyon ki ou'n anmennen i byen kalkile e i montre ki ou en dimoun ki vremen met ou pep o sant devlopman - pa devan sant devlopman parey zot dir nou. E we-we me si ou kontinyen dan sa laliny.

Mon pou donn ou tou mon sipor e mon panse ki Lasanble osi pou donn ou tou zot sipor. Akoz i annan bokou nou kapab fer pou nou kapab met larzan dan pos Seselwa.

Mr Speaker, mon konnen mon 'n pran en pti gin letan, me solman mon a remersi ou an donnan Onorab lasirans ki ou

sipor ou pou ganny avek mwan.  
Mersi Mr Speaker.

**(APPLAUSE)**

**MR SPEAKER**

Mersi Onorab. Mon a donn  
laparol Onorab Michel Roucou.

**HON MICHEL ROUCOU**

Mersi Mr Speaker. Bonzour tou  
bann koleg Onorab. Bonzour  
tou dimoun ki dan lakour ki pe  
ekout nou, espesyalman  
zabitan Mont Fleuri; e bonzour  
tou bann zanfan sorti kot Lekol  
Anse Royale Segonder.

Mr Speaker, ler mon ti pe  
ekout mon koleg Onorab  
Adelaide – ou a dir i ti pe lir  
preski laplipar mon *speech* ki  
mon ti'n ekri lo kote sa Mosyon  
anmennen par Onorab Waven  
William.

Mr Speaker, sa Mosyon i  
vremant enportan, akòz mon  
panse i se ki apre bann  
leksperyans ki Sesel in pas  
ladan tou resaman atraver  
*COVID*, e nou 'n vwar poudir sa  
in kapab montre nou en pti pe  
ki frazil, frazilite nou lekonomi i  
kapab ete.

E zis en pti pe apepre  
parey Onorab Adelaide in dir, e  
petet mon a kontiny lo sa ki in  
kite; ozordi ler ou pas – ou anv  
fer ou en bon ladob, oubyen  
manze ki annan pou fer avek

dile koko, e si ou en dimoun ki  
pares, definitivman ou pou  
desann laboutik, ou pou al aste  
sa komodite laboutik.

E souvandfwa Mr  
Speaker, ler ou ariv dan  
laboutik, ou vwar poudir dile  
koko pe ganny vann e pe ganny  
enporte isi, sorti *Sri Lanka* ek  
bann lezot pei. E pour vi ki nou  
en pei ki tropikal e nou en pei ki  
ti annan pye koko an abondans,  
e nou vwar poudir se ki si nou  
pa fer – nou pa pran li serye,  
nou pou perdi sa.

Mr Speaker, akòz mon dir  
sa? Se ki ozordi Sesel, nou vwar  
i se ki nou pa pe pran son  
lenportans ki koko i kapab  
anmennen o nivo lasante, osi  
dan nou bann pla Kreol li menm  
li.

E lontan ler ou pase,  
laplipar lakour ou ti vwar pour  
se ki sak dimoun ti annan en  
pye koko. E Mr Speaker, ou ti  
riske ganny met dan prizon,  
akòz zis anmas en koko lo  
propriyeter en dimoun en  
serten letan.

E ozordi nou'n vwar  
poudir, sa pe komans perdi en  
pti pe son lanpler, e nou tro  
parey Onorab Adelaide in dir  
nou trop pe war nou pe enport  
bokou keksoz ki pe sorti dan  
larestan pei, ki aprezan nou,  
nou pe perdi e nou war nou pe

antre dan en koutim, kot zis nou pe depan lo lezot pei.

E akoz ki mon pe dir sa, se ki mwan mon krwar i se ki nou nepli en pep kot nou pou bezwen asize, esper bann larestan dimoun sorti dan lezot pei pou vin montre nou ki manner pou fer serten keksoz.

E ozordi, avek nou bann zenn ek teknolozi ki annan, ek nouvo fason fer keksoz e nou kapab – pa parey nou bann gran paran avan, kot nou ti war zot kot zot ti bezwen rente, e pou zot kapab fer serten keksoz marse.

E ozordi teknolozi Mr Speaker, mwan mon krwar ki nou devret pe investir plis an term dan plas nou pe enporte, e akoz ki nou, nou menm nou enn nou bann Seselwa li menm li, antre dan biznes, kot nou kapab pe fer, kot dan plas laboutik, nou pe war i se ki nou pe ganny dile koko pe sorti dan larestan pei? E la i en fason pour pei li menm li i kapab ganny larzan e pou nu kapab ede pou fer plis lanplwa.

E ozordi Mr Speaker, mwan mon panse i se ki nou devret rod fason pou nou kapab ganny bann bout later, kot nou kapab plant bokou pye koko; kot la nou kapab ganny nou delwil parey Onorab Adelaide in dir, nou delwil ki sen i a kapab

ed nou lo nivo lasante li menm, akoz i annan delwil ki vini ki petet i kapab annan serten lenpak lo nivo lasante - *you never know* – me *once* ki nou pe servi nou delwil – delwil koko.

E ozordi ler mwan mon ‘n vizit La Digue, mon’n vizit La Digue Mr Speaker, mon’n war i se ki i annan en landrwa kot sa i ankor *still* pe ganny fer, me selman i pa lo sa lanpler parey nou, nou anvi. Ozordi Mahe, moulen – ozordi Mahe dir mwan kot nou kapab ale, pou nou al war en landrwa kot pe prodwi nou delwil koko, nou tradisyonnelman? Napa.

E si nou pe fer li Mr Speaker, nou bann zenn pa pou konnen ki savedir en moulen – ki manner ti ganny fer dan lepase. E dan lepase mwan menm Mr Speaker, mon kapab dir mon’n sanse, akoz tou le Dimans atraver lakour, nou ti bezwen pe vwar nou pe manze gro manze. E tousala i bann keksoz i bann keksoz ki nou kapab enporte Mr Speaker, pou nou kapa ganny en reveni lo la; nou bann pla.

E ler ou pe gete, Mr Speaker, dan tou sa ki’n ganny dir li menm li, nou bezwen nek asize antre nou rod en fason ki manner nou kapab ed nou lendistri. Nou pa pou kapab kontinyen depan lo tou keksoz

ki pe sorti deor, parey in ganny dir oparavan, kot nou war poudir sa i annan en lenpak lo nou lasante

E Seselwa, nou bezwen asize pran nou en nouvo fason fer keksoz. Nou pa kapab toultan pe asiste pe esper lo Gouvernman li menm li, pou vin avek bann lide, ki mannyer nou pou kapab anmenm sa lendistri *ease of doing business*, kot nou. Nou, nou menm nou anmenn en kou, kot sa demen i kapab benefisyé – benefisyé nou menm nou.

Mr Speaker, zis i annan en lot fri ankor ki bokou dimoun nou pa pe konn son valer, noni *fruit* Mr Speaker, ki nou dir li bwa torti. I annan en gran valer li. Malgre ki son loder me selman lo nivo lasante, nou war poudir i annan en benefis ki kapab anmenn. Be si nou, nou investir ladan, ki nou kapab enporte nou osi nou war ki bokou pei, i eksporte, (*sorry*) bokou pei i annan en kantite pei i fer sa.

E nou, nou bezwen ankouraz nou Seselwa pou nou apresye sa pei beni, ki Bondye in donn nou. Mr Speaker, detrwa semenn pase, mon'n ganny sans pou mwan zwenn avek en zeneral koman en Manm Komite Defans – sa msye pe dir nou poudir nou se ki

nou'n ganny beni – sanmenm sa pei kot Bondye in kre, ki nou pe dir paradi.

Me si en dimoun pe sorti deor pe dir nou sa, savedir i montre nou ki nou lenportans. Nou annan preski tou nou. Nou annan preski tou be petet nou pa ankor realiz sa, ki mannyer nou pou kapab apresye li – ki mannyer nou pou kapab pran nou bann keksoz natirel ki nou annan Mr Speaker, pou nou kapab investir li, anmenn li dan bann larestan pei deor, kot sa i kapab ede.

Ozordi ler ou pas kot bann lakour konmela, Mr Speaker, mon konnen parey Onorab William in dir, bokou nou bann dimoun pe reste dan flat, me petet pou azoute lo la, i annan bokou landrwa kot bann *housing estate*, i annan bann later vid o bor, ki *vacant*. Annou ankouraz nou Seselwa petet pou zot kapab plante.

I annan bokou landrwa pe ganny fer. Mwan kot mwan mon war poudir i annan bann vwazen kot zot pe plante e zot partaz ek vwazen. Petet annou ankouraz bann dimoun pou zot pran sa lide, pou nou ankouraz zot osi parey ler in dir pou zot ganny larzan dan zot pos, e pou nou kapab fer li pli fasil.

E Mr Speaker, ler nou pe get nou bann zil, ozordi mon

vreman apresye ki nou vwar *IDC* pe reantre dan *prawns*. Parey in ganny dir i se ki lot fwa nou'n vwar, kot Seselwa in kapab ganny li sa sans pou teste ankor nou *prawns* isi. E tousala, i bann fason ki nou kapab ankouraze pou nou ganny larzan demen.

E nou bann keksoz nou kapab dir organik li menm li, kot ozordi napa bokou landrwa kot ou kapab pase pou war kot pe ganny investi ladan. E nou pe kontinyelman enport bokou keksoz, kot la nou pe kapab dekouraz en pti pe bann petet ki dan sa domenn li menm li.

E zis en legzanp Mr Speaker, mon annan 2 dimoun dan mon distrik ki tou dernyerman mon ti war zot pe partisip – montre en pei pe zot bann travay lar – Mr Claude Vidot avek Mrs Antonia Tirant. Si nou kapab ed sa bann dimoun pou nou donn zot en lespas dan nou bann lotel, pou zot kapab *display* zot travay, kot nou bann viziter, i kapab aste.

Akoz? I pa'n sitan fasil pou zot pou zot, pou zot ganny dimoun pou zot kapab vini pou aste en pti pe zot travay. I annan en pti pe *hussle* la deor ou kapab dir. Me si petet i kapab annan en langazman avek Minister Tourizm ansanm

avek departman ki responsab nou bann zafer lar, kot nou bann pti dimoun deor, ki zot, zot pe anmenn en pti pe sa travay devan ki dan plas nou pe fer li lokal e petet enternasyonal? Tousala i annan sa benefis Mr Speaker.

Nou koz en pti pe lo kote kannel; kannel li menm li; i annan – i annan Mr Jaffa ki dan sa domenn li menm li – petet annou ankouraz en pti pe plis dimoun ki annan bann propriyete, ki petet lo la i annan kannel, kot la zot kapab vini antre dan en langazman avek sa biznesmenn pou li kapab fasilite sa.

E osi nou bezwen rode, kwa ki in fer dan lepase, ki Gouvernman oparavan in plito tir son – ou kapab dir sa lentera dan sa biznes li menm li? E ozordi avek teknolozi, kwa ki nou kapab fer, pou ankouraz plis dimoun pou zot kapab rantre dan sa biznes, parey nou war Minis Devika - Minis Vidot in vin devan, sey ankouraz nou Seselwa pou antre ladan.

E nou, nou anvi dir ek Seselwa i se ki zis sorti en pe dan sa kwen, pou esper dimoun sorti deor pou vin servi nou bann keksoz ki nou annan isi, e pou nou enporte kot nou war kot nou larzan i ale.

Mr Speaker, sa Mosyon i vremen bon. Lontan nou ti vwar poudir - mwan mon ti kot lakour, manmi i fer nou desann al rod en bwat pistas, nou vini nou fer kolodan la, nou rap nou koko, nou fer nou nouga, i bann keksoz ki pe persi. I bann keksoz ki nou kapab re-ankouraz nou Seselwa pou antre ladan.

Ti annan en madanm souvandfwa nou ti war li pase avek son tant vakwa, avek son konfitir lokal pe vann, e nou pa tro vwar li konmela; i petet bann keksoz ki nou kapab ankouraze. Nou kapab fer bokou; nou annan nou papay, nou zanmalak, nou friyapen parey in ganny dir Mr Speaker, kot tousala nou kapab eksporte pou kapab montre lemonn kwa ki sa paradi ki Bondye in beni nou avek; kwa ki nou. E sa i pou ed nou lekonomi tou, an term lo kote annan resours ki nou annan.

E menm Mr Speaker, nou delo, nou delo ki nou, nou annan isi Sesel, ler bann etranze Mr Speaker i gout nou delo, Mr Speaker i dir nou, nou delo i enn parmi bann pli bon ki annan en lemonn antye. E nou, nou bezwen war ki mannyer nou kapab fer sir poudir nou kapab vann sa dyanman ki

demen nou kapab benefisye avek.

E an term, lo kote bann dimoun ki pe enport nou pwason, petet Gouvernman antre dan serten dyalog avek bann *airline* aköz petet sa osi petet i ede pou dekouraz en pti pe sa biznes. Lo kote *airfreight* Mr Speaker, pou fer sir ki zot pe ganny sa lo en nivo, ki demen zot pa war ki zot pe perdi.

Mr Speaker, sa Mosyon, li menm li i vremen bon e mwan mon krwar poudir se ki si Seselwa deor nou kapab rod tou fason, vin ek bann lide, bann ki annan bann lide, vini, gete, zwenn avek Gouvernman i annan bann laport ki'n ouver i annan plizyer lanons ki'n anvoye, e Gouvernman li menm li lo kote resours, i en pti pe limite, me selman sa lanons ti ankouraz bann biznes prive vini, vin en pti pe plis ankor, zwenn ek Gouvernman pou nou kapab devlope e anmenn sa lendistri lo en lot nivo, Mr Speaker.

Mr Speaker mon kapab dir avek Onorab William kont lo mwan. Mon pou donn full sipor sa Mosyon aköz mon war poudir sa Mosyon i bon e mon swete ki nou bann zenn ki ozordi ki avek nou la, dan Galeri anler, zot pe ekout nou vremen kler, aköz zot demen



ozordi sa travay ki nou pe fer, sa fondasyon ki nou, nou pe mete, demen zot pou vin konstri lo la.

E demen petet bokou zot, zot pou antre dan bann biznes dan nenport ki tou keksoz k annan son valer, *be it* ou en ferme, *be it* ou en dimoun ki plante, li menm li, tou keksoz ki annan son valer petet zot dan zot zenerasyon pou zot, zot annan bann serten nide ki mannyer pou ede demen pou batir sa lendistri ki nou, nou pe koz lo la ozordi. Mersi.

### **MR SPEAKER**

Mersi Onorab. Mon a donn laparol Onorab Egbert Aglae.

### **HON EGBERT AGLAE**

Mersi Mr Speaker. Bonzour Mr Speaker. Bonzour tou bann etidyan ki dan Galeri pe ekout nou, tou Manm Onorab e tou Seselwa ki a lekout.

Mr Speaker, Mosyon ki la devan nou, pe demann Gouvernman pou revwar stratezi e Polisi pou ki sirtou nou Sekter Prive kapab reste soutenab, prodiktiv e osi grosi dan en sans. Mon get li koumsa mwan.

Me selman letan mon'n ekout mon bann entervenans ki avan mwan, mon krwar nou

bezwen resitye nou lenportans diskisyon lo sa Mosyon.

Premyerman Mr Speaker, Sesel i ganny klase 100tyenm mondyal lo kot i konsern *ease of doing business*, e Moris ladan ki enn nou bann frer dan Losean Endyen, li i *ranked* 13enm. E mon krwar la i annan en kantite refleksyon ki nou bezwen fer, pou nou sey war, akoz nou ankor lo sa nivo laba anler konpare avek en letan zil parey Moris, ki pe fer ase byen dan Losean Endyen e lo nivo Lafrik.

Mon konstate ki in annan plizyer diskisyon dan lepase - menm kestyon e Mosyon -mon rapel enn Mr Speaker, atraver ou kot Onorab Mondon ti anmennen lo size *ease of doing business*.

E si nou pa pe pran sa bann refleksyon ase serye, mon krwar Sesel nou pou war nou dan en sityasyon kot lo kote biznes li menm li, nou pou pe vir an ron san gran, gran progresyon.

Mr Speaker, mon dir sa akoz *ease of doing business* i en lakle pou biznes etabli li, komanse, e osi ed li pou li grosi e grandi e reste soutenab e relevans, dan sa lekonomi sa pei e sa i Sesel.

E mwan i annan apepre 4 eleman enportan pou mwan

konsider dan sa Mosyon e letan Mosyon pe demann revwar Polisi e stratezi, 4 eleman enportan pou pran kont, letan Gouvernman i antre oubyen pou *embark* lo sa revu ki Mosyon pe demande, e mon swete ki i ganny ekoute.

Premyerman, *issue* se ki pou ou kapab komans nenport biznes ou bezwen annan en *license*. Nou regard en kou prosedir ozordi pou ou kapab *obtain* en *license*; nenport biznes ou pou annan; i annan *license* ti pou pli fasil pou ou gannyen; i annan *license* pou baze lo magnitud sa biznes ki ou, ou pe al antre ladan, e osi ki sekte osi ki ou pe al ladan.

E ozordi, lotorite ki annan *license* se *Licensing* prensipal, be selman i pa pran desizyon lo li tousel, pou ou kapab ganny *grant* en *license*, akoz i pou bezwen annan bann lezot akter baze lo sa aktivite ekonomik ki ou pe al ladan; i kapab Lasante, i annan Lanvironnman, i annan bann lezot *Board* osi, ki pou annan bann *say* ladan; par egzamp dan touris.

Ou pou annan bann *Board* – bann lezot *Board*, ouswa bann lezot aktivite osi ki enplik rekomandasyon, ki sorti kot sa bann antite.

E parfwa zis sa premye letap, ou war bann difikilte ki sa

endividi ki pe aspire pou komans en biznes, pe fer pas atraver. I annan bann retar premyerman; i annan bann zwe ki ganny zwe, pou ou pa bouz devan tou. Sa i egziste.

E osi i annan bann lenstans kot ou pa ganny aprouve osi pou bann diferan rezon, ki mwan mon pa pou al tro dan sa bann diferan rezon, pangar mon pa oule sa Mosyon i antre dan en konteks politik.

Dezyenman, en laspe enportan lo la se kapital. Ou bezwen annan kapital pou ou *run* en biznes pou kit ou biznes *afloat* ouswa koman en biznes li menm.

Me kote ou ganny kapital? Parfwa ou kapab sanse ou sorti dan en laliny familyal, kot ou erit serten leritaz ou ganny kapital ki fasil, ouswa ou fanmir i ti deza ladan, ou menm ou, ou kontinyen dan sa laliny.

Me pa nou tou ki fortinen pou nou kapab ler ou ne ganny en *golden spoon* - parey nou dir dan ou labous. I annan ki al fer son letid etidye e la i aspiran pou li kapab pourswiv en karyer dan en biznes, baze lo sa ki li in aprann in aprofondir, ouswa in reve sa ki li i anvi fer.

E se la kot li i al rod dan en lenstitisyon finansyel pou li kapab ganny en fasilite finansyel kredi, ouswa si annan

bann *scheme* ki Gouvernman in met an plas, i ava akse la.

Me souvandfwa, i annan bann baryer ankor pou ou kapab ganny sa fasilite petet ou napa okenn *asset* pou met koman lateral, parey nou dir “*pledge*” si ou napa en propriyete – ou napa en zanr en fasilite ki ganny rekomande.

E de la ankor, ou bezwen mazine se kwa ki pa kapab petet dan en fason pou *push* sa dimoun pou ed sa dimoun pou li kapab ganny en fasilite kredi.

An menm tan nou regard bann ki deza dan biznes ki pe mazin *expand*, lo nivo lokal – taler mon pou koz lo ekspansyon enternasyonal - lo nivo lokal ankor i war li dan serten difikilte, ler i al kot en labank, ouswa en fasilite finansyel kot parfwa i pa *succeed*.

Me selman ou war bann – plizyer bann gro antite ki li son laport i ouver, kan i tap laport pou li al rod fasilite kredi, e i ganny donnen fasilman li.

So i annan en revi ki bezwen fer serye dan sa laliny, pou ed bann ki pti pou kapab grosi. E menm si i annan bann ki petet li i satisfè ek son groser ki i ete, me pou kit li a laflot, kontiny son biznes, parfwa vilnerabilite ki nou pei marse i

ete, i fasil pou nou ganny tape ek enn sok ekonomik.

Nou’n pas ladan a plizyer repriz e nou ankor pe sorti dan serten lenstans – bann sok *COVID-19* e i annan ki ankor pe *struggle*. E i annan ki ankor pe tap laport ozordi, zot pa ankor reisi.

So sa i bann refleksyon si nou anvi revwar stratezi e Polisi. E rol Gouvernman ladan, akoz nou, nou en pti marse, nou pa kapab konpran nou avek en gro marse parey Lenn, Lasin akoz zot, zot annan en sitan kapasite, sitan biznes ki pe deroule, sitan revini ki Gouvernman i anmase, nou, nou pa kapab met nou dan sa menm loptik, avek sa gran pei.

Me nou, nou bezwen met nou dan konteks nou pti marse, e la kot Gouvernman i bezwen annan en rol. Akoz mwan sa enn keksoz ki mon’n war Mr Speaker.

Gouvernman i le retir li direkteman, ouswa dan bann desizyon ouswa kot i konsern sipor pou bann pti biznes. E taler atraver ou Mr Speaker, Onorab Hoareau in sey pas o bor serten eleman sibvansyon, ki li in dir i pa pe dir. Me pou sa groser marse, ki nou, nou annan Sesel, Mr Speaker, en Gouvernman i pou bezwen war li detanzaot sey *incentivize*, sey

*fuel* sa pti lekonomi, akoz se li sa pti moter ki pe ed li debout ozordi.

I pou bezwen war li serten legzisans, akoz mon'n dir vilnerabilite sa pti marse. Moris i annan plis ki 1milyon dimoun nou, nou annan forse 100mil dimoun. So sa i en refleksyon ki bezwen ganny fer. E loter mosyon mon krwar i devret angaze dan sa laliny osi, pou konpran e diskite e osi ki zistans Gouvernman i kapab ale pou anpar sa ki nou apel sa Sekter Prive.

Si nou le larg li lo son *own*, ou dir li ale *without a proper backbone and support* deryer li, pa bokou ki pou reisi. Sa mon *mind* ou sa - pa bokou akoz nou koz en bon pe bann pti biznes ki dan difikilte e zot war zot pa kapab.

Lot eleman se laspe resours imen, ki ou bezwen pou ou kapab - bezwen travayer pou ou *run* en pti biznes; pe enport si ou *run* en biznes *online*, i bezwen annan en dimoun ki pe *manage* sa. Me souvandfwa, kou lavi i determin nivo zistans kot ou'n arive, pri ki ou bezwen pey en dimoun.

E nou annan *minimum wage* ki'n ganny preski dan Lalwa, tousala ou bezwen *abide* li. E resours imen i en eleman ki bokou biznes ozordi ki ti a

swete grandi e reste a laflot, war li dan difikilte.

Akoz nou lafors travayer – nou annan en group ki pa pe neseserman, anvi kontribye akoz i tonm dan serten eleman sosyal.

E osi nou annan petet lafason ki nou'n enstri nou ledikasyon anver marse lanplwa dan lepase, in ede osi kot nou'n zis *focus* lo sa nivo akademik, nou bliy sa nivo pratik ki fer ki ozordi, en sekter ki pe soufer, akoz napa ase travayer Seselwa, ti en sekter Konstriksyon.

I annan lendistri konstriksyon ozordi - etranze, akoz Seselwa i byen - nou'n os nou ledikasyon – nou'n osi nou nivo. Nou'n anvi nou bann zanfan grandi pou vin bann ekspers, pou vin bann ki pou ganny Doktora, pou ganny *PhD*, pou ganny bann *Masters*, i normal sa. I byen.

Nou'n sorti kot nou ti ete dan lannen – mwan mon rapel – dan bann lannen '80s kot marse lanplwa – (e sa i apel progresyon sa en)? Nou pa'n regresyon – marse lanplwa ti vize ver zis en kalite sekter.

Ti annan agrikol, nou ti annan lagrikiltir, nou ti annan bann sekter parey lapolis, nou ti annan *be it* medikal, ti plito *teaching*, ti zis en tandans. Me

avek levolisyon, nou'n bouze – nou'n tir nou zanfan - nou'n tir nou zanfan dan sa nivo pratik, vokasyonnel dan en sans, nou'n met zot lo nivo akademik. Ti normal.

Me selman mon krwar in ariv sa pwen osi pou nou reflexir la, si nou anvi kontinyen annan en sekter ki pou ganny dominan par etranze, akoz nou napa kapasite travayer lokal, sa i enn bann elmenan pou nou *go back to the drawing board*. E focus lo ki mannyer nou fer pou nou reganny sa sekter ki nou'n perdi travayer lokal, e komans donn Seselwa *incentives* pou li kapab.

E pou sa Seselwa ale byensir, Gouvernman i ankor annan en rol pou zwen ladan. Kwa ki ou anmenn lo latap pou fer li kontan pou li al laba? En bann refleksyon ki ou bezwen fer. Eski reminerasyon pou atase, pou li al laba i ankourazan? Tousala ou bezwen demann nou lekor bann keston. So i annan en lansanm.

En lot eleman ki enportan *the ease of doing business* se lenfrastruktir, lekipman. E pou ou fer en biznes ou bezwen annan en *location*, en ladres, *yes*. I annan ki kapab dir mon fer mon biznes – ou kapab fer

ou biznes se ou si oule – ou kapab asize ek ou *computer*.

I annan diferan sekter i mars koumsa, ou kapab fer – bann sekter finansyel, bann sekter bokou *retail*, lenportasyon – ou kapab asize fer li koumsa.

Me solman i annan biznes, servis ki ou pe donner ou pou bezwen annan en lokasyon e pou ou ganny en lokasyon ou bezwen annan en propriyete, annan en bout later.

E difikilte Sesel ozordi se ganny en bout later pou kapab komans en biznes – bokou i koumsa. E se sa bann rezon ki Gouvernman lepase, in fer konblaz. Malgre ti ganny kritike, Gouvernman lepase in fer konblaz pou donn dimoun. Ozordi nou get Providence, nou get Perseverance, la ki pe ed

E Gouvernman avan - sorti nou ti annan plan pou kontinyen fer konblaz, pou agrandi pou donn lespas biznes pou li grandi - sirtou Sekter Prive, me nou'n perdi eleksyon. Mon swete ki sa Gouvernman osi pe mazin dan sa laliny, pou kapab rode kot lespas i ete, annan pou kapab donn bann ki pe espere pou zot kapab fer zot biznes.

En lot pwen Mr Speaker, mon krwar se ki fason ki nou regard marse ozordi. E size

*marketing* in en *issue* pou sa pti marse ki nou, nou annan. I annan nesesite pou annan plis diversifikasyon dan lekonomi e sa mon dakor. Akoz nou pe war bokou dimoun lo *focus* lo sa ki son kanmarad pe fer.

Akoz son kanmarad in komans en keksoz, in ganny larzan e tou nou tou le al ver laba e la i vin en sityasyon satirasyon, apre nou dir napa lavi ladan.

Nou'n war sa dan diferan sekter; *omnibus* i enn – *taxi* i enn - la mon'n tann Onorab Hoareau atraver ou in koz lo *retail sectors* in dir met en memoratwar lo la. Mon pa konnen ki mannyer Gouvernman pou fer sa avek sa sistenm liberal ki zot, zot pe pratike, ki kont prensip. Dayer sa ki zot prensip.

Me solman nou bezwen regarde lo ki nivo ki kapasite parey dan Sekter Touris zot pe fer kot i konsern biznes touristik lo *carrying capacity*; zot pe komanse lo La Digue, byento petet a vin lo Mahe.

I annan bann *moratorium* ki ganny mete lo bann lotel par lao 25 lasanm e plis. Eski prezan nou bezwen al get sa sekter *retail* li menm pou war eski i pa'n satire?

E nou konnen lekel ki domin sa sekter, se pa Seselwa.

Se plito bann etranze ki pe domin sa sekter. So i enn bann refleksyon ki nou bezwen. E mwan pou mwan i en sekter ki enportan – *retail sector*, me selman en lot kote refleksyon se i pa pe donn bokou lanplwa nou Seselwa pou travay.

Akoz nou war sa ki li i komans son biznes ladan, i anmenn son lot konfrer etranze pou travay dan menm keksoz avek li. So, tousala i bann refleksyon.

En lot laspe dan stratezi se, nou tou nou anvi Sesel i devlope, *expand* dan en fason me nou bezwen get osi sa *issue* litilite servis e kominikasyon. I enportan sa. Par egzanz dan sekter lapes, nou koz bokou lo lekonomi ble, fantastik! Nou pe kot demen, nou pou agrandi sa sekter, annan plis fasilite stokaz; nou pe koz par egzanz *ice plant* dan bann *refrigerated areas*, kot *storage areas* kapab ganny mete.

Nou pe koz osi lo *value* – valer azoute dan sa sekter e menm pou lagrikiltir, me tousala ou bezwen premyerman annan bann lenfrastriktir. E si nou pe koz lo bann zannimo osi parey. Nou anvi koz lo gro manze nou bezwen annan lenfrastriktir. E letan ou fer lenfrastriktir, ou bezwen annan litilite, ou bezwen annan delo,

ou bezwen annan bann bon sistenm kominikasyon sa *internet*, telefonn.

La, eski prezan li *PUC* i annan kapasite pou kapab furni lenerzi adekwat, si dizon nou antre lo en ekspansyon agresiv *for the next five years*, annou met tou sa bann lenfrastruktir, annou met devlop sa bann sekter ki pe rod bann *value-added*, eski i pou kapab? E larepons se non.

I bezwen annan bann stratezi diskisyon ki avek lekspansyon biznes lekonomi, sa sekter ki pe prodwi lenerzi i osi pe bezwen *expand*, pou kapab *meet the demands*. Se sa enn probleman, se ki letan ou ti antre dan sekter tourizim avek en agresivite, pou nou *build* bann gro lotel, kot *PUC* pa ti kapab donn kouran. Ti pe dir zot be *as part of your condition*, ou bezwen prodwi ou prop elektrisite, ou prop sistenm desalinasyon.

So, tousala i bann refleksyon ki nou bezwen fer, pou nou kapab anglob biznes, akoz i pa kapab mars li tousel. E se la kot malgre nou pa kontan, Gouvernman i annan en rol kle dan stratezi e Polisi, pou kapab anmas tousala.

Dernyen Mr Speaker, Seselwa li menm li koman en nasyon, lo nivo solidarite kot i

konsern biznes nou vreman, vreman pa solider. Nou pa le siport nou frer, apiy li, nou plito anvi siport etranze. Be ki mannyer nou anvi nou pti frer Seselwa i kontinyen grosi, i kontinyen reste dan biznes?

Nou get bann Nasyonal parey Sinwan, Sinwan i enn bann nasyon solider e zot menm kre bann sistenm en pe parey Endyen osi – bann sistenm mikro finansyel antre zot pou zot kapab ed ou, pou ou grosi.

E menm kapab met enn be dir be *ok*, mon annan lenfrastruktir laba, mon a met sa dan ou lanmen ale, ale, mon ava siport ou, apre ou ale i pou vin pou ou sa. Me dan konteks Seselwa, nou annan en sityasyon kot nou mefyan nou kanmarad ki dan biznes; nou devlop zalouzi, nou fer kalonmni, nou rod tou fason pou detri li. *But this is bad for* biznes koman en pei.

E se sa ki etranze i kapitaliz lo sa *non-solidarity* ki nou, nou annan pou li annan lavansman. Ou pou dir mwan petet vann sa etranze sa *building* laba, ouswa sa propriyete, dan plas ki sa Seselwa ki li in demann ou, akoz ou pa li bouze.

Ouswa nou dir non, sa msye pe pran tou laba li; be

plito en Seselwa i pran tou, i *expand vertically* ki mon war en etranze ki vini, i antre i pran tou, i *expand vertically*; e demen li i tyonbo nou sekter lekonomi dan sa sekter ki li i ladan, se li ki dirize e la kot i vin monopolize.

Nou war sa dan *retail sector* akoz demann bomaten si nou Sesel, in arive – mon pa swete – nou ganny en dezakor avek sa *retail sector* ki la, ouswa nou annan en problem *diplomacy* avek sa pei, sirtou Lenn, nou kapab war nou dan serten problem si zot decide zis fermen, nou pou riske war nou dan en gro problem. So i bann refleksyon ki nou bezwen fer Mr Speaker.

E dernyerman se, taksasyon; mon anvi koz lo taksasyon, Mr Speaker, akoz i ankor *still* annan serten *unfairness* lo kote taksasyon kot i konsern Sekter Prive. E *VP* ti dir nou poudir zot pe revwar taksasyon me sa ki mwan mon'n war *VP* vin fer, in zis tir serten poursantaz taksasyon lo gro biznes dan serten sekter. Pti biznes nou, nou ti fer li dan lepase, kot nou ti reviz tou bann diferan *threshold*

Par egzanp si ou pe fer profi anba tan ouswa par lao tan, ou ti pou pey tan, e ou pey tan. Mon krwar sa osi dan Polisi

stratezi avek sa revi ki pe ganny demande, i bezwen vwar lo ki fason nou anmenn sa balans, pou fer ki napa okenn defavorizasyon dan Sekter Prive e ki zot a kapab reste soutenab pou zot agrandi.

Mr Speaker si mon pou tous bann lezot pwen, nou pou ale, me selman letan pe ale pou nou ganny en *break*. Mon pou aret la. Me selman mon bann lezot konfrer ki ava koze, zot ava tous bann lezot pwen ki pa'n ganny touse. Avek sa mon pou dir pou mersi.

**(APPLAUSE)**

**MR SPEAKER**

Mersi Onorab. Wi i korek, nou'n depas nou letan pou en poz. Alor mon ava apel pou en poz la e nou a rebran 11:10. Mersi.

**(BREAK)**

**MR SPEAKER**

Nou a rebran deba e laparol i pou Onorab Cosgrow.

**HON WALLACE COSGROW**

Mersi Mr Speaker, bonzour Mr Speaker. Bonzour tou Manm Onorab, tou *staff* Sekretarya, tou manm piblik ki pe ekout nou. Ankor enn fwa i en bon zour.



Mr Speaker, mwan mon pran laparol bomaten lo sa Mosyon prezante met devan par Onorab William; e mon osi anvi dir enn de pti keksoz dan laliny sa Mosyon.

Parey in ganny dir par detrwa mon bann koleg dan Lasanble, sirtou par egzanp sa ki Onorab Aglae in abord lo la pli boner. O komansman Mr Speaker, mon ti a kontan fer resorti, dir ki nesesite pou devlopman ekonomik Sesel, i fer ki nou bezwen en Sekter Prive, en lanvironnman biznes, en lanvironnman dan lenvestisman ki *conducive* e ki met loportinite bann antreprenner Seselwa pou kapab er biznes e pou kre larises pou nou pei.

Sa i en *prerequisite*, ouswa i en fondasyon pou nenport ki pei, nenport ki pei ki swa ou groser, nenport kwa ou groser; i en *prerequisite* pou kapab kre sa devlopman e devlopman soutenab parey in ganny koz lo la.

I enportan Mr Speaker, se devlopman biznes ki kre e kit larises dan pei e la nou pe koz an prensipalman devlopman biznes, sirtou bann pti e mwayen lantrepriz.

Diran bann lannen ki'n pase, in annan bokou travay, bokou zefor ki'n ganny fer pou

devlop sa sekter pti e mwayen lantrepriz.

E la mon pe mazin bann lenstitisyon par egzanp *SEnPA*, ki ozordi i apel *Enterprise Seychelles Agency* ouswa *ESA*, ki'n fer en kantite travay pou devlop e pou promot biznes. Sirtou dan sa lankadremman pti mwayen antrepriz.

Nou'n war bokou bann biznes in ganny formen, bann ki'n komans ptipti e ki'n *graduate* dan en fason si oule, ki'n vin bann mwayen antrepriz. E menm i annan bann ki'n ozordi pe fer kontribisyon signifikan dan lekonomi pei.

E sa Mr Speaker, in posib atraver bann Polisi a sa moman – diferan Polisi a diferan moman dan diferan letan devlopman, ki'n fer ki nou kapab war en revolisyon progresyon, dan lafason ki sekter lekonomi Sesel, bann biznes in nobou epanouir, devlope e fer zot kontribisyon ver lekonomi Sesel.

Mr Speaker, si nou get sa *landscape* lekonomi, *landscape* biznes Sesel ozordi, ou pou war poudir Sesel i annan en bon fondasyon, malgre nou en pti pei zil, nou annan en bon fondasyon an se ki konsern nou Sekter Prive; nou sekter biznes

isi Sesel, ki prensipalman dan 2 sekte.

Me nou'n war lagrandisman e levolisyon bann sekte par egzanp sekte finansyel, sekte *offshore*, sekte – en pe ozordi, nou pe war bann sekte par egzanp kominikasyon kot i annan potansyel pou lavenir.

Si nou pran an kont sa labaz ki annan, pou mwan mon krwar Sesel i pe vini dan en bon direksyon, pou kapab ariv lo sa lot nivo devlopman ekonomik ki nou bezwen, e sertenman nou pa kapab *afford* pou nou pa bouze; sansan nou pou reste lanmenm nou pou *stagnate*. E nou pou war lezot bann pei, pe bouze e nou, nou pa pe neserman al parey nou, nou anvi.

Mr Speaker, i enportan ki nou note ki ozordi larealite, l larealite ozordi, sirtou apre ki nou'n fer fas avek pandemik *COVID-19*, bokou bann pti e mwayen antrepriz, pe fer fas avek bokou difikilte. Mon dir sa aköz in ganny fer resorti sirtou par bann biznesmenn zot menm, me osi in ganny fer resorti dan en papye ki *Seychelles Chamber of Commerce and Industry* ti fer resorti, ti pibliye, an se ki konsern ki mannyer biznes i *get back from* pandemik *COVID-19*

e retourn dan serten normalite, pou zot kapab kontinyen progrese e kontribye dan lekonomi pei.

Sa bann difikilte i reel, i la. E mon asire ki bokou dimoun e Onorab ki pe ekoute, bokou biznesmenn ki pe ekout deor, sirtou bann pti e mwayen antrepriz, zot pou kapab konpran, zot pou kapab relye avek sa ki mon pe dir.

Menm si i annan bokou Mr Speaker, ki pe debout, bokou sa bann biznes ki bokou dayer in fermen, aköz zot pa'n kapab soutenir sa bann porsyon ki pandemik *COVID-19* in met lo zot.

Me i annan bokou ankor ki pe debout e zot in bezwen reasizte e zot pe frot o bor – preski dir o bor *bankruptcy*, o bor fermtir zot biznes, me solman zot bezwen sey readapte, sey aziste, revwar zot *business model*.

Zis pou donn en pti legzanp Mr Speaker, zis Sanmdi mon'n koz ek en madanm; annefe ler mon ti Anse Aux Pins mon'n koz ek en madanm, in eksplik mwan, i travay avek en pti biznes. I travay avek en pti9 biznes - in eksplik mwan in bezwen pran konpanyen in pran en *pay cut* avek son anplwayer; e zot in bezwen asize negosye.

Akoz i ti annan 2 swa; swa i pran en *pay cut*, i redwir son ler travay, ouswa sa anplwayer ti pou bezwen fer swa li swa son lot koleg arete, akoz i ti pou napa sa kantite reveni pou kapab kit sa travayer, ouswa 2 travayer ki i annan dan zot lanplwa.

Sa i bann legzanp, bann sityasyon reel ki ozordi bokou biznes pe fer fas avek. e bokou biznes parfwa zot war zot dan en difikilte, pou zot war bann diferan fason pou zot kapab sorti dan bann sityasyon.

Enn bann keksoz Mr Speaker, ki ozordi pe met bokou presyon lo bann pti biznes, se kou prodiksyon; pour zot kapab reste afloat, zot bezwen kapab redwir, met zot kou prodiksyon pli ba posibilite, pou zot kapab reste konpetitiv dan marse.

E ozordi nou konnen poudir kou elektrisite i eleve, pri transpor i eleve, pri travayer osi i ase eleve e zot bezwen manyer tousala pou zot kapab ariv lo en pri ki zot vann zot bann servis, ouswa zot prodwi, pou zot kapab reste *afloat*.

En lot keksoz ki dimoun i dir nu ozordi, dan pei dan lanvironnman biznes ki kre serten difikilte pou zot, se bann prosedir birokratik. Bomaten Onorab Aglae in koz lo *ease of doing business*, e se sa en pti pe

bann konsern ki bokou biznes i annan – bann prosedir birokratik pou ganny *approval* isi, pou ganny *approval* laba, ou bezwen fer en pake letour, esper en kantite letan.

Tandis ki bokou bann lezot pei otour nou, dan larezyon, dan Lafrik, dan lezot landrwa petet ki annan serten konpetisyon, zot war keksoz i bouz sitan vit.

Enn bann faktor e i pa enn nouvo faktor, me selman i reste en faktor, ki bokou bann pti biznes i fer fas avek ozordi se pou ganny difikilte pou ganny finansman. I annan serten biznes Sesel ozordi ki kapab akse finansman fasilman.

Me i annan en gran kategori, en gran group dimoun – en gran group biznes, ki fas a bann diferan *challenge*, zot bezwen serten finansman pou zot kapab revwar zot *business model*, revwar zot prodwi, revwar lafason ki zot *operate*.

E zot pa pe kapab akse sa finansman e ki fer zot reste kot zot ete, zot *stagnate* e zot pa pe kapab bouze.

E dan evantyalite kote zot pe antre, zot bezwen war zot fermen. Mon konpran the *survival of the fittest* parey nou'n ganny dir, Me nou bezwen kapab donn loportinite tou sa bann biznes, pou zot

kapab al pli lwen posib ki zot kapab.

E si i arive ki zot *fail*, sa i en lot zafer. E nou kapab asize dir ki zot in *fail* – nou'n f er keksoz pou adres li par egzanz difikilte finansman, bann prosedir demokratik avek bann *high-cost production*.

E parey mon'n dir Mr Speaker, *COVID-19* in sertenman en faktor ki'n afekte bokou biznes Sekter Prive. Nou konnen poudir pei ti preski dir *shut down* avek *COVID-19* e bokou bann Sekter Prive, zot ti pe soutenir pou en peryod letan lo sa lasistans Gouvernman (*FA4GR*).

E apre sa Mr Speaker, in napa en vre plan kan mannyer nou recover *post-COVID*. *SCCI* dan son pape ki i ti fer resorti, in koz lo neseseite en *recovery post-COVID*, me nou pa'n war avek Gouvernman, en plan pou soutenir bann pti biznes or bann biznes an zeneral *post-COVID* – en plan ki swa finansyel, ouswa *policy-wise* kot i kapab ed zot, soulaz zot pou zot kapab kontinyen *operate* dan sa lanvironnman ki tre, tre difisil e ki'n difisil apre *COVID-19*.

So enn bann keksoz ki la Mr Speaker, sa vizyon par Gouvernman, pou kapab etabli en *post-COVID package* pou

bann pti biznes ki dan mon avi, dan mon pwennvi, e dan bokou bann pwennvi bokou dimoun e bokou bann pti biznes, ti kapab fer en gran diferans e ti kapab tir nou kot nou ete ozordi.

E si tou mon bann lenformasyon i bon Mr Speaker, mon konnen ki ozordi nou annan bokou difikilte kolekte reveni. E difikilte kolekte reveni pa selman kot *SRC*, i en problemm pti biznes pa neserman fer sa reveni pou kapab pey zot kontribisyon anver *tax*.

So, sa dan li menm i montre en serten mank planifikasyon, an se ki konsern vwar ki mannyer bann pti biznes i kapa re-aziste apre *COVID*. Menm si mon'n dir ou tousala Mr Speaker, mon pwen ki mwan mon ti vremen anvi koz lo la ozordi, e mon pwen ki mon krwar mon santi ki loter Mosyon pa'n neserman touse, malgre mon konnen i en keksoz ki dan son lespri in bezwen mazin lo la.

Akoz pandan sa pti morso letan ki mon'n fer Komite *IAC*, i en diskisyon ki nou'n deza gannyen oparavan, ler mon ti en Manm *IAC*. E sa i mon krwar i enportan, e ki sa lot frontyer ki nou bezwen fransir pou nou ariv lo sa lot nivo devlopman ekonomik, pou anmenn plis

larises pou Sesel, e plis prosperite pou pep Seselwa.

Sa lot frontyer Mr Speaker, e mon krwar zot pou dakor avek mwan, i loportinite biznes Seselwa pou kapab sorti dan sa pti lanvironnman kot nou ete, kot i annan bokou konpetisyon kot dimoun pe vremen bezwen pa al lager fizik, me selman lager ek kanmarad rod fason ki mannyer zot reste par lao delo, e zot kapab zot biznes prospere.

E sa lot frontyer Mr Speaker, se Kontinan Lafrik – la rezyon e Kontinan Lafrik. Parey mon'n dir groser ki nou marse i ete, i fer ki i annan serten baryer. I annan serten baryer i annan prodwi ki bon, me selman kantite demann ki nou annan i pa neserman ase pou lakantite biznes ki pe antre dan bann diferan bann diferan domenn. E biznes i bezwen bouse.

E loportinite grosi, se dan larezyon Kontinan Lafrik. E la Mr Speaker, i anmenn mwan lo sa lagreman *Africa Free Trade Area* ki Sesel i en sinyatir parti sa lagreman. E i en lagreman ki nou'n ganny sans koz lo letan nou ti dan *IAC* - ler mon ti dan *IAC*, ti vin devan *IAC*.

E nou ti ganny fer konpran bann diferan benefis ki *Africa Free Trade Area* i

anmennen pou nou. Ozordi nou annan nou 54 pei Lafrik ki form par Linyon Afriken. Nou annan 46 sinyatir – pei sinyatir sa lagreman. I en posibilite ozordi pou tir apepre 30milyuon dimoun – 30 milyon Afriken dan lapovrete. E en loportinite pou kree linovasyon dan lafason fer biznes, dan kalite biznes.

I en loportinite ki anmenn biznes Seselwa ver 1 bilyon konsonmater e en lavalier – mon pa konnen mannyer dir sa an Kreol me selman *US\$3 trillion in GDP*.

So i en loportinite enorm en loportinite *vast* pou biznes Seselwa i kapab *tap into*. E mon krwar se sa laliny ki nou devret pe al ladan si nou pe koz kre plis larises pou biznes, kre pli biznes, kre plis biznes inovan pou Sesel; e pou kre plis larises parey mon'n dir pou sa...

Se sa vizyon ki nou bezwen viz ver e se sa vizyon ki pou donn lespwar nou bann biznes, donn lespwar lazenes ki anvi antre dan lantreprenarya. E sirtou ozordi nou annan en kantite bann zenn ki tre, tre edike, ki annan diferan *background* lekspertiz, ki loportinite Sesel i tro pti - loportinite Lafrik.

E dan kad legalman legal sa *Africa Free Trade Area* i donn nou loportinite. I enportan ki

Gouvernman li i bezwen sorti e i bezwen pran sa lankadremman parey in ganny fer, e met li a loportinite bann zenn e biznes Seselwa ki'n deza etabli. Sa i sa loportinite Mr Speaker.

Bokou parey mon'n dir i annan bann zenn ki bann *very tech savvy*, zot tre bon avek devlopman teknolozi; zot annan kalifikasyon, leksportiz dan bann domenn finansyel. Nou annan lantreprenner dan bann domenn lapas, nou annan lantreprenner dan leksportasyon bann prodwi lapas, nou annan lantreprenner dan bann domenn *beverages*.

Par egzanp *Takamaka Bay* ozordi loportinite sa *brand*, sa kalite prodwi ki i fer i lo nivo e i kapab *foresee* nou teritwar i al pli lwen Lafrik - mon krwar in deza komanse. E loportinite pou zot fer pli gro, - bokou pli gro i egziste. Se sa ki *Africa Free Trade Area* i reprezante pou nou Mr Speaker.

E pa ki mon pe *talk down* lo sa ki serten Onorab i dir, mon krwar *it's well and good* nou annan nou bann lantrepriz tradisyonnèl. Me zis mon a donn ou en pti legzanp Mr Speaker, dan bann lannen 2000 mon ti manz graton Langleter dan en pake ki parey en pake *twisties*.

Lannen 2000 mon ti manz *chips plain* dan en pake ki parey sa pake *twisties* Langleter. Sa lannen 2000 - nou 23 an la Mr Speaker.

So nou annan en loportinite pou nou tir sa biznes tradisyonnèl, ki'n ganny koz lo la, sa friyapen, sa manyok ki Onorab Adelaide i dir i pa manze *twisties*, nou annan en loportinite pou nou tir li, *package* li met li zoli anvoy lo kontinan. E menm pour kwa pa pli lwen ankor?

So sa inovasyon, se sa landrwa kot nou bezwen ale, se sa landrwa ki Gouvernman i bezwen pou pou nou bann antreprenner. Nou annan loportinite e nou bezwen kapab atraver diplomasi Mr Speaker, atraver bann lankadremman ki'n deza ganny mete, pou nou kapab fransir sa lot frontyer.

E ler mon dir diplomasi Mr Speaker, mon krwar mon bezwen koz en pti pe lo la. Diplomasi i pou ed nou fer en kantite keksoz. Si nou kapab koz avek nou bann pei zanmi, koz ek bann pei Linyon Afriken, rod en fason kan mannyer nou fer sa perse lo nivo rezyonal e lo nivo Lafrik.

I malere Mr Speaker, ki ozordi nou pa pe war sa nivo diplomasi. Yer menm par egzanp Mr Speaker, nou'n war

kot nou'n kre en sityasyon diplomasi avek en pti Lafrik, en pei Linyon Afriken – *Nigeria*, kot nou ti kapab annan loportinite.

Demen bomaten, demen bomaten, si aköz sa *issue* diplomasi - ki mwan mon get li koman en *issue* diplomasi - i vin pli agrave, i kapab afekte loportinite antreprenner Seselwa antre dan en pei parey Nizer, - *Nigeria*, ou konpran?

So se sa bann keksoz ki Gouvernman i bezwen veye – nou bezwen travay lo tou fron. Nou bezwen veye ler ki nou fer serten desizyon dan en domenn, nou pa afekte loportinite dan en lot domenn. Ozordi si ou pou asize ou pe get bann diferan sit, Mr Speaker, ou pou war ki poudir dan bann diferan pei Lafrik ozordi, nou koz bokou lo bann dimoun ou war zot lo *Forbes list* dan Lanmerik, Lerop partou, Lazi me i osi annan *Young Entrepreneurs* Lafrik ki pe *make Forbes List*; bann *young innovative entrepreneurs* dan bann biznes teknolozi, dan bann biznes *pharmaceutical*, dan bann biznes kot zot *link* konsonmater avek *suppliers*.

So i annan bann diferan inovasyon ki pe arive e *Nigeria* i enn bann pei ki bann *top-top startups* pe sorti. *Kenya* i en legzanp kot bann *top-top*

*startups* pe sorti; Sid Afrik. So loportinite i lo Lafrik e nou bezwen kapab – i lo Lafrik i larezyon, nou bezwen kapab nou osi fer nou perse.

Si nou annan 50 ki sorti i bon menm, si nou annan plis i bon menm. So sa larises ki kre zot anmennen, zot anploy Seselwa isi, sa larises, sa larzan i tourn Sesel e *vice versa*, nou osi kapab ouver nou lekonomi avek Kontinan Lafrik, kot i annan bokou bann gro, gro lakonpanyen ozordi ki pe kre Lafrik ki pe fer biznes enternasyonalman – *ok?*

Mon pran ankor legzanp *Nigeria* Mr Speaker, kot nou annan nou en bilyonner ki fer prodwi siman *Dangote Cement*. So tousala i bann landrwa, bann loportinite ki nou kapab antre. *It's free trade, tax free*, annou tap laba annou al gete, nouvo marse.

So sa loportinite ki nou pe koz lo la, loportinite ki nou krwar nou bann *suppliers* Seselwa, nou bann konsonmater Seselwa, nou bann biznes ptipti mwayen e gro, i devret kapab annan sa bann loportinite.

So ler nou pe get sa Mosyon Mr Speaker, bokou in koz lo bann lezot aspe, mwan mon ti anvi koz lo aspe lakse avek Lafrik e pran davantaz,

pran davantaz sa *free trade area* ozordi – dayer pou en bon pe letan ti pe ganny negosye, e ozordi nou form parti, e nou bezwen fer sir nou pran lavantaz, pou kapab sot sa *next step* devlopman ekonomik.

Sot sa *next step* pou kapab fer sir ki nou biznes Seselwa – Lepep Seselwa li menm i ganny *full benefit of* sa lankadremman legal.

So avek sa Mr Speaker, mon pou aret la, me selman mon *hope* ki letan Lasanble i fer sa raport pou anvoy kot Gouvernman, Gouvernman i kapab analiz sa bout ki mon'n mete, e zot kapab pran aksyon dan sa laliny. Mersi Mr Speaker.

### **MR SPEAKER**

Mersi Onorab. Laparol prezan pou Onorab Sandy Arissol.

### **HON SANDY ARISSOL**

Mersi Mr Speaker. Bonzour tou Manm Lasanble Nasyonal e bonzour tou dimoun ki a lekout. Mr Speaker, mon rapel letan nou ti pe lekol lontan dan laklas, bann letan Mis Elaine Romain, Ms Mericide Sauzier, Mis Bertha Camille, Ms Claudia Chetty, Mrs Pierre Louis, toultan letan bann zanfan, ti pe fer move dan laklas, ouswa ti napa lentansyon aprann, Mis i

dir ek ou, ler ou napa ledikasyon, “ou kapab al plante ou! Ou pou al lapes, ou pou vin peser ou!”

E sa ti bann parol ki ti ganny dir, si ou ti napa sa nivo akademik e ou ti pe donn poum dan laklas. E la si ou ti anvi gele Mis ti dir ek ou si ou pa aprann lekol, ou pou al kantonnyen. Kantonnyen sa lepok i ti bann dimoun ki ti netway rigol, ki ti *disilt* rigol e ti netway semen.

E letan Mis i dir ou sa devan tou zanfan dan laklas, ou plere, ou gele aköz ou pa anvi vwar ou pe netway semen. Me ozordi ler nou fer letour dan bann distrik, nou get bann dimoun ki'n ganny\_kontra pou netway semen, i diferan avek letan Mis ti dir ek nou letan nou ti ankor pe lekol.

Letan mon get Bel Ombre dan mon distrik, bann dimoun ozordi ki peser, i bann dimoun ki ferme, i bann dimoun ki byen edike; bann dimoun ki biznes in agrandi.

Bann peser dan mon distrik i bann dimoun ki annan zoli lakaz, bann zoli lakour. Bann dimoun ki plante dan mon distrik zot annan zoli transpor i pa vedir ki zot bann dimoun ki pa'n fer byen.

Mon komans koumsa Mr Speaker, aköz parske keksoz in evolue; keksoz in sanze. Ozordi



ler ou vin en peser, ou vin fer en biznes, ler ou vin en fermye ou fer ou biznes, i pa vadir ki ou napa ledikasyon; ki ou pa konn konte, e ki ou pa'n fer byen lekol. Non!

I konpletman diferan avek letan nou, nou ti pe grandi e nou ti ganny sa konotasyon avek nou Mis poudir, ou pou al balye semen, akoz ou pa konn nanryen ou e ti annan bann term, ki ti vin avek ki zot ti servi e ozordi dan lekol i dir ek ou, ou napa drwa servi sa kalite term avek bann etidyan.

Me lo sa not Mr Speaker, letan nou pe koz biznes, Mosyon propoze par Onorab William, mon ti a kontan profite e felisit bann biznesmenn dan mon distrik ki pe fer byen, ki pe anploy Seselwa, ki nou annan en bo n pe biznes touristik dan mon distrik; nou annan osi bann lezot biznes.

Par egzanp, nou annan en bon group peser; mon annan dimoun ki plante parey Mr Philo anler Le Niole. E Dimans zisteman Mr Speaker, nou annan en zoli lanmes Bel Ombre, kot nou'n anmenn ansanm bann peser dan nou distrik Bel Ombre, distrik Glacis, Anse Etoile e Beau Vallon.

Nou'n anmenn zot ansanm ek bann maren,

zisteman pou nou kapab fer lanmes pour zot, Lafet *I'apostolat De La Mer* e tousala ti ganny met ansanm par Mr Albert Napier, Mrs Laurencine Nella Victor en pti komite enkli Per John dan nou parwas pou ki nou siport sa bann pti group biznesmenn ki apel bann peser.

Parske la letan nou pe koze, tou dimoun i konnen poudir nou annan leker vandswet e sa i moman letan pou bann peser dan nou distrik Bel Ombre e lo Mahe an zeneral dan Sesel an zeneral, zot ganny difikilte pou al lo lanmer parske lanmen parey nou dir pa kapa gete.

Alor Mr Speaker, se pour sa rezon ki mwan mon 'n komans avek felisit zot tou - bann dimoun ki pe fer byen dan mon distrik - bann pti biznes e mon ankouraz zot pou kontinyen pey zot *tax*, kontinyen pey zot travayer byen e rod bann *incentive* pou ankouraz lezot Seselwa kapab vin devan e pou fer byen an relasyon avek biznes ki zot pe fer.

Mr Speaker, Sesel letan mon'n swiv, i annan en tandans ki mon'n vwar kekfwa i enportan pou nou vin pli inovativ lo la. Sesel en lepok, nou tou nou ti krwar, nou tou nou tou nou kapab vin

biznesmenn. Nou tou nou kapab ouver en biznes, parski sete sa lelan, vin devan ou a ganny en sonm larzan ki ou a kapab ouver en biznes.

Alor Sesel en lepok, tou dimoun ti konverti son lakaz, pou li kapab fer en pti *guest house*, pou li akeyir detrwa touris kot li. Me malerezman, ozordi ler nou pe koze, i annan plen dimoun ki mal sanse, parski letan li in investir son pti larzan, dan konverti son lakour pou vin en landrwa pou akey touris, *COVID* in vini premyer kliyan kot son laport.

*COVID* i ouver laport, i dir ek li mon pe reste pou 2an. E ler *COVID* in reste kot li pandan 2an, i pa'n kapab pey son *bill*, i pa kapab pey son elektrik, i pa'n kapab pey son delo, i pa'n kapab pey labank sa larzan ki in pran zisteman, pou li konverti son lakaz pou vin en letablisman touristik.

E ozordi nou annan plizyer Seselwa - enkli dan mon distrik, kot sa bann dimoun ozordi zot vwar zot dan difikilte kot zot pe sey negosye avek labank, zot pe sey rod bann rekour pou zot kapab sorti dan sa difikilte ki zot in trouv zot ladan.

Alor Mr Speaker, ti annan en moman dan nou pei, kot tou dimoun ti santi poudir i kapab

larzan kot li e fer li vin en pti letablisman touristik. E la letan mon lo sa tipik, mon ti a kontan demann avek bann sekter bankye – bann banker, Gouvernman an zeneral, Minis Finans pou nou gete ki mannyer ansanm, nou kapab soutenir bann Seselwa ki'n war zot dan difikilte, apros zot, koz ek zot gete ki mannyer zot kapab rekipere

Annou donn zot serten nide me annou pa zis met zot dekote e les zot demerd zot avek zot traka. Zot bann dimoun ki ti pe fer keksoz ki byen pou Sesel zot pa'n fer biznes drog, zot pa'n vole, me zot ti anvi ede pou fer lekonomi pei bouz de lavan.

Mr Speaker, ti annan en moman letan, kot tou dimoun ti anvi annan en *H1*, en pti van pou li kapab pran 2 marmay lekol, pou li kapab sey fer en kours lanterman, pou li anmenn de pti fonksyon prive pou li kapab al sers touris lo erport ouswa lasose.

Tousala dimoun letan enn in komanse, 2 in komanse, 3 in komanse, ozordi si mon pa tronpe i annan en lasosyasyon. Ti annan en moman lepok Sesel, tou dimoun ti anvi ouver en *takeaway*, tou dimoun i anvi en *takeaway* akoz in war ou'n fer laliny in mete kas kontour ziska kot Lorloz, alor li osi in

ouver enn pou li son laliny i a kas kontour zis Moniman Trwa Zwazo.

Me souvandfwa i pa marse, alor zot kre bann group zot azout dimoun dan sa group avek bi pou ou vin aste manze kot li. In ariv en moman letan dan nou pei Mr Speaker, kot tou dimoun ti anvi vin en kontrakter, alors en zour, in vin vini 2 Nepale, 2 *Bangladeshi*, i anmenn Sesel pou li travay pou li.

Me finalman i vwar li dan difikilte parski i napa landrwa pou li met sa bann travayer i pa kapab pey son *rent*, i napa en enzenyer kalifye pou *oversee* travay sa 2 travayer, sa 3 travayer ki li in anmenn san pri, akoz li menm li, i napa okenn knowledge kontrakter me zis akoz i annan en pti finans, i ti krwar li osi i kapab fer kontrakter e la ozordi, i drwa en pe partou, partou e i vwar li pe tourn an ron.

I annan en moman letan dan nou pei Mr Speaker, tou dimoun ti anvi aste revann; tou dimoun nek i monte de sann Dubai, annan en pti kont Lasin in fer vini en kargezon anlor en zour i pas tou dimoun, i dir ou i annan rido, i annan latwal kousen, i annan lenz pou li vann.

Me difikilte ki i gannyen prezan letan Mr A i pran i paren en kargezon kredi avek li, prezan Mr A i fase avek li. I debout laba lot kote semen i zwe pa war li. Ler ou telefonn li son telefonn *cannot be reached*, prezan li i dwa labank, oubyen i dwa sa dimoun ki in pran kot i al aste-revann laba Dubai, partou pou li anmenn Sesel pou li kapab ganny son lavi.

I annan en moman letan tou dimoun ti anvi en pti van manze, parske ler i pas laba i vwar ou, ou annan en pti van dekore, ou'n met en pti lansenny alor li osi i konverti son pikep, oubyen fer vini enn sorti *Thailand* sepa ki kote, i anmenn Sesel pou li kapab li osi vann manze.

Ler i antre ek son van dan pei i napa landrwa pou mete. I pa konnen kot i pou mete, alor i al kot Mer Lavil, Mer Lavil i dir li kot *ESA*, ler i al kot *ESA*, *ESA* i dir li fodre i al kot Lanvironnman – ler i al kot Lanvironnman i telefonn *MNA*, ler i fini telefonn *MNA*, i telefonn *DA*, ler i fini telefonn *DA* i dir ek ou personn pa anvi ed li. Akoz, li osi i anvi en van manze parske li osi in deside pou li vann manze.

Mr Speaker, ti annan en moman letan dan nou pei, ti annan en group dimoun ti anvi

fer *backyard farming* parski ti annan larzan ki ti pe ganny donnen, alor i ti anvi plante kot li; i ti anvi sonny 2 koson, i ti anvi en pti kazo poul, me san realize poudir i ti pe reste dan blok flat.

E dan blok flat ou pa kapab annan *backyard farming*. Ou pa kapab sonny 2 koson, ou pa kapab annan 5 poul, ou pa kapab annan pye dibwa ki depas propriyete ou kanmarad lot kote, akoz brans dibwa i tonm kot li, ou fey i tonm kot li, ou mang mir i sali son lari.

Alor ki arive, se ki i war li dan difikilte prezan, parske i n pran en pti *loan*, prezan i pa kapab peye, akoz i napa rannman. Napa naryen ki pe arive. Alor i tourn an ron i i blanm out dimoun, i dir person pa pe ed li, personn pa get dan son *welfare* letan i dan difikilte.

E ozordi dan nou pei, i annan bokou *retail shops* li nou pa'n koz lo la. Parski tou Seselwa letan i dir ek ou letan i ouver en pti bout kot li i aranze, i dir ek ou sa i pou lwe avek en etranze – en Endyen swa en Sinwan pou fer biznes, parski si i lwe avek en Seselwa, i pou ganny difikilte pou li ganny son larzan.

Sa boug pou pey li 1 mwan, pa pou pey li 2 mwan,

oubyen donn li davans apre pa vini, oubyen zis en zour 4er bomaten i leve, i anmas tou son pake, e i ale, kit li e ale e kit li ek tou sa bann det deryer.

Mr Speaker, mon'n komans koumsa, parske sa i en pti pe revu nou pti pei Sesel an relasyon avek bann biznes. Letan Mosyon pe demande, ki an rekonesan Sesel i en pti pei, avek en marse vremen limite, Lasanble i demann Gouvernman pou fer en letid ki enplik tou sekter kle ekonomik, Sesel, avek bi pou revwar Polisi e stratezi ki a permet Sekter Prive reste soutenab e kre plis larises e lanplwa.

Problenm se ki mwan mon vwar, se ki souvandfwa nou pa vin inovativ, nou pa innovate, nou tant pou *copy and paste*. Si sa dimoun i annan sa kalite biznes, i pe fer byen, ou osi ou bezwen annan sa kalite biznes pou ou osi kapab fer byen.

Me eski ou lokasyon kot ou ete i permet ou fer byen, parey sa lokasyon sa enn ki pe fer ekstrememan byen?

Eski ou *rental* ki ou peye kot ou ete, i pou fer ou fer byen, zis parey sa enn ki pe fer ekstrememan byen ki ou'n zwenn li la?

Eski letan ou'n rod pe kre ou biznes, ou'n annan en *pool* kliyan deza ki ou'n lyez avek,

oubyen ou anvi prezan al lager ek sa group kliyan ki sa enn ki la ki'n etabli, pandan 1000an ki pe *deal son* biznes avek?

Eski travayer ki ou pe pran ozordi, pe vreman respekte, sa ki ou annan an term ou reveni, ou komodite e ou stok dan *store*, konpare avek li son bizes in agrandi e prezan son madanm, son zanfan oubyen son msye, ki pe travay avek li e zot pe konsolid e tou zot propriyete konpare avek ou, ki'n rod en etranze, oubyen zanmi oubyen vwazen ki reste o bor ou pou travay pou travay avek ou?

So, nou annan tousala pou nou etale letan, nou pe koz Polisi nou pe koz letid, pou ed nou sekter bizes kapab fer byen.

Ozordi nou annan en kantite biznes ki'n profitab dan nou pei. Nou annan en kantite biznes ki'n fer ekstrememan byen e ki'n rann lekonomi sa ki ki apartyen a lekonomi.

Me parkont, parey nou ti ganny dir dan sa menm sa Lasanble Nasyonal, nou annan plizyer biznes ki'n fer byen, ki'n sorti dan en pti laport krose ki kriye, letan ou ferm li *gronk*, pou li antre dan en laport marb ki letan i fermen ou pa tande, parske i glise trankil, me i dir ek

ou in fadt; i napa reveni, alor i pa pey *tax*.

E nou ti ganny dir dan sanmenm sa Lasanble, i annan plizyer. Alor letan nou pe koz lo sa Mosyon Mr Speaker, mon a profite, pou mwan dir avek bann biznes Sesel, ki fer byen ki zot sorti dan enn, zot al dan en lot mwayen, zot sorti dan enn mwayen zot al dan enn pli gro, pour zot pey zot *tax*. Parske sa ki ed nou, pou nou kapab soutenir lezot lenfrastruktir, soutenir dimoun dan nou pei e soutenir pei pou fer li fer pli byen, zis parey zot biznes i fer bokou byen.

E mon a osi profite, pou mwan dir mersi bann biznes ki pe fer egzaktaman sa; ki pe pey zot *tax* aler, ki pe pey zot bann travayer byen, e ki pe fer sir ki pei i benefisyé parey zot benefisyé.

Mr Speaker, letan nou pe koz lo Polisi ek stratezi, mon mazine i enportan osi pou bann dimoun ki al rod en *license*, pou fer zot biznes, pou ki i bezwen annan en kozri; i bezwen annan serten konsey, bann gidans ki ganny donner avek en endividi ki anvi fer biznes, menm i annan son larzan par egzantp

Dezyenmman, mon santi poudir labank i bezwen ensiste ki sa bann dimoun ki anvi fer

biznes, pou li fer bokou pli byen pou fer ki Sekter Prive, i reste soutenab e ki nou annan en *pti limit* marse pou ki i annan en *proper business plan* ki ganny mete ek sa dimoun, asize pou li konnen egzakteman kwa ki nou pe fer.

E trwazyenmman sa ki i mon krwar Mr Speaker, se ki sa dimoun ki fer biznes, ou pa kapab zis vini fer biznes, annan lenfrastruktir, met keksoz an plas, me labank ou menm ou, ou napa nanryen koman en biznes.

Zis mon rapel toultan Onorab Henrie ti fer resorti poudir letan ou ouver en zournal, si ou anvi fer en zournal Sesel, mon krwar i en rekomandasyon ki i bezwen annan en sonm larzan ki reste la - R100mil, kot si zanmen i annan okenn sort difamasyon ou al Ankour, ou annan sa larzan ki kapab soutenir ou.

Be bann biznes i bezwen parey, parski mon pe dir sa Mr Speaker, zis parey letan ti annan Onorab Cosgrow in koz an relasyon avek *COVID*, *COVID* ti tap nou parey in tap lemond, ou annan plizyer biznes ozordi ki ti bezwen – i dir ek ou i napa naryen. E Gouvernman in bezwen rantre pou soutenir plizyer biznes pandan en bon pe letan.

So, mon krwar i enportan poudir pou annan biznes ki pou ganny en pe difikilte, me i pou bezwen annan bann biznes ki'n la pandan plizyer lannen, ki li i kapab soutenir son lekor, enkli son bann travayer, oubyen sa ki tonm anba son responsabilite.

Mon krwar tousala i bann keksoz ki nou kapab koz lo la, letan nou pe koz lo stratezi, Polisi an relasyon avek biznes ki nou annan dan nou pei, Mr Speaker.

E mon krwar i enportan pou ki letan nou pe koze, pou ki pou nou kontinyen met lanfaz lo Seselwa, parske ozordi ler nou koz biznes, dimoun i dir ek ou dan bann biznes i annan bann etranze. Me parkont letan o ou koz avek bann *owner* biznes i dir ek ou “wi, mon pa'n anvi pran etranze mwan – mon'n anvi mon Seselwa, me selman mon Seselwa li i krwar poudir si mon annan en laferm sa bef, sa koson, sa poul, pa bwar delo dan Lendi, pa manze dan Lendi; i manz zis Mardi ziska Vandredi. Me Lendi i bezwen esper sa Seselwa ler li i deside oubyen ler i sorti kot dokter avek son papye konze, *then* i pou ganny en delo oubyen en pe manze pou li manze.”

Alor i dir ek ou, mon bezwen rod en etranze akoz

mon pa kapab kont lo li. Mon krwar i enportan pou nou letan nou pe koz lo sa Mosyon, letan nou adres sa bann size –nou koman bann Manm Lasanble, nou kontan siport nou Seselwa, lebra kase, wi. Me solman an menm tan letan nou pe siporte ki sa Seselwa i kapab prouv avek nou poudir wi nou bezwen tire sa vye moto lo nou poudir Seselwa se bann donner poum. Seselwa se bann dimoun ki pa kontan travay – nou bezwen tire sa dan nou pei. Nou bezwen tire sa tas nwanr lo nou Seselwa pou nou kontinyen dir, poudir nou Seselwa kantite debourye dan sa pei.

Kantite Seselwa i leve 5er bomaten, 4er bomaten pou al rod sa premye bis pou li al rann lapel dan son travay Mr Speaker. Nou bezwen rekonnet e aksepte sa.

E ozordi letan nou pe koz biznes, nou annan plizyer Seselwa ki'n dan plizyer lannen. Ler mon mazin konstriksiyon bann ki mon pa'n mansyonnen Herman Maria par egzant dan konstriksiyon. Herman Maria - ler Mr Maria ti pe fe rekonstriksiyon mon ti ankor zanfan ozordi mon aprann ki Mr Maria i ankor dan konstriksiyon avek son fanmir, so son biznes in grandi.

Ozordi ler nou pe kot lo bann laboutik Beau Vallon nou annan laboutik Mike, laboutik renonmen, Mike, Mike i en Seselwa i en dimoun ki asiz lo son kontwar toulezour. I ankor la dan son laboutik.

Ler mon pa bazar Sir Selwyn Clarke, i annan Jerris, fermye ki annan son laferm, an menm tan i desann ek son leti ek son bann bred i vin vann menm son laz in avanse, in tous laz sekirite sosyal, me *still* i vini parske i ankor annan kouraz lafors, pou li kapab rann en servis.

Be alors lo sa mon ti a kontan demann nou bann Seselwa, espesyalman nou bann zenn ki pe leve, parske letan bann pret ki nou annan ozordi dan legliz koman en kretyen, ler nou bann pret Seselwa i fini, nou pa war nou annan pret ankor mwan!

Parski nou deza la annan bann pret etranze ki'n antre. Bann ansennyan ki nou annan ozordi, eski letan nou bann ansennyan ki devoue, ki pe donn tou, ler zot ariv zot laz retret, eski nou annan bann lankourazman bann zenn pou monte pou pran sa karyer?

So Mr Speaker, mon lans en lapel avek mon bann frer sirtou, mon bann frer zonm – mon bann frer zonm ki annan

en mankman la deor, i annan en mankman responsabilite bann zonm. Parski letan ou pase o bor semen se bann zonm ki pe apiy *bus stop*; se mazorite bann zonm ki pe met laliny kot *methadone*.

Se mazorite bann zonm ki en *tenant* lo en *bus stop*; ki en *tenant* kot laboutik, pe demann ou si ou napa naryen a sak dimoun ki sorti, oubyen kot *takeaway* letan i sorti, se li ki la. Byen rar ou war en fanm.

Me parkont i annan bokou bann fanm Seselwa ki leve granmaten ki debourye pour son zanfan, al travay e retourn kot son lakour. Alor mwan mon pe lans en lapel avek nou bann zonm Seselwa, pou nou repran nou responsabilite, pou ki dan sa Polisi stratezi revwar pou ki i permet Sekter Prive reste soutenab, ki nou osi koman bann zonm Seselwa, nou kapab osi zwe nou rol dan sa sekter, pou ki nou anmenn en reveni kot lakour.

Mr Speaker, letan nou biznes i enportan, pou nou ankor dir avek nou bann Seselwa, ki letan sa dimoun in leve in debourye, in al aste revann, e in pas kot ou e in pran en pti kredi ek li, pey li son larzan. Pa fer li kriy ou dan lanons ek masaz dan lanons

6.30 oubyen met ou lo rezo sosyal.

Letan sa Seselwa Mr Speaker, i vin kot sa madanm ki'n pran son retret e in azout en pti bout lasanm akoz i anvi en pti reveni ankor pou met lo son Sekirite Sosyal, e ou, ou vini ou lwe son lasanm, son lakaz, ou pa pey li! Pey li son akomodasyon ki ou'n reste. Ou bezwen pey li.

Tousala i form parti sa bann stratezi e Polisi pou asire ki Sekter Prive i reste soutenab, pou li lanplwa i ganny kree, larzan i rantre dan lekonomi pei e sa dimoun ki'n fer – ki'n rod son pti *loan*, i kapab soutenir.

E en pli gro lapel ki mon kapab fer, se pou Seselwa vin devan e travay. Seselwa i travay. E mon kontan letan Gouvernman pe fer son bout, parske *Regatta site* byento, parey sa pti plan ki'n ganny montre byento plizyer bann pti biznes pou benefisy e Beau Vallon dan distrik Onorab John Hoareau pou li Armantal Lespoir ki son non ti ganny mansyonnen dan Lasanble Nasyonal - enn mon kousen prop, i ava travay li osi si i swiv bann prosedir nesaser, i ava kapab benefisy koman en zabitan Beau Vallon dan sa bann loportinite ki Gouvernman pe met devan.



Mon kontan Gouvernman pou annan en plan ankor kot *ex-Playground* pou ki bann lezot biznes a kapab benefisye e la mon kontan letan sa enn ti fer plis tapaz dan *interview*, li in benefisye anba *Library* Nasyonal, pou li kapab fer son biznes. I enportan sa – nou war person pa'n poste nanryen lo la. I enportan sa.

So mon kontan letan Gouvernman pe fer son bout pou asire ki bann pti biznes i kapab bouz de lavan menm zot vini zot fer kritik, me selman i annan en keksoz i ganny fer pou zot.

E mon kontan letan mon Gouvernman i kontinyen fer biznes avek bann pei aletranze, pou ou annan sa lakor zis parey Onorab Wallace pe rod lakor avek Nizeryen. Mon dakor avek sa mwan. Nou pou kontinyen fer biznes avek Nizeryen – nou pou kontinyen fer biznes avek Sinwan, nou pou kontinyen fer bizes avek Morisyen - byen. Selman nou pou fer biznes – biznes prop; biznes prop kot tou lede pei i benefisye.

E nou pa pou fer zis avek Nizeryen, nou pou fer avek tou pei ki enterese, fer biznes avek nou. Zis parey nou ouver nou por, nou ouver nou erport avek tou etranze dan lemonn pou vini, vin *enjoy* nou bann lans,

vin *enjoy* pran nou bann zoli ler soley ki nou annan; vin manz nou zoli pwason; vini vin dan nou pei fer sa ki byen, e nou osi nou a ganny loportinite pou nou v in en kou dan zot pei, pou nou fer sa ki byen.

Parski zot, zot annan zot Lalwa e nou, nou annan nou annan sa ki pou nou. E nou, nou pou kontinyen annan sa lesanz e nou kontan letan Onorab Wallace in siport sa poudir Sesel nou kontinyen annan bann lesanz e mwan osi mon pou siporte pou ki pei i benefisye avek biznes, pou ki bann sekter kle dan lekonomi Sesel avek bi pou zot kapab revwar Polisi avek stratezi ki a permet tou Sekter Prive reste soutenab e kre plis larises e lanplwa, Mr Speaker. Lanplwa i enportan.

Larises i vin avek lanplwa li; si ou pa travay ou pa ekspekte ganny larises. Pou ou ganny larises an plis larzan dan pos, ou bezwen al travay. Premye pa se, desann al travay; ou ganny en lanplwa, pou ou ganny promosyon, ou fer *extra time*, ou fer *extra hours* ou ganny bann benefis 13enm mwan, ou ganny lezot keksoz sa i bann larises ki vin avek, bann travayer ki leve e debourye. Me zis asiz dan lakour pa pou aport ou lanplwa.

Alor mon krwar Mosyon in en moman apropiye, letan tou keksoz pe ganny transformen, letan tou keksoz pe ganny revwar, li osi i ava tonm ansanm pou asire ki pei i fer byen, nasyonalmann e osi enternasyonalmann; an relasyon avek bann biznes pou ki tou bann Seselwa ki pe debourye.

E la letan mon aprann i annan en kantite biznes ki pe anrezistre – en kantite dimoun ki anvi vin devan pou zot swa agrandi zot biznes elarzi zot biznes. I annan menm ki pe mazin al aletranze, so tousala i permet ki ozordi Mr Speaker, e mon siport tousala e mon ankouraz tou Seselwa pou zot kapab fer kantite ki zot kapab, parski sa i benefis ki fer pei benefisyé, lezot dimoun i kapab benefisyé e ou ki dan sa biznes osi, ou agrandi e ou anmas larises koman sa biznesmenn ki ti anvi bouze.

E letan mon lo la Mr Speaker, mon ti a kontan profite, pou ankor enn fwa remersi bann Seselwa ki fer byen e ki pe kre lekonomi e pe met larzan dan pei, pou asire ki pei i fer bokou pli byen a lavenir konpran avek letan nou'n vini.

Mr Speaker, avek sa mon ti kontan prezan mon sipor avek Mosyon Onorab William en swete ki tou lezot Manm osi

zot koz lo la, aport zot sipor ed nou vote pou ki sa Mosyon i pase. Mersi bokou Mr Speaker.

**(APPLAUSE)**

**MR SPEAKER**

Mersi Onorab. Mon a donn laparol Onorab Desheila Bastienne.

**HON DESHEILA BASTIENNE**

Mersi Mr Speaker. Bonzour Mr Speaker. Bonzour tou koleg Onorab. Bonzour tou dimoun a lekout e en bonzour spesyal pou zabitan Perseverance.

Mr Speaker, permet mwan felisit Onorab William pou sa Mosyon ki i pe demann avek Gouvernman, pou fer en letid ki enplik tou sekter kle ekonomik Sesel, avek bi pou revwar Polisi e stratezi ki a permet Sekter Prive reste soutenab e kre plis larises e osi lanplwa.

Mr Speaker, i tre enportan ki dan Sekter Prive, gran, mwayen, pti, ki nou gard zot for, soutenab e osi profitab, aköz Sekter Prive i zwe en gran rol e zot kontribisyon i annan en lenpak tre enportan dan lekonomi nou pei.

Ler nou koz *ease of doing business*, nou bezwen pran kont ki Sesel i en pti pei e i enportan ki nou kree en klima biznes tre favorab, retir tou

bann lanpayaz ki kre retar; parey pou par egzanp kot ou *apply* en pti *loan*, kot ou ankor bezwen ranpli 10 form.

E osi nou pou demande ki i enportan ki nou redwir bann baryer administrativ ki anpes biznes bouze e progrese.

Mr Speaker, dan Sesel biznesmenn - e la mon pou ankadre tou dimoun ki fer biznes tel ki bann msye e osi bann madanm, ki leve e fer sa pou kree zot biznes avek lanmour e avek en bi pou kontinyen agrandi e prospere. E osi avek en rev ki sa biznes i kontinyen dan lafanmir pou le fitir, apre ki zot, zot in ale.

Mr Speaker, i osi enportan ki Gouvernman i montre sa lentere pou siport Sekter Prive dan diferan fason posib. Pou biznes prospere i vreman enportan ki nou adopte seryezman sa stratezi *ease of doing business*, pou ankouraz plis devlopman kontinyel ki pou amenn lefe pozitif dan lekonomi nou pei.

E sa i tel ki; donn sa bon lankourazman, fasilite e ouver laport bann endividi ki vin devan pou komans en biznes, e siport zot avek bann bon lenformasyon pou anpes zot vir an ron e dekouraze.

Mr Speaker, i osi enportan i annan bann konsiltasyon pli

souvan, pran kont bann konsern ki kre baryer, idantifye mezir ek nouvo fason fer pou amelyor zot travay toulezour; onor nou langazman e an menm tan, donn zot sa lasirans ki Gouvernman i pare pou siport zot, vi ki zot deza pe kontribye dan lekonomi nou pei.

Mr Speaker, letan nou mazin nou bann artizan ki pe travay kot zot lakour, anba zot lavarang, pe servi zot salon, dan zot lari; ler nou mazin tel parey Mr Guy Sabury bann travay eksepsyonnèl, bann nouvo dekouver tel ki, travay avek lalyann anvaisan ki nou ti konsider li koman bann plant danzere pou lanatir.

Ozordi nou prop Seselwa, i montre nou ki mannyer nou kapab transform en tel plant dan en pli zoli prodwi.

Letan nou mazin osi Mr Jules Ernesta ki fabrik bann zoli tanbour Moutya ki'n ariv lo la senn enternasyonal. In kit son mark dan Expo 2020 *Dubai* e menm sorti avek en pri.

Bann dimoun ki pe fer sa bon konfitir avek tou sa fri lokal ki egziste dan nou pei Sesel, e plizyer lezot prodwi ankor, sa bann tel *business persons* Mr Speaker, i bezwen sa sipor, lankourazman e pli bon fasilite pou zot arive kontinyen elev zot

travay e gard li a laoter. E osi atrakte nou bann zenn pou devlop lentere dan sa biznes, e pou gard sa tradisyon.

Mr Speaker, pou bann tel biznes reste soutenab, i osi enportan ki akse avek finans i vin en priyorite osi.

Revizyon dan peyman e osi entrodwir bann nouvo *loans* bann *scheme*, ek revizyon lo bann to lentere, pou serten kalite biznes. Etabli bann bon kondisyon ek relasyon avek bann labank, konsernan fasilite *overdraft*, e sa ava ankouraz divertisman biznes e plis konpetisyon.

Mr Speaker, nou bezwen pran kont ki biznes ki soutenab e an bonn sante, i ede kre plis larises, plis lanplwa e redwir problemn sosyal. I osi enportan ki fodre pa ki nou gaspiy letan en dimoun ki anvi bouze. Letan i koute Mr Speaker.

Nou tou nou bezwen zwe nou rol nou osi, pou ki nou demen, nou a santi nou fyer pou nou rol ki nou'n zwe pou ed en nenport endividi bouze e sirmont bann difikilte. Fodre pa ki nou kit tou lo zepol Gouvernman.

Nou osi parey loter Mosyon in mansyonnen, nou bezwen zet en regar dan nou distrik, kot nou osi nou kapab

aport nou sipor dan en fason posib.

Mr Speaker, parey ankor loter Mosyon ti mansyonnen komansman son lentervansyon, ozordi bokou pti biznes ankor, tel ki, enstriker dray, *omnibus*, *taxi*, fermye, zot ankor pe *struggle* pou zot reste an operasyonnel pou kontinyen bouz devan.

E i enportan ki nou rekonnet ki sa bann tel pti biznes, i bezwen tou sipor posib e zot osi alor, i enportan pou angaz dan bann rankont avek zot.

Pran kont zot bann konsern; siport zot atraver bann fasilite, pou ed zot elev zot standar zot biznes e reste soutenab.

Mr Speaker, i enportan ki nou kontinyen promot e ankouraz bann biznes, pou kontinyen kre larises dan nou pei, e osi ede kre bokou lanplwa.

Mr Speaker, avek sa 2 mo, mon pou donn Onorab William mon sipor pou sa Mosyon, e mon pou siport sa Mosyon. E mon demande osi ki mon bann ser ek frer Onorab i donn li menm sipor. Mersi.

**(APPLAUSE)**

**MR SPEAKER**

Mers Onorab. Mon a donn laparol Onorab Flory Larue.

### **HON FLORY LARUE**

Mersi Mr Speaker. Bonn apre midi Mr Speaker. Bonn apre midi tou Manm e tou dimoun dan lakour.

Mr Speaker, en kantite in ganny dir ki pozitiv ziska prezan lo sa Mosyon. E mon krwar avek sa tranzisyon ki nou'n pas ladan, sorti koman en Gouvernman ki'n zwenn *COVID* e kot nou lekonomi in ganny tape for, nou vwar ki i en bon letan pou nou koman en Lasanble, adres lenkyetid kominote biznes, anmezir ki zot regard dan le fitir.

Nou'n tann serten Manm ki'n koz lo bann difikilte, sirtou difikilte ki bann dimoun ki pe antre dan biznes i gannyen pou tenir en *license*. Me sa i kapab ganny ankadre dan sa ki toultan nou tann dir en *One-Stop shop*.

Mr Speaker, pou en biznes ganny en *license* isi Sesel, in toultan formalite pei pou fer en biznes, ou bezwen annan en *license*. I vreman difisil pou konpran ki letan nou anmenn en Mosyon ki telman adres globalite problem ekonomik, ki biznes pe fer fas avek, e kot Gouvernman pe sey rod bann solisyon pou biznes, kot nou

ganny en Manm lo lot kote latab, ki sorti dan ansyen Gouvernman, vin met serten defi ki nou pe rankontre, me ki sorti dan listwar Gouvernman pei, i pa montre ki nou pe konstri bann keksoz pozitiv, pou fer lekonomi pei kot nou tou nou benefisye bouz devan.

En *One-Stop shop* pou bann fasilite biznes, i met keksoz ki nou'n tann koz lo la pou plizyer lannen Mr Speaker. E mon krwar si i annan en Gouvernman ki pe met plis zefor pou fer sa arive, se nou Gouvernman ozordi, se en Gouvernman *LDS*.

Defi ki nou pe rankontre Mr Speaker, i sa ki nou pe koz lo la lo kote *COVID*. Letan en Gouvernman i pas atraver en defi, kot parey Onorab Arissol in mansyonnen, nou koman en pei, nou'n met nou bann plan devan.

Koman en nouvo Gouvernman ki'n vin o pouvwar an 2020, nou'n vwar *COVID* in tap nou laport e in reste pou 2an Mr Speaker.

Fodre pa kominote biznes e pei e sa Lasanble i bliye, ki nou laport ti fermen, avyon ti aret apoze, e nou ti dan en kantite lensertitid. E la ki sa in reouver, Gouvernman pe met tou zefor pou sey fer larou ekonomik bouze.

E mon bezwen felisit Onorab William, pou li anmenn sa konversasyon kot nou ozordi dan Lasanble, pou nou koman bann Manm donn sipor e donn bann nide, pou kapab debous serten fason fer dan biznes e lekonomi.

Dan Mosyon, nou vwar kot Onorab William i demande ki Lasanble i demann Gouvernman, pou revwar Polisi e stratezi, pou soutenir Sekter Prive. E koman en Gouvernman, nou'n dir ki en Gouvernman i bezwen vin en fasilitater biznes.

Alor Gouvernman i bezwen met tou son bann lenerzi ansanm, pou kre sa bann loportinite, pou regard nouvo stratezi e sirtou pou travay avek nouvo Polisi.

Mr Speaker, nou bezwen osi par kont aksepte ki nou annan serten defi. Ler nou koz lo Polisi e stratezi e serten lot kote latab in koz limitasyon lo grander lespri, ouswa bann *achievement* ki Gouvernman i met devan kekfw i limite, nou bezwen osi regard nou abilite.

Dan en biznes, pe enport ki biznes ki ou fer, peser, planter, ouswa ou en avoka, ou bezwen annan abilite dan sa keksoz ki pou pe fer, swa i atraver letid, swa atraver leksperyans.

Gouvernans en pei ki antren tou an *civil service* i bezwen annan dimoun avek abilite e la nou pe koz abilite *academic as well as* leksperyans. Me solman i annan serten teknikalite ki nou bezwen ranforsi lo la.

E souvan letan nou fer Bidze, nou tande ki i manke serten dimoun avek abilite spesifik ouswa kalifikasyon spesifik, ki nou bezwen dan bann sekter pou nou kapab devlop bann keksoz pli stratezik, tek ki Polisi e stratezi.

Souvan nou'n vwar Mr Speaker, Polisi pei i ganny ekri i ganny prezante an nwanr e blan. Me konbyen fwa ki letan nou regarde, ozordi, ki - mwan mon'n dan Lasanble 2016 souvan letan nou pe konpar Polisi e *achievement* sa bann Polisi, atraver bann stratezi, souvan ti enn bann pli gran defi pei.

Nou pa kapab anmezir ki nou pe demande ki nou siport Sekter Prive pou li menm li elev son standar san ki nou menm nou, nou pa regard bann loportinite, oubyen bann abilite ki nou annan ouswa devlop nou dimoun pou zot kapab ganny plis abilite pou anmenn sa sipor pou Sekter Prive.

Mr Speaker, letan deba in devlope, nou'n osi vwar nou'n

tan dir ki Sesel i 100tyenm lo sa latab, lo kote *ease of doing business*. Letan nou regard nou klasman - e la mon pe regard en klasman i 2020, e Sesel i ganny deklare 100tyenm pou 2020 Mr Speaker.

E an 2019 i ti 96, son pozisyon ti 96. Me par kont Mr Speaker, lo sa latab ki mon pe regarde, i komans lo klasifikasyon lo depi lannen 2007 e nou vwar an 2007, nou ti lo en klasman 84. Me par kont Mr Speaker, an 2009 nou ti ariv 1004 - 1004riyenm e an 2010 nou ti ariv 1011enm.

Alor lo sa latab i montre ki nou'n annan diferan pozisyon atraver letan. Me, si la an 2023, zis 2an edmi apre ki nou'n pran gouvrenans pei avek 2an COVID kot mwan mon gete, nou pe devret pe kont li vremen, Mr Speaker, eski sa klasifikasyon i reprezant loubraz ki Gouvernman pe fer ozordi, ouswa si i pa en kontinyasyon sa ki ti'n deza ganny fer?

Ki fer ki nou kapab zis *improve to get better*. Me solman letan nou fer nou deba, fodre nou veye letan nou pran blanm e nou met devan en laport, nou bezwen get byen kote sa blanm i sorti Mr Speaker. Akoz i tro fasil pou aport blanm apre 2an edmi lo nou Gouvernman letan i annan enn ki'n la pou 43an.

Nou tann nonm difikilte ki biznes i gannyen, Sekter Prive i gannyen pou devlope Mr Speaker e enn bann defi pli enportan se akse avek later. Nou vwar ki Gouvernman dan lepase, in investir dan later konble, Mr Speaker.

Later konble Mr Speaker, mon ti a kontan refer Seselwa mazine, i pa sorti dan pos en ansyen Prezidan - pa li ki'n peye, i pa en keksoz ki nou'n ganny kado, me i en devlopman kot tou Seselwa ki pey *tax* ti bezwen met son kontribisyon pou li pey sa det ki pei ti pran, pou fer later konblaz.

Mr Speaker, dan premye faz later konblaz, kot i annan Stad Linite, Roche Caiman, an montan, nou vwar ki dan sa bann landrwa, menm si i annan serten devlopman pozitiv, menm in annan bokou later ki'n ganny donneren avek zanmi.

Sa later menm si ti ganny fer pou devlopman biznes prive, nou'n vwar ki in tonm dan lanmenm en ptipti group Mr Speaker.

Menm bann landrwa kot Gouvernman in fer devlopman pou biznes, tel ki Providence, ozordi nou vwar Minis Devika in vin eksplik nou sa kantite defi ki biznes i annan, ki fer li difisil pou zot agrandi zot biznes, komansman avek bann drenaz,

bann later ki dimoun pa pe devlope, ouswa ki'n ganny vann ek zanmi me mannyer zot kontra i ete, i difisil pou Gouvernman reaksed sa bann later.

Tou sa bann keksoz Mr Speaker, i fer ki serten bann difikilte ki Manm lo lot kote latab in dir, biznes dan Sekter Prive i vwar zot fer fas avek, se akoz bann sityasyon ki ti'n deza ganny etabli, ki nou, nou pa kapab *solve*; nou'n vin zwenn la e prezan i reste koumsa Mr Speaker.

Sa bann keksoz i fermal pou aksepté, me i larealite. E se Sekter Prive ki vwar li bezwen viv ek sa konsekans, kot nou bezwen pran en pti gin later prezan ki annan, sey regarde e ki nou pou donner.

Mr Speaker, Ile Eve, en lot later konble, ki nou, ki'n met lenfrastruktir lo la, pou kapab komans son demaraz pou fer devlopman pou li vin en landrwa kot Sekter Prive i kapab fer biznes.

Mr Speaker, Ile Soley, en moniman ki'n peye avek larzan *tax*. En devlopman ki ti sipoze vin reisi depi 2020, nou pe trouv nou avek en kantite difikilte. Lekel ki ganny afekte Mr Speaker? Se sa dimoun ki li li i pe rod loportinite pou li kapab fer en devlopman biznes,

me i pa kapab, akoz tou sa bann keksoz i anmare - i annan bann problem legal, e zot pa kapab ganny akse avek later.

Mr Speaker, nou'n ganny dir ki marse lokal i ptipti e dimoun i bezwen get loportinite enternasyonal. Ki vre, i annan sa loportinite. Me Mr Speaker, ou bezwen ariv serten groser, e en serten grander. E la mon ti a kontan osi felisit en biznes parey *Takamaka Bay*, ki li in agrandi lo nivo enternasyonal.

Me par kont koman en legzanp, nou bezwen vwar ki sa biznes li, in asosye li atraver bann lakor ek bann *partnership* avek lezot lenvestiser.

E souvan en biznes ki pou kapab grandi, souvan nou war li i bezwen rod sa *partnership* ouswa sa lenvestiser pou investi dan son biznes. E sa mon krwar i en baryer ki Seselwa i bezwen osi kapab remet dan zot kiltir, pou zot investir dan en biznes ki pe marse, pou soutenir li pou li kapab grandi, ki vin en lot form lenvestisman, ki souvan lo kote banker i difisil pou aksede ou tousel.

Alor mon ti a kontan profit lokasyon, pou sey demann Sekter Biznes Prive, pou travay ansanm an kolaborasyon ansanm ki a kapab agrandi e ki



anmenn larises pou tou dimoun ki *involve*.

Me annou retourn lo *market* lokal. Nou annan nou *market* popilasyon ki 100mil dimoun me annou pa bliye Mr Speaker, ki lannen pase, nou ti annan nou 362mil viziter pandan lannen 2022 e sa i sipoze agrandi.

Menm si i en sekter ki anmenn bokou risk, ki *COVID* in montre nou ki letan nou fer lenvestisman dan sa sekter, ki en sel kou nou kapab vwar sa ganny retire.

Me par kont, diversifikasyon i enn bann keksoz ki sa Gouvernman pe demann pep Seselwa, ki anvi envestir dan en biznes, pou sey regarde, ki mannyer zot kapab anmenn diversifikasyon dan bann opsyon. Olye ki zot kopye en dimuon ki letan i fer en keksoz, annou rode avek nou *skill* e nou abilite ki nou annan deza, ki mannyer nou kapab anmenn en keksoz nouvo, olye al kopi en dimoun. Akoz i *saturate* sa *market*.

E apre i annan sa kote standar. Si en dimoun i fer sa keksoz byen, me ou, ou napa sa leksperyans, get ou lekor e regarde kwa ki ou kapab anmenn, ki diferan avek en biznes. Sa i a kapab anmenn en

pli bon benefis pou nou sekter ekonomik.

Mr Speaker, Mosyon in osi met lanfaz ki Sekter Lapes e Sekter Lagrikiltir i en sekter ki ozordi nou pe sey donn li en kantite sipor. Me par kont pou kapab vin en pli gran fermye, ou en pli gran peser, i vre ki ozordi sa bann kalite domenn, i annan en serten nivo teknikalite avek li, ki demann en serten lanfaz dan ledikasyon.

Alor olye zis vin en avoka, *accountant*, ek dokter, mon ti a kontan osi ankouraz bann zenn pou antre dan sa sekter akademik pou peser, e fermye e bann lezot teknisyen ki tonm anba sa bann *field*, pou kapab ankor asiste sa domenn en anmenn pou li pli o e pou li grandi.

E lo sa dernyen not Mr Speaker, en nide ki mon ti a kontan met devan, i ki nou bann prodwi lokal, lefe ki li fer fas direk avek lenportasyon, ki fer ki souvan akoz sa *scale* ki sa bann dimoun pe fer biznes ladan, i vwar ki souvan son pri i pli o ki sa ki pe ganny enporte.

E la mon ti a kontan ankouraz Gouvernman, pou regard en *label* – en *label* ki kapab annan son bann *requirements*, pou kapab ganny sa *label*. E ki a fer ki letan en dimoun i antre dan en magazen

pou aste en prodwi manze a labaz lagrikiltir; *livestock* ouswa lo kote *farming*, ou pou kapab klerman idantifye ki sa prodwi i en prodwi lokal, e ou pou kapab konnen ki i kontyen ladan;

Ki fer ki i a donn li sa sipor Gouvernman pou montre pep Seselwa, ki kekfw a i pli bon pou ou lasante e ou kapab fer en pli bon *choix* pou lekonomi si ou kapab pou aste sa prodwi.

So mon krwar en fason *labelling of* prodwi ki fer lokal sirtou dan sekter manze. La nou annan nou dimyel - mon vwar lo *market* ki serten dimoun pe regard dile; dile kabri, dile bef i bann prodwi li nou bezwen regarde ki mannyer nou menm nou, nou kapab sey soutenir nou pep, atraver sa ki nou kapab devlope lo kote lagrikiltir e lapes.

E avek sa Mr Speaker, mon ti a kontan dir Onorab William, ki mon pou anmenn sipor pou sa Mosyon. Mersi.

**(APPLAUSE)**

### **MR SPEAKER**

Mersi Onorab pou ou lentervansyon. Mon krwar in ariv ler pou nou pran poz la. An konsiderasyon pou bann komite ki pe zwenn, e sirtou mon bann koleg lo *Assembly Business Committee*, kot nou

annan responsabilite pou prepar *Order Paper* pou semenn prosenn, mon pe met retour pou Lasanble 2:15 pou donn nou en pti pe plis letan ki nou pou bezwen. Mersi, nou a pran poz.

**(BREAK)**

### **MR SPEAKER**

Bonn apre midi tou dimoun. Nou a rebran lo deba. E nou'n ariv lo Onorab Richard Labrosse. Richard Labrosse ou annan laparol.

### **HON RICHARD LABROSSE**

Mersi Mr Speaker. Bonn apre midi Mr Speaker; bonn apre midi tou bann Manm isi dan Lasanble. Bonn apre midi spesyal byensir pou bann zabitan Plaisance e tou lezot dimoun ki a lekout.

Mr Speaker, Mosyon ki devan ou ozordi, zis mon relir li, pou donn en pti pe plis - pou fer dimuon konpran ki nou pe koz lo la ozordi. I dir;

An rekonesan ki Sesel i en pti pei avek en marse vreman limite, Lasanble i demann Gouvernman pou fer en letid ki enplik tou sekter kle lekonomi Sesel, avek bi pou revwar Polisi e stratezi ki a permet Sekter Prive reste soutenab e kre plis larises ek lanplwa.

Mr Speaker, Mosyon devan nou, mon totalman war son lenportans kot pei pe ale. Plizyer konversasyon in devan ganny fer. Mon krwar la ansanm, nou merit war kote nou pou komanse e kote nou kapab arrive. Fer biznes dan en pti pei parey, i touzour annan en diferan defi ki vini avek ki bann *business person* i rankontre.

Espesyalman ler sa bann ti pei i reste lo en laspe kiltirel, kot zot oule prodwi bann keksoz ek valer azoute lo la, kot konpetisyon i vin ek bann ki le fer keksoz pli fasil,

Par egzanp la nou konnen ki i annan bann dimoun ki kontan par egzanp enport bann keksoz, me selman parey nou dir, zot pa kapab emit bann keksoz lokal ki nou annan.

Par egzanp nou konnen bann dimoun ki fer bann pti lobze artizanal parey bann pti *key ring coco de mer*, pti torti eksetera ki ti annan koze deor ki en serten letan fer vini sa, e zot ti pe vann li. E sa mon ti war li, ki zot ti pe sey rod en fason en pti pe pli fasil pou fer.

En domenn ki mon ti anvi koz lo la en pti pe Mr Speaker, i nou sekter finansyel ki mon war i ankor pe devlope avek bann diferan prodwi. Sesel dan lepase parey tou dimoun i

konnen, nou ti vremen popiler e renonmen ek nou bann prodwi *IBC*. *IBC* an Angle i apel *International Business Company*, kot Sesel ti pe fer telman byen par lannen. E sa dan li menm ti pe anmenn en gran reveni pou lekonomi pei. E isi dan li menm i pe kre plizyer lanplwa pou bann dimoun.

E menm Sesel in fer plizyer travay osi dan sa domenn, kot nou'n amelyor plizyer Lalwa ki'n ganny amande parey nou dir, pou modifye li pou vin dan sa lemond ozordi, ki sa biznes li menm pe ganny *operate*.

E sa dan en sans Mr Speaker, in fer li vin pli *compliant* parey nou dir. E menm ler Sesel pe fer tre byen dan sa biznes, zis parey mon'n dir anler, ki koman en pti leta zil, nou pti pei nou vilnerab parfwa, ler nou annan bann gran pwisans osi dan lemond, ki annan bann gran lekonomi, kot la parfwa zot kontan enpoz detrwa keksoz lo nou; parfwa i pa neserman keksoz ki 100poursan mal oubyen 100poursan byen.

E parey mon'n dir ankor i bann lamannman, pou fer li vin parey bann biznes ozordi. E sa bann pei plizyer fwa zot demann diferan kondisyon avek nou. Kot parfwa i annan menm

– bann sanksyon ki zot ganny mete lo Sesel. Par egzantp nou tande ki Sesel detrwa letan ti lo bann Lalis Nwanr. E la mon krwar an se moman ki mon pe koze, i annan bann travay ki pe fer.

E ti osi annan bann menas, kot pei li menm ti pou perdi serten *correspondent bank* e kot sa li menm dan li menm i en keksoz ki mon krwar i tous - pa zis bann biznessmenn, me lamazorite dimoun. E vwala kot parfwa kot nou bezwen fer sir ki ler nou pe antre dan biznes osi, ki tou ou zafer i anba kontrol; tou keksoz i byen, tou bann norm ki nou annan ek bann Lalwa osi, i vin drwat parey nou dir.

Ler nou pe koz lo fer Sekter Prive vin pli soutenab, kot i anmenn larises, e osi kre lanplwa, wi Mr Speaker, sekter finansyel in kre en ta loportinite.

La mon mazin bann biro ki zot servi isi; i osi anmenn bann biznes kot bann *landlord* i kapab anmas en reveni, kot i annan bann dimoun kekfwa ki ti angaze avek bann servis transportasyon, ki bann lazans zot menm zot pe fer.

La i osi annan servis kot nou bezwen pey bann kourye, *fees* – kot *DHL* ek bann lezot lakonpanyen i antre, Lakour

Mazistra osi i annan son bout ladan ki i anmase. E sa dan li menm ou vwar ki mannyer sa sekter li menm in ouver, kot in prodwi osi diferan larises lanplwa pou pei li menm dan li menm.

Kestyon ki nou demande, eski nou annan - parfwa en kestyon ki nou demande, sirtou ler nou pe get dan nou bann prodwi finansyel ki vin diferan konmela, nou annan bann nouvo prodwi ki pe ganny met lo letazer.

Par egzantp *securities dealers*. La nou pe koz lo *Fintech* osi ki pe antre byento. E kestyon ki bokou dimoun i demande, eski nou annan ase mandev Seselwa pou antre dan sa domenn, e ki zot osi zot avan benefisye ek bann larises ki sa sekter li menm i anmennen.

Mr Speaker, sa zafer devlop mendev dan pei, i en keksoz ki depi mon'n vin dan sa pozisyon mon ankor pe koz lo la, kot mon krwar i merit annan en travay ki merit ganny fer. Sirtou ler nou pe koz lo bann profesyon ki Sesel i demande.

Rezon ki mon pe get sa, ler nou pe get bann travay ki pei i demande, parfwa ou demande si i annan bann travay ki ti ganny fer oparavan, ouswa kek konversasyon ki ti ganny fer oparavan, kot i annan bann

serten mendev dan pei li menm ki nou santi ki i ankor reste en mank. Menm parfwa nou pe koz lo nou pe fer etranze, vini pou ranplase.

Zis par egzanp, mon kapab donn ou en legzanp la, ler nou pe koz lo bann dimoun; i annan bann biznesmenn *actually* ki kekfwa zot in aste en kare later pou fer kek devlopman lo la.

Ouswa menm ki kek dimoun prive menm, nou vwar ki menm *surveyor* dan Gouvernman mon krwar ki la i annan mank osi ler mon santi. Akoz parfwa i annan bann dimoun kekfwa ki vin kot nou ki vin konplent - i annan bann dokiman ki zot in met laba pou sepa konbyen letan.

So ler nou pe koz *the ease of doing business*, mon krwar i en konversasyon ki al pli gran ki nou pe koze, oubyen pli gran ki sa parey nou dir.

Mr Speaker, mon pou toultan dir ki, bann zenn i byensir ki sa bann konversasyon parey ozordi, i merit ganny fer a tre zennaz, sirtou ler bann etidyan i ankor dan lekòl, zot ankor pe swazir en karyer. E la mon ti a kontan ki Minis Ledikasyon ansanm avek bann dimoun ki dan bann domenn *curriculum* dan sa Minister; nou osi mon krwar

nou merit pe vwar en pe *curriculum* ki lekòl pe montre ozordi.

E osi asiz ansanm kekfwa ek sa bann etidyan, pou sey vwar en pe; pou sey vwar en pe zot laspirasyon osi i trez enportan, ler nou pe fer bann desizyon ki pou konsern zot.

E ler nou pe koz osi lo karyer, kot zot oule vini demen zot war ki Sesel – nou a war zot pe okip plis bann plas dan pei – bann plas biznes, bann dirizan dan pei ki sa bann kalite biznes i demande.

Sirtou la osi ki bann – ler nou pe koz lo ledikasyon osi, bann pos-segonder. Nou osi nou konnen ki i annan lekòl Letid Biznes konmela, ler nou pe koz lo sa konversasyon, ler nou pe koz lo *curriculum* pou revwar.

E le mon krwar ki Letid Biznes, zot kapab osi dan en moman osi – mon pa konnen si zot pou fer li - akoz mon pa tro tann li dan media, kot zot kapab vin en pe pli ouver ek bann lezot biznes ki annan dan pei.

Konmsi revwar en pe ki kalite biznes ki an demann dan pei; kalite resours - *human resources* parey nou dir nou pou bezwen pou enterakte dan sa bann kalite form parti biznes ki nou pe anmennen, akoz

menm parfwa la, konmela ki nou ankor pe koze, nou ankor *still* pe vwar bann - menm bann *vacancy* ki annan pou fer avek biznes, ouswa bann direksyon pou bann direksyon i *still* bann kalifikasyon ki pe demande parfwa, mon pe mazin ki menm nou pa ankor pe mazin lo la.

E se pour sa rezon ki mon pe dir la, i le moman osi kot bann pos-segonder, e zot zwenn ansanm ek Minister Ledikasyon e idantifye bann lezot partener, komans en konversasyon lo la, ki nou ava fer sir osi nou an bonn sante lo kote bann dirizan ki Sesel pe demande.

Mr Speaker, pa tro lontan nou'n sibir en malad ki zanmen okenn de nou ti kapab mazin si en zour dan lemond ti pou arive sa, se byensir fame *COVID-19*, ki'n fer ki en bon pe keksoz in sanze ler sa malad ti arive.

Travay kot lakour ti vin en nouvo vokabiler, kot ler ou ti pe ganny demande pou reste kot ou, travay kot ou e la kot plizyer tranzaksyon - parey nou dir - vertyel ti ganny fer.

Menm sistenm peyman osi, sa bann letan, ler ti annan bann restriksyon dimoun pa ti kapab sorti. E ti annan bann fason kot dimoun ti servi pou zot kapab fer bann peyman, kot

bann biznes zot menm ti kapab kontinyen *operate*.

E menm ler nou pe get parey mon pe koz lo sekter finansyel li menm sa bann letan, tou keksoz ti bezwen vwar li rod en lot fason pou zot fer li; kot menm biro ti bezwen fermen, kot - parey mon pe dir - kot nou pe koz *virtual bill* ki ti pe ganny fer, ler nou pe dir sa kot bann peyman ti pe ganny fer.

Kot bann dokiman li menm, mon krwar ou ti bezwen vwar ou pe fizikalman pe deplase; kot la ler nou pe koze ozordi kot tou keksoz in retourn normal. E mon santi ki sa malad li menm li, in anmenn en pe keksoz osi, kot ti kapab tir en pe leson lo la, kot zot ti kapab fer keksoz al en pti pe pli vit. Ler nou pe koz dan plas resours imen, ek letan osi konmela ki vremen vit.

E mon pa pe vremen krwar ki nou'n pran en pe keksoz ladan, pou nou kontiny lo en biznes pou nou kapab - parey nou dir - kas en pe letan ladan. Nou'n kontinyen al rezon normal parey nou pe ale la.

Ler mon pe koz lo biznes soutenab, i annan en lakle prensipal ki mon ti aprann lekol ler nou ti pe - ler mon ti ankor lekol, i ti fer nou konpran ki dan biznes soutenab li menm, i

annan 3 vokabiler ki souvandfwa ganny servi.

Sa i lekonomi ek son bout laspe lanvironmantal parey nou dir, e osi en sosyete soutenab. Sa 3 mon mazine ki mannyer lemonn antye pe devlope, e Sesel osi pa'n ganny kit deryer. E mon krwar ki parey nou pe koz lo *curriculum* osi, ler nou pe koz ki mannyer pou sanz fason ki marmay i kapab aprann lekol, pou fer zot pli kapab vin bann bon dirizan pou tenir bann *post* ki *vacant* dan pei.

Mon krwar sa bann lakle – sa bann 3 mwan osi, ozordi nou kapab pe enkorpor li dan *curriculum* pou fer marmay pli byen ganny en konpran ler zot pe koz lo laspe lanvironmantal, lo laspe lekonomi e osi lo laspe sosyal.

An terminan Mr Speaker, mon ti a kontan ki bann fasilite finansman, pou bann pti biznes ki vin en pti pe pli fasil ki nou annan, parey lezot Manm in dir oparavan; kot dan le sans pou bann dimoun ki vin rod en bann lasistans, i ganny bann lenformasyon osi. Ki zot pa war zot vin dan en sityasyon finansyel pli tar.

Akoz wi, nou demann plis finansman osi pou bann pti biznes. Me parey osi in ganny dir pli boner, nou bezwen

konnen kwa ki nou pe al fer ler nou pe rod finansman pou biznes. Nou pa zis rod finansman pou biznes, apre pli tar nou pa pe vwar nou kapab pe al lo sa bann lobligasyon ki'n ganny dir, kot nou vwar biznes i bezwen fermes; zis aköz kekfw - parey in ganny dir ankor boner - ki nou'n vwar en dimoun pe fer en biznes, nou osi antre ladan. E la kot nou war kot difikilte i antre.

Mon osi rekonnèt zefor Mr Speaker, ki Minister Lantreprenarya pe fer; son Minis ek son teknisyen kot zot pe ede pou fer lanvironnman biznes vin en pti pe pli fasil.

Ankor Mr Speaker, nou osi rekonnèt ki byensir i ankor annan bann defi, me selman ozordi nou kapab dir, ki ler nou pe koz lo defi, lo travay ki pe ganny fer, nou ankor *still* war bann prodwi ki pe ganny enporte dan pei, ki parfwa i demann ou en ta kestyon lo la.

Ozordi ou a pas laboutik, ou war menm zak, en fri ki an abondans Sesel, pe ganny fer vini dan bwat, tanmaren pe fer vini dan bwat. La tou dernyerman mon pas kot en laboutik, mon war ziska fey kannel zot pe fer vini.

So sa i montre ou dan li menm ki, mon krwar lo kote lenportasyon osi, ankor en fwa i

en travay parey in ganny dir boner, ki tou dimoun i bezwen annan get *onboard* osi pou nou osi kwa ki nou merit enporte, kwa ki nou pa merit enporte.

Akoz ler ou pe get dan tousala se, *foreign exchange* ki pe ganny ale kekfwa dan bann keksoz ki pa neserman. So la ankor enn fwa mon pou lans lapel ek Minister Lantreprenarya, pou sa travay ki pe kontinyelman fer. Ki ankor zot regard ankor en pe. Kekfwa la osi rezwenn ankor avek departman ki fer bann zafer lenportasyon osi, pou vwar en pe ki bann prodwi kekfwa ki merit les antre, ki bann ki nou merit met en pti lizye dekote lo la.

Mr Speaker, mon pou termin la. Mon ti a kontan dir Onorab William byensir i pou ganny mon sipor pou sa Mosyon - parey mon'n dir ki mon war i annan son lenportans. Mersi.

### **MR SPEAKER**

Mersi Onorab. Mon a donn laparol Onorab Norbert Loizeau?

### **HON NORBERT LOIZEAU**

Mersi Mr Speaker. Bonzour tou Manm. Bonzour tou dimoun a lekout. Mr Speaker, mersi. I en plezir pou mwan kapab ganny

sans pou koz lo Mosyon anmennen par Onorab William. I en plezir aköz Mr Speaker, bann Mosyon ki Onorab William i vin avek souvandfwa, se bann Mosyon ki byen. Onorab William i en dimoun ki ler mon get son bann Mosyon, i en dimoun ki annan en vizyon kot i anvi war pei bouze.

E ler mon ti pe koz ek li, sa vizyon ki i annan Mr Speaker, in la pou en bon pe letan Onorab William i dir mwan - en bon pe letan vizyon i la, me selman zis selman i pa'n ganny sa loportinite pou ki kapab bouz sa bann nide en pti pe pli devan.

Ozordi Mr Speaker, nou'n war li neser pou nou sipor ou Onorab William pou li bouz tou son bann nide, ki mon panse Mr Speaker, i pou bon pou pei e pou bon pou lavansman nou pei osi.

Mr Speaker, be ler mon get sa Mosyon, i enportan ki - e mwan mon pou koz lo bann size ki pros avek mon leker ki mon konnen Mr Speaker, sa mon pou fer sir - nou bezwen trouv fason mannyer ki lanvironnman biznes dan Sesel, i ganny deroule dan en fason Mr Speaker, kot tou dimoun - tou dimoun i benefisye. Kot si nou pou met bann serten Polisi i pa



pou zis favoriz zis serten, me i favoriz tou dimoun.

E la Mr Speaker, mon anvi kot lo bann mwayen ek bann pti lantrepriz – pa zis mwan ki'n koz lo la – plizyer Onorab ki'n koz lo la, ozordi sa bann mwayen e pti antrepriz Mr Speaker, pe *struggle* vre. Mon konnen zot tou zot ou dakor ek mwan.

Zot pe *struggle* Mr Speaker, akoz oparavan gro pwason ti manz pti pwason. Bann pti biznes ki ti pe sey rod en fason konmdir Angle *florish* zot, zot ti ganny kit deryer a zot ti annan bann ki pli gro ki ti pe pran tou lavantaz lo zot. E la, dan Mosyon in koz lo Polisi.

Mr Speaker, mon rapel dan en pe letan pase, ti annan bokou bann Polisi e menm bann *scheme* ki sipoze pou serten group dimoun me i pa'n benefisyé. I pa'n benefisyé sa group dimoun ki sa *scheme* or sa Polisi i sipoze ganny fer pou zot.

Ozordi Mr Speaker, pa zis ozordi, en pe letan pase, bokou bann mwayen e pti biznes in ganny kit ater.

Pourtan Mr Speaker, parey mon pe dir ti annan sa bann *scheme*, ki ti ganny mete pou pran zot sa bann pti biznes, me selman zot pa'n benefisyé avek, plito lezot dimoun ki'n

benefisyé avek. I annan in mor an nesans.

E ozordi nou war zot kot zot pe fer biznes enformel Mr Speaker, ki en biznes enformel pa tro anmenn gran keksoz dan lekonomi Sesel.

I zis anmenn satisfaksyon pou sa dimoun, me selman Sesel koman en pti, an term reveni zot pa kontribye preski gran keksoz.

I annan Mr Speaker, ki dan zot lentervansyon zot in dir ki ozordi biznes pe ganny difikilte Mr Speaker. Pa zis ozordi, en bon letan avan biznes pe ganny difikilte. Mwan mon'n ladan, mon'n rankontre sa bann difikilte. Depi avan mon antre dan Lasanble nou'n dir ki sipor - pa pe ganny sipor menm lo kote *license* zot pe ganny difikilte e menm finansman.

Mr Speaker, mon konn sa tre byen. Mr Speaker, ozordi nou pei - i byen ki ler Onorab William ek sa Mosyon - ozordi nou pei nou pe *deal* avek en bann kantite ka labi ki'n arive ki'n fer, ki bann biznes pa'n kapab bouz devan.

Oparavan Mr Speaker, i annan dimoun ki'n antre dan sa bann *scheme* ki pa ti devret dan sa bann *scheme* pou ganny larzan, me zot ti antre e zot ti'n bar sa plas sa bann ki ti annan sa lanvi pou ganny sa

finansman, pou zot kapab fer zot biznes e bouz devan.

E zot, zot pa ti ganny sa sans, akoz, sa *scheme* ou a dir letan ti ganny formen zis pou fer krwar - pou sey fer krwar konmsi nou pou ed pti biznes kan zot konnen sa pti biznes pou fer.

Me selman pou benefis serten lezot dimoun Mr Speaker. Nou ti war. I annan *YES Scheme* Mr Speaker. Mwan mon en dimoun ki ti pran *YES Scheme* en bon pe letan pase e mon'n peye - mon'n fini peye. Ozordi i annan dimoun pe al lo 30an - i pa'n pey 5sou. Se pa bann dimoun ki ti anvi fer biznes.

Sanmenm sa ki mon'n dir i annan *scheme* ti ganny fer pou benefis serten dimoun, me selman sa bann dimoun ki sa *scheme* i sipoze benefisyé zot, zot pa'n benefisyé avek sa *scheme*. E la mwan mon anvi dir avek nou Gouvernman annou pa repet sa fot.

Si nou pou fer okenn Polisi ki ti pou adres en group dimoun pou en *scheme*, nou bezwen fer sir ki i adres sa group dimoun.

Nou pa anvi repet menm fot ki'n arive. Nou kapab mazin *SBFA* ki ti arive Mr Speaker, pou sey ede pou ankouraz pti

biznes, kot i annan ki pa'n fer biznes, ti gannyen larzan.

*MNA* ti ganny larzan. *MNA* ti gannyen larzan, kot ler ka ti vin devan par Onorab Andre, i annan ki ti taye ti al peye, kan Mr Speaker sa larzan ti kapab ed en lot dimoun ki ti annan sa lespri pou sey bouze.

E li i pa ti ganny sa sans e ozordi nou'n ariv dan en leta - e mwan mon enplor mon Gouvernman pa repet sa fot. Parey mon'n dir, annou fer sir ki okenn *scheme* - okenn Polisi ki fer ki pou adres en group dimoun, napa lot dimoun ki pou kapab antre ladan, pou kapab ganny en keksoz me plito adres sa group dimoun;

*Providence Industrial Estate*, Mr Speaker, ki zot ti sipoze en landrwa konble pou benefis tou biznes, partikilyerman bann pti e mwayen biznes. Mr Speaker, i pa'n le ka.

Ozordi aparaman ler ou ti pou ganny sa later *Providence*, pou sipoze vini, ou fer ou biznes e ler ou pli gro pou bouz en lot landrwa dan prive ou kontinyen. Me ki'n ariv avek *Providence Industrial Estate*?

I annan dimoun in fer biznes, zot in gro, zot in lwe ankor en lot bout, zot in gannyen, zot in le ankor en lot bout, zot in gannyen.

Ozordi mon fek pe koz avek Onorab Monthy taler, i dir mwan dapre son bann lenvestigasyon - li ki *MNA Cascade* i tonm dan son distrik, -ozordi i annan dimoun ki annan anviron 10 *plot*. 10 *plot*, selman i annan bann pti kontrakter klas 2 ti pe rod landrwa Mr Speaker, zot napa landrwa. I annan kontrakter ozordi klas 2 ki annan tou zot lekipman, *scavator* - *name it*;

Zot pe ganny pe *operate* akoz, zot pe *operate*, son met pe dir zot sorti. Me landrwa napa pou zot kapab ale pou al *operate*, akoz, i annan serten dimoun ki zot, zot annan plis.

Mr Speaker, nou rapel ler nou pe koz lo *Industrial Estate*, si i ti'n ganny byen administer, ozordi ti pou napa tou sa dezord.

Providans ti annan serten morso ki ti *allocate* ek serten dimoun Mr Speaker, zanmen zot in fer nanryen - ki nou'n fer? Toultan nou repet sa. Nou'n vwar kot bann *lease* in ganny vann. I annan dimoun i fer larzan avek *Industrial Estate* - segonn!

I annan dimoun ki ti - mon a servi sa term - ki ti touni - ti abiye Mr Speaker, avek later ki zot pa'n pey en sou! Milyon zot in vann *lease*, kot ozordi sa ta pti antreprenner ki pe rod later

endistriyel pou zot kapab devlope, ti a kapab ganny en morso e nou problem ti pou rezourd Mr Speaker.

E la mon anvi dir - mon anvi felisit Minis pour Lantreprenarya, ki pe fer en travay pou met en pe lord dan sa dezord ki i annan laba. Tou sa se bann keksoz ki sa Mosyon osi pe ankouraze pou kapab permet ki nou bann bizes, nou bann pti e mwayen biznes i kapab bouze - bouze al pli devan.

Lagrikiltir Mr Speaker, i en domenn, ki mon krwar kot latansyon i bezwen ganny mete en pe plis lo la. Prodiksyon lokal i merit ganny ankouraze fer. Mr Speaker, ozordi i annan dimoun ki annan laferm, me selman zot pe enporte. Zot sipoze ganny later pou zot kiltive, pou annan plis prodiksyon lokal. A lafen i annan pe kiltiv mwens akoz? Zot krwar dan lenportasyon zot pe ganny keksoz en pe pli bon marse, e ler zot pe vini, zot pe touy nou, Mr Speaker. Tousala i annan.

Alors nou bezwen ankouraz lagrikiltir; ankouraz nou bann zenn pou antre dan lagrikiltir; fasilite zot. Fasilite bann zenn avek - mannyer mon kapab dir sa? Avek later, avek akse finans, pou zot kapab bouze dan lagrikiltir. Ouver nou

bann zil, kot sa bann zenn ki enterese a ganny sans fer elevaz zannimo, ou menm plant fri ek legim.

Ozordi *STC* pe fer vini manze zannimo. I ava fasilite zot en pli bon pri. Me selman Mr Speaker, tousala i bezwen ganny fer; ler nou pou ouver bann zil an respektan regilasyon ki *IDC* pou mete, kot ler nou mont lo zil, nou pou ganny sa morso pou nou fer travay sa bann zenn, selman i bezwen annan sirveyans *IDC* akoz nou pa kapab zis permet en dimoun mont lo zil, fer sa ki i oule. E sa i enportan Mr Speaker. Nou bezwen swiv bann regilasyon.

Me ozordi nou kapab ankouraz nou bann zenn. Ozordi bann Izraelyen mon krwar ki pe ganny kontra pou fer sa letid, pou gete ki mannyer nou kapab plante lo zil, akoz zot, zot plant dan dezer.

Ozordi mon krwar Gouvernman i bezwen annan bann lankadremman, kot i kapab permet nou bann zenn dan lagrikiltir – marmay kot *SIAH* - pou kapab annan bann *course* Izrael, kot zot kapab annan en lespri ouver mannyer pou prodwi dan bann teren en pe parey lo nou bann zil – parey bann Izraelyen pe fer.

Met zot parmi sa bann dimoun ki pe fer sa bann resers pour ki zot osi, zot kapab ganny sa lide e aprofondir e bouze zot osi. Tousala pou ede devlop nou bann zil.

Ozordi Mr Speaker, ou'n war avek *fisheries*, devlopman ki pe arive dan lapas e lekonomi ble. Ki mannyer Minis - Minis Ferrari in ankouraz bann dimoun pou vini, donn zot sa loportinite pou kre zot bann, lantrepriz, fer bann keksoz a labaz bann prodwi lanmer, Mr Speaker. I pe mars byen.

Bann kontak, bann travay ki pe ganny fer ansanm ek Linyon Eropeen, pou ki nou *fisheries sector* i kapab bouz devan Mr Speaker. Tousala se bann keksoz ki ankourazan ki nou pe war.

Mr Speaker, me selman i annan en keksoz ki osi nou bezwen met lanfaz lo la. Nou bezwen fer en travay serye lo larelev pou nou kapab refer nou lafors travayer.

Ozordi Mr Speaker, nou annan bann zenn zonn, bann zenn fanm ki pa pe travay pourtan loportinite i la. Ozordi nou bann zenn zonn, nou bezwen ankouraz zot osi Mr Speaker, pran sa loportinite. Ozordi bann zouvriye kalifye ki nou ti annan detrwa lannen pase, pe nepli egziste.

Nou pou kontinyen war etranze pe vini pe vin fer bann travay pou nou, si nou, nou pa fer sa zefors nou bann zenn zonn, pou nou aprann en metye. E la petet Mr Speaker, avek sa sant vokasyonnel ki pe al fer, ki Gouvernman pe propoze pou al fer dan Ledikasyon, petet i ava fer ki nou ava plis sa bann zouvriye ki nou ti annan avan.

Akoz tou nou bann zouvriye laplipar zot pe vyei; i annan ki'n tonm dan drog, dan lalkol. E nou *workforce* i limite Mr Speaker. Sa en domenn ki mon krwar nou merit fer en zefor, pou nou kapab devlop li en pe plis. Me selman lo kote bann zenn fiy Mr Speaker, i ankourazan.

Ozordi ler mon desann dan semen Bel Eau, mon souriye pou war bann zenn fanm, bann zenn madanm Mr Speaker, pe diriz trafik, be zot pe fer li byen. E parfwa mon demann keston, oli nou bann zonn? Nou bann zonn zot, zot sipoze pli for. Zot sipoze pli kapab *deal* ek bann sityasyon, kot i demann zonn pou *deal* avek Mr Speaker.

Ozordi nou war bann madanm. Nou war bann madanm ki pe fer sa. E sa en domenn ki mon krwar nou bezwen ankouraze osi pou nou

antre ladan, pou nou refer nou *workforce*; ankouraz dimoun antre dan lanplwa. Ankouraz dimoun pran en metye. En metye ki demen a vin en karyer, kot parey lontan nou ti annan bann bon mason, bon mekanisyen.

E Bel Air ozordi Mr Speaker, nou annan en msye ki nou dir li Pti Frer; Pti Frer i annan 80an mon krwar in gannyen – Pti Frer i ankore pe aranz tou sa bann delo dimoun Bel Air – 80an mon krwar in gannyen. I ankore for, i kapab travay! E ler mon war sa Mr Speaker, ler mon konpar li avek bann ki pe asize pa pe fer nanryen Mr Speaker, i fatig mwan!

I annan en keksoz ankore Mr Speaker, ki mon krwar nou bezwen get ladan, se bann *retailers*. Nou'n koz lo *retailers*; bann *retailers* zot osi fodre fer zot bout, pou fer sir dan tou sa bann devlopman ki pe arive, e zot ed nou. Ed nou pou fer pri lavi dan Sesel, Mr Speaker, desann parey nou ti a kontan anvi. Pa mazin zis zot lekor.

Nou'n tande lot fwa Mr Speaker, ki'n arrive? I annan bann ki'n ganny *fined* aköz ban komodite esansyel ti pe vann pli ser ki son pri ki in sipoze demarke ki zot ganny vann - ki

zot sipoze ganny vann, Mr Speaker.

E tousala se bann keksoz e ler nou, nou pe mazin – ler mon get Mosyon, mannyer pou fer biznes byen, tousala i antre ladan. Sa legoizm parmi bann biznes i bezwen sanze Mr Speaker. I bezwen sanze.

Ozordi zot ganny en pti *fine*, sa *fine* ki zot in gannyen, eski i ekivalan sa 100tenn – 2 santenn dimoun ki zot, zot in benefisyé 3, 4 Roupri an plis lo sa komodite ki zot, zot in vann sa bann dimoun?

Mr Speaker, mwan mon krwar Mosyon i byen. Mosyon in vin dan en bon moman e i enportan Mr Speaker ler nou, nou pe fer sa, i enportan ki tou dimoun i zwenn ansanm. I pa zoli kot ler nou Gouvernman nou pe sey fer keksoz pou bouz Sesel devan, nou war i annan pe kraz Sesel Mr Speaker.

I annan ki pe koz mal lo Sesel, san realize ki sa Sesel ki zot pe koz mal lo la, se sa Sesel ki zot, zot form par ladan. E la Mr Speaker, mon anvî dir annou arete, annou bouz Sesel tou Seselwa i pe form par dan sa travay, pou nou kapab bouz Sesel devan. Si sakenn i ris son kote Mr Speaker, nou pou savire.

Mr Speaker, mon anvî dir avek Onorab William mon pou

donn li sipor son Mosyon, aköz mon santi ki sa Mosyon i en bon Mosyon. E mon anvî dir ek lezot Manm osi, siport Onorab William, aköz Onorab William mon konnen i senser dan son Mosyon bann keksoz ki i fer, i senser e alors annou donn li sa sipor. Mersi Mr Speaker.

### **MR SPEAKER**

Mersi Onorab. Mon a donn laparol Onorab Woodcock.

### **HON WAVEL WOODCOCK**

Mersi Mr Speaker. Mr Speaker, bokou keksoz in ganny dir lo sa Mosyon e petet en keksoz ki'n ganny enkorpor par plizyer bann Manm, se lo sa size *ease of doing business*.

Annefe *ease of doing business* zeneralman sesel Mr Speaker - Onorab Aglae, in tous lo la, Onorab Cosgrow osi in koz en pe lo la e osi Onorab Larue in al en pe an detay lo la. Me en keksoz ki nou bezwen met an konseps se ki sa *Ease of Doing Business Index* ki Onorab Aglae in koz lo la, i ti dir dan son lentervansyon ki Sesel, nou ti 100tyenn mondyal *lo ease of doing business*.

Me parey Onorab Larue i mon krwar in eksplike - i enportan ki nou fer sa sorti byen, poudir sa *Ease of Doing Business Index*, son dernyen

*ranking* an 2019 ki Sesel ti 100tyenm. E ki Sesel ti'n desann sorti 96 pou li vin 100tyenm lo sa *ease of doing business* an 2019. Me ti annan en keksoz ki ti arive an regardan sa *Ease of Doing Business Index*, ti annan en gran skandal mondyal kot i konsern manipilasyon bann data,

E mon rapel en fwa Onorab Loze osi ti koz en pe lo la - mon rapel ler si mon pa tronpe – en Mosyon, ouswa en kestyon – en Mosyon ki Onorab Mondon ti anmennen, i ti fer resorti sa; me solman *still ease of doing business* i en keksoz reel, e nou bezwen fer nou mye pou nou *improve* sa.

So alors sa *Index* li menm li ti ganny *scraped*, ti ganny zete e a ler aktyel la, *World Bank* pe fer en travay pou serye relans sa proze, pou sey relans sa lakor anyel lo *ease of doing business* dan lemonn, dan tou bann pei, pou fer li pli enparsyal, pli transparan e baze lo bann data ki bon Mr Speaker.

So nou pa kapab vreman dir poudir - akoz in napa en *ranking* pou Sesel pandan sa bann dernyen lannen lo *ease of doing business*. Me selman an di-z-an tousala, i annan vre en kantite ki nou Gouvernman in

fer pou *improve ease of doing business* Sesel, me an menm tan i annan plis ki nou kapab fer ankor, pou nou *improve the ease of doing business*.

Akoz zisteman yer swar mon fek ganny en konversasyon avek en zenn biznesmenn Praslin - annefe nou ti lekol ansanm - avek enn de bann defi ki i pe fer fas avek kot *Registration*. E *ease of doing business* Mr Speaker, pou eksplike, i annan pou fer avek bann Polisi an plas pou fasilite biznes dan pei, bann keksoz ki afekte biznes direkteman, kot i konsern fasilite pou ganny kredi, *registration* lo li menm, *of companies of businesses, construction permit* e bann lezot permit pou ganny *license*.

E bann keksoz ki Mr Speaker ki fasilite biznes, ler i annan bann - ou kapab dir bann *impediment* bann keksoz ki kapab met en blokaz e met retar bann biznes .

E Gouvernman i bezwen fer sir, ki i tir sa bann keksoz pou fer li fasil pou dimoun antre dan biznes, pou dimoun fer byen dan biznes Mr Speaker. *COVID-19* in osi anmenn en gro defi mondyal – Onorab Larue osi in met en pe lanfaz lo la, pou eksplike lo ki mannyer nou'n ganny afekte bokou par sa pandemik Mr Speaker.

Me parey mon'n dir *COVID* in en sab koup dekote, kot in fors Gouvernman pou bouz *online*, pou vin pli *digitalized*, pou al *online* kot bann tranzaksyon Gouvernman ozordi in *improve* en kantite - kot ozordi bokou bann tranzaksyon avek Gouvernman - e ozordi bann tranzaksyon i *online* ki fer li pli vit.

E ozordi zisteman nou fektann en Mosyon anmennen par Onorab Deputy Speaker, lo en Gouvernman i *cashless* Mr Speaker. E ozordi menm bann biznes pe bouz *online*, ou kapab fer ou bann tranzaksyon *online*, aste bann - pey servis, ouswa pey pou bann *product* ki ou anvi.

Me an menm tan, parey plizyer Manm in dir, *COVID* in anmenn en defi mondyal. Ki ozordi lemonn i ankor pe rekipere. In anmenn en kriz ekonomik; in afekte lemonn, in afekte biznes dan tou pei, pa zis Sesel.

Zeneralman tou pei in ganny afekte avek *COVID-19*. E ki ti arive pandan *COVID* e nou ankor pe fer en pti pe son bann *ripple effect* ozordi. Lenflasyon, logmantasyon dan komodite mondyal, kou loperasyon ti monte par lefe ki bann *raw materials* in ogmante pou karbiran, gas, delwil, *grains*,

kou transportasyon lo lanmer, transportasyon lo later, *freights*, *cargo* tou sa bann keksoz ti ogmante, ki'n fer ki kou komodite prodiksyon osi in ogmante, akoz *raw materials* in monte, pou transport *raw materials* i monte, pou *transport* bann *products* in ogmante; tou keksoz ti ogmante.

E alors sa in afekte lemonn antye, ki'n fer ki pri pou komodite mondyal in monte e kou bann *raw materials* ki bann lakonpanyen ouswa bann biznes i bezwen pou prodwi zot bann *goods*, in monte ki'n fer ki lemonn antye, tou keksoz, tou komodite mondyal in monte.

Me lemonn in dan *recovery* enkli Sesel e bokou sa bann keksoz pe komans redesann. I pa'n ariv lo bann nivo parey ti ete oparavan, me keksoz dan lemonn pe stabilize, bann kou materyo pe desann. I annan pou en pti pe sa *fluctuation* monte-desann me selman i pa pou lo sa oter, sa kou ki i ti ete, ler nou ti dan *peak* pandan *COVID-19*.

E Mr Speaker, lemonn antye pe bouz - lamazorite pei ozordi pe bouz dan en bon direksyon enkli Sesel. Me fodre pa zanmen bliye, kou lenflasyon kot ti ete an 2021 - mazine ti ogmante pou ariv 9.8poursan lenflasyon dan Sesel. Me ti



desann an 2022, ki ti en desann ase vit, kot i ti sorti 9.8poursan pou vin 2.6poursan. E ankor sa lannen, i annan en rediksyon sa lannen dan kou lenflasyon.

Me parey mon'n dir, i kapab annan en pti logmantasyon anmezir sa lannen i progresse, aköz fodre pa bliye bann *forecast* mondyal pe montre poudir, aköz sa *demand* in ogmante, mondyal dan tou pei, enkli Sesel, i fer ki bann komodite i kapab mont ankor en pti pe. Aköz ozordi i annan plis *demand* ki *supply* e sa osi i ede en pti pou fer mont ankor en pti pe komodite.

Me selman an mezir nou ale, keksoz pou stabilize e i pou kontinyen desann. E nou priye ki petet, i ava desann lo en nivo ki i ti ete *post - I mean pre-COVID*. Nou konnen i pou en pe difisil, me selman sa i nou swe ki nou ti a kontan war arive.

I pou en pe difisil, me selman *at least* si sa bann komodite i desann, kou *raw materials* i ava ed fer desann kou prodiksyon e kou materyo e kou bann *product* ki konsonmater i konsonmen.

I annan en Manm ki'n koz lo *African Continental Free Trade Area, AfCFTA*, Mr Speaker, e mwan annefe Mr Speaker, mon dan sa komite ki ti organiz dernyen *workshop*,

dan Parlman Lafrik - mon dan komite pou *Trade, Customs and Immigration* lo Parlman Lafrik, e mon ti ganny sa loner pou *chair* sa komite - sa *subcommittee* ki ti organiz sa dernyen *workshop* ki ti ganny fer dan Parlman Lafrik.

E se mwan menm ki ti fer rekomandasyon a lafen sa *workshop*, dan Parlman Lafrik Mr Speaker. E en kantite keksoz, rekomandasyon ti sorti dan sa *workshop*. E i annan ki tous Sesel direkteman. E sirtou kot i konsern *movement of goods and people*.

Annefe mouvman dimoun, *movement of goods* en eleman vremen enportan dan *trade*. E Onorab Cosgrow in koz en pti pe lo la. Annefe i ti fer referans avek kestyon yer lo *Travizory*, zafer *issue* Nizeryen pe vin Sesel, in dir "ar nou sipoze pe trade avek bann pei Lafrik, me selman nou pe kre bann problem *issue* diplomatik."

Me an realite nou tou nou konnen ki dan nenport ki pei, proteksyon nou *border* i vremen enportan. Nou bezwen anpese ki bann aktivite *illicit*, ilegal i ariv dan nou pei, aköz i osi afekte nou repitasyon avek bann pei, ki nou *trade* direkteman avek.

E nou bezwen protez nou dimoun; nou bezwen protez nou

*borders*, sirtou kot i konsern pou anpes trafik imen, pou anpes trafik drog, e osi pou anpes *terrorism* e osi bann krim finansyel ozordi Mr Speaker, ki nou konnen, malerezman i annan serten pei bann nasyonalite ki pe vin Sesel, ki pe anmenn sa bann eleman ki pe kontinyelman ogmante dan nou pei, ki nou bezwen pran bann desizyon pou kontrol nou *borders*.

E pa zis zot ki pran bann desizyon kont serten nasyonalite. *And I think* in mansyonn *Nigeria*, me annefe nou konnen *UAE, UK, US*, Sid Afrik i annan serten mezir ki zot in bezwen pran pou anpes – oubyen met en pe plis *scrutiny* e anpese ki serten ki nivo krim, sirtou bann *transporters* lo bann drog, bann tranzaksyon finansyel bann krim organize, i antre dan zot - akoz nou annan en pe sa logmantasyon dan pei, e osi Sesel osi malerezman nou'n fer fas avek sa.

E alor i enportan pou okenn pei protez son *border*, protez son pep, akoz sa si ou pa fer atansyon, i kapab *be – it can be detrimental* pou en pei, si nou pa fer atansyon, si nou pa vey nou *border* byen.

E lakle Mr Speaker, fodre Sesel nou *invest* plis dan *research and development*. E en

defayans o nivo Lafrik, annefe ti sorti dan sa – parey mon'n dir - dan sa *workshop* ki ti ganny fer lo sa *AfCFTA*, lo Parlman Lafrik.

E en keksoz osi ki'n fer resorti se ki ozordi dan pei Lafrik, dan lo kontinan Lafrik, Sesel osi, nou war poudir nou depann bokou lo bann keksoz ki nou enporte, sorti dan bann pei sirtou Lerop avek Lazi.

E i sagrinan Mr Speaker, ozordi nou pou get bann pei Lazi, bann pei ki ti kapab fer *brand* loto, ozordi sanmenm sa bann pei, ki zot *brand* loto i partou dan lemonn.

Get Sid Kore, eski ou'n deza tande poudir i annan en *brand* loto sorti Lafrik? Ouswa ou'n tande en *brand* telefonn ki sorti Lafrik, ki pe fer sitan byen, *Samsung* ozordi i sorti *South Korea* si mon pa tronpe. Nou annan Zapon – bann loto *brand* sorti Zapon, be Lafrik li menm li, i malere enkli Sesel, nou en pei – nou bann pei nou prodwi tou *raw material* i avek nou – tou bann *raw material* i avek nou.

Nou annan preske tou dan nou bann pei, mon pou koz lo diferan resours, Lafrik nou annan lor, nou *iron ore*, nou annan mineral, nou annan dibwa, non annan preske tou keksoz lo kontinan.

E Sesel osi nou annan en kantite *raw materials*, me selman nou pa eksplwat sa bann materyo. Nou pa *exploit our own materials* e nou pa pe *manufacture from* sa *raw material* ki nou le eksplwate. E i annan en lenportans pou nou pei, Lafrik, Sesel dan Losean Endyen nou investir dan teknolozi.

E i sagrinan Mr Speaker – parey mon'n dir, mon'n vizit bokou bann pei Lafrik, koman en Parlman Lafrik e osi *CP Africa* mon'n *attend* enn de *meeting*, nou'n war poudir ozordi Lafrik, si ou konpar Lafrik avek bann lezot pei Eropeen ou pou war poudir - ozordi bokou lo bann laferm ou pase Lafrik, dimoun ki ankor pe servi pyos avek lapel.

Me ler ou al dan bann pei Lerop, Lazi, zot pe servi bann *heavy machinery*. Me nou lo kontinan, nou pa pe *invest* dan bann lekipman, dan teknolozi bann *machinery*, pou kapab *increase production*. E ozordi nou Sesel, Lerop, dan Losean Endyen preski tou sa ki nou enporte, nou enport *from* pei Lerop ouswa Lazi, e nou pa met ase valer lo nou bann prodwi ki nou annan lokalman.

Nou pa donn valer nou bann prodwi. E ozordi i annan en *need* pou nou sey rod en

fason pou *substitute* sa bann prodwi - *products* ki nou aste dan pei Lerop - pa avek bann *products* dan nou pei, ouswa bann ki pli pre dan rezyon ki pou kout nou pli meyer marse pou fer antre dan nou pei.

So sa en direksyon ki nou bezwen *go towards, invest* dan *research and development*. Akoz nou pa devlop nou bann prop teknolozi, rod bann biznes ki petet nou kapab antre ladan ki ennler nou pa pe *think outside the box*, nou le fer *more the same*.

Sesel nou tou nou met lanfaz dan bann biznes, dan *tourism, guest house*, restoran, gran lotel, konstruksyon, enport keksoz pou revann, me selman kot i konsern pou nou prodwi nou prop *goods*, sa en keksoz ki petet nou pa pe fer ase.

Parey mon'n dir, nou pa pe *exploit* nou bann *raw material* e menm nou materyo pe ganny eksplwate *from* nou pei, Sesel parey pe ganny eksplwate dan bann lezot pei Lafrik, pe ganny anmenn *somewhere in Europe* ouswa Lazi, la i ganny *manufacture* into bann *finished products* ki ganny vann.

I reganny vann avek nou menm, swa i reganny vann avek parey bann pei Lafrik ki zot mineral i ganny eksplwate,

reganny vann zot avek zot a en pri pli ser, kan si zot ti'n *manufacture their own goods*, zot ki ti pou benefisye plis.

Ozordi sa en keksoz ki ou war ki nou bann pei Lafrik, enkli Sesel, nou war nou, nou pa pe vreman *enjoy* sa larises ki nou merite, akoz bokou nou bann *raw material*, nou bann resours pe ganny eksplwate *with...*

En kantite keksoz nou kapab *invest* ladan Mr Speaker, me en keksoz ki mon pa war okenn dimoun pe al ladan vreman, ki i pe fer en kantite larzan. Ler mon mazin bann pei parey Lendonezi.

Lendonezi i fer en kantite larzan avek *seaweed*. I annan en kantite *edible* gomon Sesel ki nou kapab eksplwate ki nou kapab menm fer *farming*.

Mon'n war - mon'n fek get en film resaman la, e dan sa film i montre en pti laferm, kot zot pe plant gomon e zot fer bokou larzan Lendonezi avek lavant gomon. I annan ki ganny servi pou bann rezon medisinal. Disel osi - nou annan delo sale. Nou annan - *ok prawns* nou'n relanse - en bon desizyon Gouvernman; *aquaculture* en keksoz ki nou koz bokou lo la, me selman ozordi banbara son pri deor lo marse enternasyonal, i vreman o.

Kekfwa nou kapab mazin pou al dan *aquaculture* lo kote eksplwat banbara osi. Mazin banbara osi i kapab en *area* ki nou kapab ale, olye ki nou pe zis eksplwate, me nou kapab rod en fason pou nou fer *farming*.

Mr Speaker, *improving packaging*. Sa i enn nou *challenge* Sesel. Akoz ou konnen pou nou bann prodwi ariv lo nivo enternasyonal, nenport kwa ki nou prodwi.

Ler mon pe koz ou nou *product*, mon pe koz ou nou kiltir, mon pe koz ou nou lanmizik, mon pe koz ou nou lar, mon pe koz ou nou bann prodwi ki nou annan dan nou pei; *be it* agrikol, *be it whatever*, nou fason ki nou fer *branding packaging* nou bann *product* i bezwen monte, nou nivo, nou standar.

E nou bezwen *increase* vizibilite nou bann prodwi lo nivo enternasyonal. E sa kot Minister ki'n ganny apwente pour Lantreprenarya i vin ladan dan en fason, pou nou *market* nou bann prodwi, *increase*, ed bann biznes *improve* zot *packaging*, zot *product*, pou met li lo en standar pli o nivo, ki kapab anpes marse lokal e osi lo en marse en nivo pli o standar.

Mr Speaker, en keksoz ki enportan, en lavantaz ki nou annan - annefe i pa ankor vin en lavantaz, me keksoz ki'n pou lo la byento, ki an diskisyon ki'n ganny kre se sa *ATO – African Trade Observatory* ki en *database* lo bann loportinite pou fer komers, e bann loportinite *marketing* biznes ant bann pei Lafrik, kot ou kapab antre lo sa vin lo sa *Trade Observatory*, kot ou kapab war bann diferan *area* kot ou kapab *invest* ladan.

Me malerezman i pa ankor neserman ganny *rollout*, me selman sa i en keksoz ki nou Sesel koman en pei ki'n ratifye sa lagreman, nou kapab ede donn sipor pouse, pou sa *ATO* vin an plas, Mr Speaker, kot nou bann biznes i kapab war loportinite, ki annan dan rezyon Lafrik.

Mr Speaker, milyon pe sorti Sesel pe al deor, e en *area* ki nou pa pe realize Sesel pe perdi bokou, ki bann pei parey *Sri Lanka* ek Lenn in met en ta lanfaz lo la, se lo kote lasante. Lo kote *healthcare*. E ozordi Sesel nou'n perdi bokou larzan, aköz Gouvernman pe depans en kantite larzan, pou anvoy Seselwa aletranze pou trete. E i annan bann ki pe pey dan zot pos pou ganny tretman aletranze.

Me mwan mon santi poudir Sesel osi nou kapab rod en fason pou nou investir dan nou *healthcare*, Mr Speaker, ki pou anpese ki larzan ki sorti Sesel, pe al deor, aköz i kout vremen bokou, sistenm lasante aletranze, pou ganny tretman pou plizyer malady.

Me mon *happy* pou war ki Gouvernman in pran sa serye, aköz lasante nou pep i vremen enportan.

Byento le 15 Out pou ouver nouvo Lopital La Digue, e zisteman i annan en fon ki fek ganny lanse la, pou tou bann dimoun ki anvi kontribye pou fer en lopital lo nivo, lo standar Sesel, ki si nou ganny sa bann servis spesyalize, nou pa pou bezwen depans sa kantite larzan, ouswa war nou pep bezwen bouz deor pou ganny tretman medikal Mr Speaker.

Mr Speaker, tou resers e lendikasyon i montre ki i annan delwil; ki annan *crude oil* dan nou lanmer, sa sirtou lo plato *Mascarene*. Annefe Sesel nou annan en *Joint Management* avek en *Joint Management Agreement* avek Moris e sa i en *area* ki mon konnen i annan dimoun ki pe per ler nou koz lo delwil. Aköz dan bokou pei, delwil i kre bokou konfizyon – enimite antre bann nasyonalitye sa pei respektif. Me selman sa i

en *area* ki petet nou bezwen get ladan.

Nou bezwen get ladan, akoz si Sesel nou arive dekouver delwil dan nou lanmer, nou eksplwat li dan en fason ki byen, ki soutenab ki pa afekte nou *biodiversity*. Mon santi poudir sa i en *area* ki petet nou bezwen get ladan en pe pli serye.

Mr Speaker, *farming* lo nou bann zil elwanye – Onorab Loizeau in koz lo la, me selman en konsern - mon ti pe koz avek en dimoun ki dan biznes *cargo*, i ti pe dir mwan *farming* lo zil li menm li, i en bon nide li. Me selman en keksoz ou bezwen pran an konsiderasyon, kou loperasyon.

Kou loperasyon pou vreman o, akoz kou lenportasyon enn;- *transportation of labour, transport raw materials* e menm po upran sa bann prodwi lo sa bann zil pou anmenn lo en later, pou eksport aletranze, i pou koute.

La nou pa pe koz *crops*, nou pe koz elevaz zannimo, lavyann, nou pe dir plante lo zil, fer elevaz zannimo, me son kou leksportasyon lo li menm i koute. I pa ou kout en pti sou, transportasyon.

Akoz nou, nou konnen – pou pran avyon *IDC* pou al lo en

zil i kout en kantite. Karbiran i kout en bon pe, me petet en keksoz ki Gouvernman i kapab konsidere, se investir dan en bato, ouswa plizyer bato pou transpor materyo ek bann *products* ant bann zil sirtou *from* bann zil pour nou *main island* Mahe. En bato *cargo* sirtou Mr Speaker.

Mr Speaker, resaman fek annan en gro deba, en gro diskisyon dan Lasanble Nasyonal ki'n sok Seselwa; in sok bann fermye e in sok mwan osi. E nou'n war ki mannyer nou fermye dan lepase in perdi, zot pa'n neseserman ganny sa ki zot ti bezwen gannyen. La mon pe koz an term manze zannimo Mr Speaker.

E manze zannimo Sesel ozordi, i vreman, vreman ser. E anefe, nou ti aprann atraver en keksoz ki ti ganny demande, kot nou war poudir menm si Gouvernman ti pe *subsidize* bann lakonpanyen *animal feed* par 37poursan – si mon pa tronpe 37 or 38poursan, sa bann *animal feed*, zot ti pe selman donn en rediksyon 5poursan.

Prezan mazin zot *markup* ki zot mete lo sa bann manze zannimo ki zot pe vann kantite profi ki zot in fer lo lasyer Lepep Seselwa, fermye pa'n neseserman benefisy avek

*animal feed* lo sa kou ki zot ti merit gannyen, si zot konsider sa kantite larzan ki Gouvernman pe servi, pou ou *subsidize* bann konpanyen *animal feed* – mon pe koz ou anviron pres en R80milyon par lannen Mr Speaker.

So savedir bann ferme pa'n ganny en good *deal*. E *over the years* sa bann *animal feed* lakonpanyen in fer milyon, Mr Speaker enkli son *markup*. E mwan mon krwar sa i en labi. E mwan mon krwar sa en keksoz ki nou bezwen gete sa, *going forward*, Mr Speaker.

E *STC* ozordi i bezwen pran en desizyon, pou fer vini manze zannimo a en pri pli abordab, pou ede ki bann ferme i ganny akse avek *animal feed* a en pri - parey mon'n dir bokou pli meyer marse, ki ava ede fer desann kou lavyann Mr Speaker, ki nou aste lo marse lokal.

Sekter enformel osi en topik ki nou'n koz bokou lo la e nou anvi ki sa sekter, i vin pli *productive* – i fer plis larzan. Nou ti a kontan ki sa bann dimoun dan biznes enformel i anrezistre, zot annan en *TIN*, zot anrezistre, zot annan en *license*, zot pey zot *tax*, nou benefisyè.

E mwan mon krwar Mr Speaker, olye ankouraz dimoun

pou kontinyen dan sekter enformel, ankouraz zot pou *formalize* zot biznes, ed zot, donn zot bann fasilite kredi, pou zot *expand* zot biznes, mon pe koz ou parey en dimoun parey dan en biznes koud ozordi.

I annan loportinite pou li devlope pou li ariv lo en nivo la mon pe mazin Mr Sounasi ozordi i ti komans ptipti, ozordi i pe *supply* lenz pou preske lamazorite bann departman Gouvernman. Eski nou napa ancor nou frer ek ser, sa Seselwa ki dan en pti lasanm i pe koud?

Si nou ed zot devlop zot abilite, zot talan e zot ganny sa sipor finansyel, petet nou kapab rode ki nou pas ek bann *brand* enternasyonal, akoz ki Sesel nou napa en *brand*, ou 2 *brand*? Mon konnen nou annan enn ou de, me selman ancor plis *brand* Sesel ki nou kapab osi vann lo marse enternasyonal e osi ki nou kapab apresye bann prodwi bann lenz, bann *vêtement* lokal.

Mr Speaker, nou bezwen ankouraz bann *MMSMs*, bann *medium, small and micro enterprise* pou grosi. E pou zot grosi, Onorab Loizeau in koz lo fasilite, pou zot ganny kapital, pou zot ganny *loan*, akoz zot bezwen *cashflow*; zot, zot

bezwen larzan pou investir dan zot biznes.

Me enn, de bann *challenge* ki nou'n toultan koz lo la dan nou Lasanble, mwan osi mon'n deza demann kestyon lo la, se lo size lenterè – lenterè i en pe o, me ankor nou konnen nou mazinè poudir labank i en biznes li osi. E i annan serten bann kriter ki zot mete ki en pti pe *tough* enn ler - ki en pti pe for, ki fer ki i annan bokou fwa, labank in perdi, akòz bokou bann dimoun ki'n pran *loan* pa kapab repeye.

Me selman nou bezwen rod en fason, pou nou gete ki manner nou kapab annan en konvèsasyon avek bann diferan labank, oubyen atraver *Central Bank*, pou gete lo ki manner nou kapab tir en pe sa bann kriter, pa fer li sitan difisil pou dimoun ganny akse avek kredi.

I malere ki i annan dimoun dan lepase, ki'n pran *loan*, me apre zot pa'n peye, e sa nou'n war i aparàn dan *DBS*, kot nou'n war kantite larzan ki bokou ki Gouvernman in perdi akòz bann dimoun ki'n pran *loan*, zot pa'n zanmen repey sa bann *loan*. I annan bokou bann *bad debtors*.

E menm kot i konsèrn bann *medium and small* sa *MSME Scheme*, atraver *DBS* ki

pe ganny donnen. I annan alokasyon Bidze tou le lannen – en zoli sonm larzan, plizyer milyon Mr Speaker, *still* pou ganny akse avek sa *loan* i *tough* Mr Speaker, me an menm tan in annan bann labi dan lepase, kot dimoun in ganny *loan*, *loan* in ganny *write-off* - nou'n war sa dan *SBFA*, mon pa pou al lo la.

E menm nou'n war sa lo kote *seed capital* Mr Speaker dan le pase, ki i ti'n donnen anba *SEnPA*, apre la in vin *ESA* – *seed capital* R50mil - R100 ki ganny donnen, me selman sa bann dimoun pa servi sa *seed capital* pou fer en biznes, ouwa - zot in plito pran sa larzan diverti kontan, e en larzan ki'n ou kapab dir ki Gouvernman ki Seselwa zeneralman pa'n benefisye.

So mwan mon krwar sa *SMEs* i vreman enportan. Nou bezwen kontinyen ankouraz *SME Scheme*; nou bezwen kontinyen avek li, akòz mon war poudir vre in ed en kantite biznes, ki mwan menm mwan personnelman, mon'n koz avek enn de biznesmenn, ki'n benefisye anba sa *SME's Scheme*.

Pli enportan Mr Speaker, ledikasyon. Mwan mon krwar nou bezwen reget *curriculum* lekol. Mwan mon krwar i enportan ki dan lekol, nou



komans - mon krwar si mon pa tronpe Onorab Loze, enn, in deza koz lo la, apre si mon pa tronpe i annan Onorab William mon krwar in mansyonn sa, kot nou bezwen ankouraz ledikasyon finansyel dan lekol.

Kot ti a bon nou annan en size dan lekol, kot bann zanfan i aprann ledikasyon finansyel, zot aprann bann keksoz parey *cashflow, assets, liability, balance sheet, income statement, equity* - bann keksoz koumsa ki ou prepar zot, anmezir zot grandi, anmezir zot antre dan lemonn travay ki pou ed zot Mr Speaker.

E osi Mr Speaker, met fasilite an plas pou biznes, i en keksoz ki vreman enportan. Nou'n koz lo *Regatta site*, Beau Vallon, ki pou ouver laport pou plizyer bann pti biznes e an menm tan Amitie i lo latap pe ganny diskite, en vilaz artizanal pou bann lartizana pou bann artizan, *craftsmen* avek lezot pti biznes dan en landrwa pou zot kapab vini, vann zot bann *product, advertise, market* zot bann *product*. E sa bann keksoz ki ou bezwen al direksyon ki nou bezwen ale.

Gouvernman avan in koz lo bann *microenterprise centre*, nou osi pe koz lo la. E sa en keksoz ki nou bezwen fer sir i vin en realite, swa lo nivo

rezyonal, swa lo nivo distrik pou donn nou sa ki nou apel en *microenterprise centre* ouswa bann latelye.

Grand Anse nou'n sanse nou 'n ganny sa bout kot *STC*, o bor Lekol Grand Anse Praslin Primer, kot nou pe al fer 10 pti latelye, ki bann biznes Praslin i kapab benefisyé avek.

Me sa en keksoz ki ou bezwen gete lo nivo rezyonal ouswa o nivo distrik osi, pou bann pti biznes kapab ganny en plas, en lespas pou zot fer sa.

Mr Speaker, an konklizyon mon pou bezwen fini par koz lo en size ki pres avek mon leker, akoz i en lalit ki mon'n anmennen depi ler ki mon ti dan 6enm Lasanble.

E ozordi nou war kwa ki nou kapab *achieve* ler nou *eradicate*, ler nou tir koripsyon, ler nou met bann fasilite an plas. Annou koz lo Ile Eve Mr Speaker. Ile Eve, nou konnen mannyer ti ete avan, ti annan problem napa *utilities*, ti mank semen, delo, drenaz, e ti annan bokou dimoun ti'n ganny alokasyon later e zot pa'n devlop zot later, ouswa zot in revann zot later.

E la ozordi avek lord ki'n ganny mete lo sa zil Mr Speaker, 50 nouvo later in debloke Mr Speaker. Anviron 50 nouvo later in debloke e deza

lokasyon in komans ganny fer avek bann dimoun ki annan plis ki 12an – pou bokou lannen pe espere, finalman sa bann dimoun ozordi - akoz lord ki'n ganny mete zot nobou kapab ganny akse avek en bout later.

I annan *next tender* pou al sorti byento, pou ankore alokasyon later laba, e mon pou ankouraz bann biznes lo Praslin pou vin devan, pou zot *apply*, pou zot kapab ganny en bout later zot osi. E i enportan ki fasilite ki Gouvernman i met an plas, i ganny servi byen.

E i enportan *going forward* Mr Speaker, si nou anvi biznes i prospere Sesel, se ki biznes nou tir *tax evasion* dan nou pei e osi nou tir osi koripsyon dan Gouvernman, kot gous i aret marse pou favoriz serten dimoun. Nou bezwen fer sir ki keksoz i ganny fer dan en fason ki drwat, dan en fason ki byen.

E parey mon'n dir *as we improve the ease of doing business* Sesel, mon asire ki nou pei pou progrese pou bouz pli devan. I annan ankore en pe zistans pou nou ale Mr Speaker, me selman avek perseverans, nou tou nou vin ansanm nou travay, nou ankouraze, nou fer nou bout, mon krwar poudir biznes Sesel i kapab al dan sa direksyon, ki

nou tou nou pe reve nou ti a kontan war i ale.

Avek sa 2 mo Mr Speaker, mon dir ou mersi.

### **MR SPEAKER**

Mersi Onorab. Onorab Porice, mon'n war ou ou'n fer sir ou ti pe met ou non lo lalis? Ou annan laparol la.

### **HON DOYACE PORICE**

Mersi Mr Speaker. Bonn apre midi Mr Speaker e tou lezot MNAs.

Mr Speaker, sa Mosyon anmennen par Onorab William, i enn ki nou bezwen fer bokou refleksyon dan plizyer keksoz. Ler nou get lagrikiltir, fodre Minister konsernen, pou ankouraz plis fermye pou plant plis - sirtou gro manze, parey dimoun lontan ti kontan plante.

Tou pti bout later o bor nou lakaz, nou ti plante e sa ti ed bokou dan nou lavi lontan. Nou fermye ti rod zot prop manze zannimo, zot fimyen pou bann plant e sa ti ede pou nou ganny bann bon lavyann e legim.

Fodre nou rod bann fermye aze, pou vin ede, pou ed bann nouvo fermye lo lafason ki nou kapab koup lo lenportasyon manze pou zannimo, parey nou fer avek fimyen. Nou kannel, nou dite; i

annan plizyer plant ki nou kapab fer dite avek. Nou granmoun in montre nou.

Mr Speaker, kot nou met nou koko? Nou servi ziska son pye, fey e son koko li menm, ki nou kapab prodwi bokou keksoz atraver nou bann artizan. Lapes osi i annan bokou pou fer, sirtou lo Praslin. La koman zot in ganny nouvo bazar, ki en lankourazman pou zot.

Annou anmenn nou bann zenn anver sa bann keksoz ki nou pe panse, akoz sa i pou anmenn plis larzan dan pos e pei osi i a benefisyè pou fer plis devlopman.

Mr Speaker, larzan anmase, i a kapab anmenn plis proze dan distrik parey pti semen segonder, rigol, *bus stop*, landrwa zwe pou zanfan e lezot ankor. Kot i konsern nou lasante osi, sa pou ede aret pran bokou pilil pou al ver nou lafresisan. Nou *local medicine*.

I a ede pou koup en pe lo lenportasyon bokou latizann parey paradol, siro, eksetera, kot i annan zis i pran e i pa servi.

Nou annan dimoun ki pe fer sa biznes *local medicine*. Petet i pa ase pou lapopilasyon. Alor sa osi i pou ede dan biznes. Pou fer sa bann biznes, nou konnen nou bezwen en *licence*,

me la nou pe demann Gouvernman pou petet desantraliz bann servis ki a ede vin pli vit.

Kot i konsern larzan, paran en pti *loan* osi pou demann Gouvernman, pou fer parey, pou ed sa bann pti biznes ki mannyer pou konmanse e ki mannyer pou ganny larzan.

Mwan, mon pe ensiste, ki petet sa lazans konsernen pa tro tir lizye lo bann pti biznes ki'n fek komanse. Donn zot en dele letan, pou fer plis apre nou a rantre pou vwar kot zot kapab ede dan kontribisyon nou pei.

Servi nou bann endikater pou vin pli proaktiv anver nou bann zenn, dan montre zot plis. Nou annan bann zanfan ki pa'n *succeed* pou ganny possegonder. Annou anmas zot e montre zot bann tel aktivite, ki pou fer ki pe koz lo la ozordi.

Mr Speaker, mon enplor avek bann Minister konsernen, profit sa lokazyon pou pran detrwa sa bann zanfan pou edik zot e osi ed zot aprann lezot travay pou zot prop benefis e benefis nou pei. Annan landrwa apropiye, pou sa bann zenn kontiny zot letid e osi komans zot pti biznes.

Mr Speaker, la mon pou felisit bann biznessmenn ki pe fer tre byen e ki pe anploy nou

bann zenn e pe osi montre zot travay sirtou bann ki lo Praslin. Ler mon get enn de ferme parey France ek Brian Rose, Mr Hoareau, Mr Roland Bedier ki en peser, e i anploy detruwa Pralinwaz, pou donn li en koudmen pou anmenn plis pwason.

Mon get Mr Barry Souffe, ki annan plizyer biznes ki ankouraz travayer Seselwa lo Praslin pou donn li en koudmen travay, e sa i ankourazan; ki pli tar zot osi zot a kapab fer zot prop biznes.

Mon osi get Stephen Morgan koman en zenn patisri, kot in agrandi son biznes e pe anploy enn de zenn Pralinwaz pou aprann ek li e donn li lanmen dan son biznes.

Ou vwar Mr Speaker, sa i montre ou ki nou kapab fer plis kot i konsern biznes dan nou pei. Lo Ile Eve byento, nou pou annan plis businessmen ki'n ganny en bout later, pou anmenn plis biznes e anmenn plis lanplwa pou bann Pralinwaz.

Nou osi annan kot Nouvo Por Ero bokou later pou plis biznes ankour, pou aranz nou lavil parey en pti *Dubai*. Se sa fason ki nou pei ki nou pou war devlopman lo nou zil. E pour sa, mon ankouraz nou bann zenn

Pralinwaz, pou profite pou anmenn zot kontribisyon.

Mr Speaker, Praslin nou kapab fer pli byen ankour. Nou bezwen rod fason pou ed nou zenn Pralinwaz, pou vin devan, pou fer nou zil kot dimoun sorti dan lezot zil sirtou Mahe, pou vin fer zot *achat* kot nou bann pti lavil sirtou Baie Ste Anne.

Mwan mon pou ankouraz Pralinwaz pou ede pou nou osi form par dan sa Mosyon pe demande, ki nou a akonplir sa ki nou pe rode lo nou zil. Gouvernman ek lezot sekter konsernen nou bezwen fer en letid lo kwa ki nou kapab donn bann prodwi pou anmenn sa valer azoute, e anmenn plis dan lekonomi nou pei.

Avek sa 2 mo, mon pou siport sa Mosyon anmenn par Onorab William. Mersi.

### **MR SPEAKER**

Mersi Onorab. *A ce point* la in ariv 3:30 mon annan 2 Manm Onorab Monthy e Onorab Georges, si napa lot Manm ki pou koze, nou a kontinyen avek sa 2 e nou a ferm deba la, apre loter Mosyon a fer son *summing up*. *Ok*, byen Onorab Monthy.

### **HON PHILIP MONTHY**

Mersi Mr Speaker. Mr Speaker, mon pou felisit Onorab William pou anmenn en Mosyon sitan

enportan, sirtou la a sa moman ki nou dan sa peryod ki nou apel li *post-COVID* – sa pandemik ki' boulvers lemond antye e in fer ki ler nou get sityasyon ekonomik sosyal, politik e menm teknolojik, i nepli parey avan sa pandemik ti tape.

Sa sityasyon in fer ki plizyer biznes in war zot, pe bezwen fermen e plizyer in *struggle* zis pou zot kapab sirvi. E i annan ki'n ase inovan e zot in reisi diversifye zot aktivite, e sa in ede pou ki zot reste relevan dan sa nouvo klima *post-COVID*.

E gras osi a bon travay Lotorite Lasante e aksyon byen kalkile desiziv Gouvernman, Sesel in kapab travers sa peryod tre difisil, e san presedans ou war nou kot nou ete la ozordi.

Kot pou soutenir en lekonmi ki baze prensipalman lo tourizm, louvertir erport i reste ziska prezan sa desizyon brav, ki fer ki nou lekonmi in kapab ganny sa loksizenn nesese pou kapab sov nou lekonmi e plizyer biznes.

Me Mr Speaker, la ki nou 'n sorti dan sa sityasyon difisil, i moman pou ki tou nou bann partener kle dan pei, i vin ansanm e fer en refleksyon profon, lo meyer fason ki nou

koman en pei, nou a kapab bouz devan pou prosperite ekonomik e sosyal pei e tou Seselwa.

E se sa ki Mosyon Onorab William pe demande, kot Gouvernman a fer en letid ki enplik tou sekter kler ekonomik Sesel, avek bi pou revwar Polisi ek stratezi, ki a permet Sekter Prive reste soutenab e kre plis larises ek lanplwa.

An di-z-an sa Mr Speaker, i enportan pou rekonnet ki in deza annan serten travay konpreansiv ki'n deza ganny fer dan sa menm laliny ki Mosyon pe fer referans avek. E ler nou demann ki plis letid e analiz i ganny antreprann - ki mon pou siport antyerman - i osi enportan pou rekonnet travay ki'n deza ganny fer, e vwar ki mannyer nou, nou pe al de lavan ki mannyer sa i kapab ganny konsidere e ganny entegre dan nouvo Polisi e fason fer Gouvernman *du jour* pou byennet pei e pep Seselwa.

En travay ki 'n deza ganny fer e ki annan pou tit "*Framework for recovery and prosperity*" kot Sekter Prive atraver komers Sesel (SCCI) an Zilyet 2020, ti prezant en plan avek ladministrasyon sa letan, pou ankouraz *private public partnership* ki ti annan pou lobzektif rekonstri e revwar

fason ki lekonomi ti pe fonksyonnen.

E Mr Speaker, nou konnen ki Gouvernman presedan, pandan tou son legzistans, in met lanfaz plis lo tourizm koman sekter kle nou lekonomi. E kot lezot sekter potansyel pa'n vremen ganny sa latansyon nesese, parey ki zot ti devret pe gannyen.

Kot ti ava annan bann mekanizm an plas pou ankouraz ede annan plis lide inovativ e lantreprenarya dan lezot sekter nou lekonomi. E *COVID* in montre nou, ki i primordyal ki nou al dan sa direksyon.

E mon mazine se egzaktaman pou sa rezon ki Lasanm Komers Sesel, ti deside pou antreprann en tel resers. Dan son remark Chairman *SCCI*, Mr Olivier Bastienne, ti fer resorti ki sa plan, i pe permet pou zet en regar lo lafason ki lekonomi Sesel i rekipere, e ki mannyer pou sorti sen e sof ekonomikman fas a sa pandemic *COVID-19*.

I ti admet ki i ti nesese pou ki lezot sekter, i eksplor bann diferan mwayen ki a permet zot osi kontribye e kre lanplwa, olye zis annan en lekonomi ki depandan prensipalman lo tourizm.

Plizyer sekter kle lekonomi ti ganny idantifye, dan lekel Sekter Prive i kapab travay an kolaborasyon ek Gouvernman pou trouv sa meyer formil, pou ede agrandi sa bann sekter.

E enn sa bann sekter, sete kapasite bann pti e mwayen antrepriz ki plizyer mon bann koleg avan mwan in fer referans avek, e ki vremen enportan ki bann kondisyon nesese in ganny kree pou devlop sa bann tel kategori lantrepriz.

Diversifikasyon dan komers avek nou bann partner enternasyonal, ti ganny fer resorti. Nou koz lo lekonomi ble Mr Speaker, e sa konsepsyon lekonomi ver osi ti ganny fer resorti ki pe i devret pe investir plis dan bann lenerzi renouvlab.

Ogmant kapasite konpetans nou bann travayer Seselwa, pou ki zot a mye kapab sitye zot sa klima ekonomik e devlopman lenfrastruktir, ki konpran akse avek later, delo, elektrisite e konektivite ant nou bann zil ti osi fer resorti tre for.

*Chairman SCCI* an prezantan sa rapor, ti deklare ki i vremen kontan ki Prezidan Faure sa letan in ekout zot, in donn son laprouvasyon pou ki en plandaksyon konkret i ganny kree, ki ava anliny avek

vizyon 2023 e plan devlopman stratezik nasyonal.

Mr Speaker, sa ti sa letan, e mon pou felisit Sekter Prive pou sa travay resers konpreansiv ki zot in fer. E mon osi egalman pou felisit sa Gouvernman *du jour* ki'n vini e ki pe konstri lo sa ki ti'n deza ganny fer.

Zis detrwa zour pase, nou'n vwar kot Gouvernman atraver sipor *UNDP*, in fer lansman Seychelles *SDG Investor Map* ki dan en fason konpreansiv pe fer egzakteman sa ki Mosyon Onorab William pe demann Gouvernman pou fer.

Kot Sekter Prive pe ganny angaze dan en fason konpreansif e byen striktire dan laspirasyon e devlopman nasyonal pei.

Sa plan i prezant bann sekter priyoriter pou lenvestisman, tel ki; lenerzi renouvlab, servis, *food and beverage*, lenfrastriktir, teknolozi e kominikasyon. E i osi prezan bann lezot sekter kot i annan loportinite pou lenvestisman tel ki *solar panel, fish processing, cold storage, cultural e creative tourism development*.

E i annan osi bann sekter imerzan ki prezant plizyer loportinite lenvestisman, ki nou

bann investiser Seselwa pe ganny ankouraze pou al ladan, olye parey serten plizyer mon bann koleg in koz lo la, ki tou kou nou vwar bann menm biznes pe ganny antreprann.

E souvan ler nou tann serten fristrasyon, kot zot dir i dir i dir "leve debourye, selman ler ou pe sey leve debourye ou war ou avek plizyer difikilte."

Me mwan en keksoz mon pou dir lo la se pei ki pe ankouraz bann biznes pli inovan, *ok?* Mont Dubai aste aste serten keksoz, aste/revann, i pa bann biznes ki pei i vwar en lavenir ladan e ki i pe ankouraze – *ok?*

So mon annan serten mon bann zabitan ki'n apros mwan ki pe anvi lans zot dan sa domenn, e ki en pe fristre. Me ler ou pe get de lavan, sa i pa bann biznes lenvestisman ki vyab e ki pei i ankouraze pou nou al ladan.

Sa bann sekter emerzan i *aquaculture, waste management, prodiksyon agrikol, lapes semi endistriyel, devlopman bann software e bann apps, resaman nou'n vwar Linkup, devlopman bann platform nimerik ki a permet bann biznesmenn Seselwa antre an kominikasyon avek bann marse enternasyonal.*

Mr Speaker, mon pa pou long. An terminan mon pou zis dir mon krwar i zis *timing* ki pa'n vremen fer zistis Mosyon Onorab William, akoz Mosyon Onorab William in vin 2 semenn – 3 semenn, avan lansman sa nouvo plan.

I pa vedir ki i pa fer sans la, me i ti pou fer bokou plis sans ankor, pou demann Gouvernman pou fer sa ki i pe fer, me zanmen i deza tro tar pou byen fer. E ler nou pe mazin al dan bon direksyon, nou pou touzour idantifye bann landrwa, nou pou touzour idantifye bann sekter, nou pou touzour vwar serten landrwa kot keksoz pa pe mars byen, kot i pou neser pou annan serten travay ki ganny fer, serten letid ki ganny fer, pou nou kapab fer pli byen.

E dan sa laliny alors Mr Speaker, mon vwar ki Mosyon i annan en gran relevans e Gouvernman i devret pe touzour angaz li pou asir devlopman e prosperite ekonomik pei e pep Seselwa.

E avek sa detrwa mo, mon pou air Onorab mon sipor pou sa Mosyon. Mersi.

### **MR SPEAKER**

Mersi Onorab. Onorab Georges ou annan laparol.

### **HON BERNARD GEORGES**

Mersi Mr Speaker. Bonn apre midi Mr Speaker. Bonn apre midi tou bann Manm Onorab e bonn apre midi tou dimoun ki pe swiv nou.

Mr Speaker, sa zour ki nou fek pas ladan la, in en zournen ekstreman enteresan e in enteresan pou bann rezon ki in fer resorti par bann dimoun ki'n pran laparol. Ler mon regard sa lafason ki sa Mosyon in ganny striktire, ler mon *ti* regard lafason ki sa Mosyon in ganny striktire, mon *ti* annan en rezervasyon.

E mon rezerv se, demann avek Gouvernman pou fer en letid. Mon pa partizan demann Gouvernman pou fer en letid, akoz tou Gouvernman partou dan lemonn, e avek kekfwa leksepsyon sa enn ki o pouvwar la isi, me zot kontan fer letid.

E letid in vin dan bokou ka rezondet sa ki zot pe fer e i ariv en rezilta dan li menm. E i pa en tran plen pou anmenn sa keksoz pli lwen. E se sa mon rezerv, se retourn kot Gouvernman, demann li fer ankor en letid e apre detrwa zan nou pou retournen pou regarde be ki sa letid in anmennen - ki si sa ki'n abouti.

Mon prefere - e la mon felisit sa Gouvernman, akoz se toutafe sa ki lafason ki li i azir,



mon prefere ki i annan aksyon olye ankor en letid. Me mon rezerv – mon rezervasyon in ganny efase, aköz atraver bann dimoun ki'n pran laparol ozordi, nou'n vwar finalman ki i annan en travay ankor pou ganny fer.

E si nou egzamin sa 3 gran *lapse* ki bann entervenans in pran, nou ava vwar ki annefe i annan en travay kordinasyon ki nou *still* bezwen fer koman en pep.

Ler ou regard en tel Mosyon, ki pe rod kree larises, amelyor lanplwa, e regarde ki mannyer pei i kapab devlope, ou annan en group entervenans ki regard deryer.

E mon a blanm zot, aköz nou bezwen regard deryer, pou vwar ki sa ki nou ti fer byen, si sa bann keksoz ki nou kapab retourn lo la dan lafason ki nou ti fer, regard dan bann pti biznes e vwar ki mannyer nou kapab servi sa pou devlope, e pou al pli devan.

Aprè nou vwar en lot seri entervenans, ki regard devan e ki pe vwar ki mannyer si Sesel i kapab antre dan larezyon e lo Lafrik e amelyor sa ki nou, nou pe fer e *expand* dan sa kontinan.

E 3enm *lapse* ek e ki en aks tre enport se mendev. Ki mannyer ki nou pou fer sa

tranzisyon ant lafason ki nou ti fer oparavan, ek la kot nou anvi ale, kot nou pe ganny anmennen annefe, avek en mendev ki parey nou konnen i annan son problem; i annan son problem drog, i annan son problem mank travay, i annan problem ki nou bezwen al rod etranze pou vin travay, pou fer marse nou bann sekter prodiktif.

E se donk sa 3 *challenge* ki devan nou ozordi, ki anmenn nou fer sa refleksyon ki nou'n fer atraver sa lazournen. E sa refleksyon Mr Speaker, i enn ki ekstrememan itil, e nou Lasanble nou Parlman ki demann nou koze, egzamin bann propozisyon, regard bann lide.

Nou'n fer sa ozordi dan en fason ekstraordiner. Pa'n annan lager, pa'n annan okenn debrousayman, pa'n annan okenn problem, tou dimoun i *onboard* avek – malgre pa nou tou ki war keksoz parey, tou dimoun i *onboard* ki sa ki Onorab William pe demande, i en nesosite e nou bezwen fer li.

E sa ki mwan mon kontan Mr Speaker, se ki atraver sa bann lide ki'n ganny anmennen ozordi, e en kantite lide in ganny anmennen ozordi e parey nou dir napa move lide, tou lide

i bon, serten i pli avantaze, me tou lide i bon.

Ki se swa pou fer en bonbard e esey kiltiv en pe dimyel, oubyen al lo Kontinan Lafrik e regarde ki mannyer pou *expand* en gro biznes deza dan sa kontinan.

Tou lede i annan son merit. E parey Franse i dir, *du choc des idées jaillit la lumière* – an mezir ki bann lide i ganny anmennen i tap ansanm, i fer en glob alimen. E sete egzaktaman sa ki nou’n vwar ozordi atraver sa Mosyon.

Mr Speaker, si nou regard - si nou regard nou progresyon ekonomik dan nou pti pei, nou ava vwar ki in en siksesyon letap, atraver bann lannen ziska erport an 1971, nou lendistri ti en lendistri agrikol parey nou konnen kannel – kannel, kopra eksetera.

Apré sa nou’n al imedyatman dan en lendistri touris, tre vit en fason ki an 1971 nou ti annan 800 touris par an e 5an pli tar ler nou’n ganny lendepandans, nou ti annan 75000 touris par an.

Alor nou’n transform nou lekonomi en sel kou. Nou’n transform nou baz taksasyon, nou’n transform nou laparans nou pei, aköz nou bezwen konstri en por, anmenn elektrisite, fer semen agrandi

eksetera, pou fer lotel pou amelyor sa sekter.

Me i pa en sekter ki nou’n *stagnate* lo la, malgre ki i en sekter ki nou fer byen e ki nou’n aprann fer byen. E ki ozordi, i *still* i ankor premye pilye nou lekonomi. Me nou pa’n *stagnate* lo la e nou’n bouze nou’n al dan lapes endistriyel e en pe pli tar dan lapes semi endistriyel, e sa in vin 2enm pilye nou lekonomi.

E nou pa’n *stagnate* lo la ankor. Nou’n bouze, nou’n al dan sekter finansyel. E parey nou ava rapel, zis sekter finansyel ki dan bokou ka tenir lekonomi nou pei, ler touris avek lapes ti’n *close down* aköz *COVID*.

E an menm tan, ki nou’n develop sa sekter finansyel, nou’n osi develop bann sekter semi finansyel. Mon kapab - par egzanp - koz lo bann nouvo sosyete paraetatik ki’n amelyor zot performans; *SEYPEC* par egzanp ki anmenn en gro kontribisyon dan lekonomi pei; *IDC* li menm in pandan sa bann detrwa lannen, in sanz konpletman e in anmenn bokou developman dan bann zil.

Alor nou’n ariv a en sityasyon ozordi, kot nou bezwen regard devan e dir lekel sa sekter ki nou pou antre ladan? Lekel sa nouvo sekter ki

pou atir nou, ki pou kontinyen sa progresyon ekonomik.

E sa ki gou atraver sa deba ozordi, se ki bokou dimoun in fer resorti, ki nou pa abandonn en sekter pou antre dan en lot, o kontrer nou gard li, nou *improve* li anmezir ki nou antre dan en lot.

Nou pa kapab abandonn lagrikiltir – e bokou dimoun in dir nou ozordi, bokou Manm ki'n pran laparol i dir nou, nou pa kapab abandonn lagrikiltir, o kontrer nou bezwen rod fason pou *improve* nou prodwi agrikol.

E se sa ki en *challenge* ekstraordiner pou en pei, e se sa ki i fer li gou pou nou sa zenerasyon ki pe viv dan sa pei ozordi, pou vwar ki mannyer nou kapab annan en diversifikasyon ekonomik, me an menm tan parey Mosyon i demann nou, demann Gouvernman pou etidye plis pou war ki mannyer nou kapab *build* lo sa ki nou annan e fer li vin pli meyer e pli prodiktiv.

E la mon bezwen dir Mr Speaker, ki sa Gouvernman, sa ladministrasyon ki la depi byento 3an, pa egzakteman 3an - ant 2an edmi e 3an in fer, in demontre ki i annan en lespas pou amelyor sa ki nou annan e pou rod sa nouvo letap

ekonomik, ki nou pou bezwen trouve anver e *contre tout*.

Nou'n koz lo redinamiz bann landrwa ki *Industrial Authority* i *manage*, isi Mahe, Providence e Perseverance, La Digue - lo Ile Eve. Nou'n war amelyorasyon bann terminal *cargo* Praslin, byento La Digue. Nou'n vwar bazar avek por lapes pe ganny met an plas dan plizyer landrwa.

Nou war devlopman bann zil. Yer nou'n antann *Chairman COGA*, zot dir nou ki mannyer i annan devlopman agrikol, lo en baz *trial* Desroches, an vi al lo en baz endistriyel - laferm endistriyel Coetivy.

Tousala se bann keksoz ki montre ki koman en nasyon *managed* par sa ladministrasyon ki an plas ozordi, nou pe fer sa lepa - nou pe al devan.

E sa Gouvernman dan son fason, pe fer sa ki in ganny demande pou fer. E la 1 semenn pase – annefe mwens ki en semenn – i ava en semenn demen, *SIB* avek Minister Lendistri ek Lantreprenarya, in lans an kolaborasyon avek *UNDP* sa *SDG Investor Map*, ki en zouti ekstrememan enportan, ekstrememan itil e ki donn en apersi ki – mon mazin en se sa ki Onorab Monthy ti pe *refer* lo la, ki en

*quelque sorte* i reponn a sa demann ki Onorab William in fer pou annan en letid. Sa letid in ganny fer dan en serten fason, me lo en nivo *sustainable development goals*.

E se pour sa rezon ki UNDP in *involve*, akoz UNDP li i pe rod en lenvestisman - i pe rod en krwasans ekonomik, ki pou gard nou dan sa *framework sustainable development*.

I pa pe demann nou al fer keksoz ki pa pou soutenab. Alor i en *framework* ki nou bezwen vin ladan, me i pa vedir ki se sel *framework*. Me solman nou kapab dir, ki set en gran linisyativ e set en lalis landrwa e proze kot lenvestiser - tan etranze ki lokal, me envestiser prive.

Non pa larzan Gouvernman, non pa lenvestisman dan Sekter Piblik, kot lenvestiser prive ava kapab anmenn zot kapital, anmenn zot mendev, anmenn zot nide, zot lespri, pou nou bouz dan sa direksyon kot nou oule ale

Rod sa nouvo sa nouvo *greenfield site* si ou anvi - sa nouvo landrwa kot nou pou kapab fer lenvestisman pou anmenn lekonomi pei ankor pli devan.

Mr Speaker, bokou lide in donneren - mon pa anvi asize la apremidi e revizit en seri

linisyativ. Sa se bann dimoun ki pou vin *invest* ki pou konnen ki zot pe fer - ki zot anvi fer, oubyen ki sekter zot anvi al ladan.

Me mon bezwen - mon bezwen retourn lo enn de, kantmenm; *tourism* par egzanz - nou'n tann Minis Touris dir nou *over and over again*, annou pa zis fer sa ki lezot i fer. Annou pa zis fer lotel, annou pa zis fer *guest house*, annou pa zis fer *self-catering*, annou rod en fason pou diversifye sa lekonomi touris, sa Sekter Touris.

Annou rod bann lezot fason, pou fer sa touris ler i ariv Sesel, depans ankor plis larzan, olye zis al rod ankor plis touris pou vin isi e ki pa pou annan ase pou zot fer ler zot lo pei.

E i annan en kantite keksoz ki mon konnen i kapab ganny fer, non selman restoran avek bann landrwa pou al vizite, bann galeri lar, bann *cultural tourism* si ou anvi, me i annan bokou plan lo nivo Gouvernman e lo nivo prive, ki pe vin devan e ki nou konnen pou anmenn en krwasans ekonomik enkrwayab dan sa sekter.

Nou bezwen par egzanz Mr Speaker, nou bezwen fer en landrwa pou *exhibit* nou koleksyon lar. Nou en pei ki ris

dan kiltir lar, nou bezwen annan en *National Art Gallery* kot bann touris ava vini – ava depanse, ava aste lar oubyen ava aste bann kopi lar.

Nou pou annan byento e sa mon kapab dir - i pa en sekre – nou'n deza anonse, pou annan en landrwa isi lo Mahe, ki pou *exhibit* Aldabra kot ki pou apel *Aldabra House* oubyen en keksoz dan sa kategori, kot dimoun i pa kapab al Aldabra pou kapab vini e ankor enn fwa i ava en latraksyon ki pou anmenn bokou larzan.

Mon konnen ki i annan dimoun ki pe *invest* dan bann *cash crops*. E napa okenn rezon akoz nou pa kapab nou, vin en eksportater - pa selman kannel avek lavannir - malgre ki sa sete keksoz ki nou koz bokou lo la, me zerof, miska eksetera, sa se bann keksoz i pous tre byen isi - e ki bann lezot pei –

Par egzanp sa zil ki apel *Grenada* dan *West Indies*, son lekonomi i baze lo lagrikiltir e i *the Nutmeg Capital of the world*.

Napa okenn rezon akoz nou, nou pa kapab fer tou sa bann keksoz. Me parey mon'n dir, sa se pa mwan ki pou vin dir, me mon kapab donn en lide Mr Speaker e i annan en keksoz ki toultan trouble mwan.

E sa se ki, anmezir ki Gouvernman pe rod later, pou

*land bank*, pe rod later pou donn later agrikol pou bann dimoun ki anvi al dan lagrikiltir, oubyen pe rod later pou vann avek piblik ki anvi fer en kare later pou fer zot lakaz, i *still* annan tro later dan lanmen prive, ki pa pe ganny devlope e ki zot pe asize nanryen fer.

Mon pa ditou pe dir fodre sa later i ganny pran e redistribye, sa se Gouvernman avan ki ti fer sa, me i annan fason pou donn en lankourazman bann propriyeter, pou zot kapab devlop zot later olye zis les li la a labandon.

Devlope, fer en fason atraver *tax breaks*, atraver menm takse serten keksoz ki pa pe ganny fer, pou ankouraz en reanmenazman later.

Sa set en keksoz ki nou bezwen koman en nasyon ki pe ganny trangle akoz mank kapasite, mank later - i en keksoz ki nou devret kapab ankouraz bann propriyeter ki pa pe servi zot later, pou zot servi pou benefis bann ki napa, oubyen ki enterese.

E mon kontan war ki Gouvernman atraver bann zil, pe ankouraz bann dimoun ki anvi al fer devlopman lo bann zil, ki swa lo nivo touristik, al fer li. Mon pa war okenn rezon akoz lo en zil parey Coetivy par

egzanp, nou pa ti a kapab ankouraz bann Seselwa ki anvi fer en *guest house* laba al fer li, olye zis toultan mazin bann gran lotel - bann gran lasenn lotel etranze.

Tousala se bann keksoz ki Onorab William pe demann nou dir avek Gouvernman fer en letid, akoz se ler ou koz lo sa bann keksoz, parey nou'n fer ozordi dan sa Lasanble, ki sa bann lide i sorti. E ki kekfwamenm si zis ou pran en lide dan tou sa bann keksoz ki'n ganny dir, ou ava kapab prouv en kreno pou nou pei avans ladan.

Mr Speaker, mon regard par egzanp nou frer Moris o bor nou, ki li i montre ki sa i kapab ganny fer. Moris in kapab *innovate* dan en fason ki nou, nou pa ankor kapab fer. Se Moris ki fer lotel kot nou. Pa nou ki'n al fer lotel Moris. Se Moris ki'n ouver labank *MCB* kot nou, pa nou ki'n al lwe en labank Moris.

Se Moris ki pe plant disik Zimbabwe, akoz i napa ase kapasite kot li. Se Moris ti al fer *textiles Madagascar*. Sa set en keksoz ki nou – e la mon kontan ki *at least* Onorab Cosgrow avek Onorab Woodcock, in ouver nou lespri ver Lafrik. E i vre – i ver Mr Speaker ki Lafrik i en kontinan ki premyerman kontan Sesel e ki en kontinan ki

en kontinan kot nou – i en kontinan vyerz dan en serten fason, kot okenn dimoun ki annan lespri e ki annan kapital i kapab al investir.

E atraver bann striktir parey *COMESA, SADC, East African Community, African Free Trade Area, AfCFTA* tousala se bann keksoz i donn nou sa bann posibilite pou nou kapab al devan. E enn bann keksoz par egzanp ki mon pe mazine ozordi an mezir nou pe koze - enn nou bann *success story* isi Sesel dan sa detrwa dernyen lanmen, sete *Air Seychelles*.

*Air Seychelles* in prouve ki kapab sorti dan *bankruptcy court* e vin dan en pti peryod letan, akoz in ganny byen *manage*, vin en sekter prodiktiv. E ler pou regard - e ler ou regard kominikasyon Lafrik e nou ki vwayaz Lafrik, nou konn bann mankman - ler nou vwar ki par egzanp ki konektivite Lafrik i dan problem, mon demann mon lekor, akoz ki *Air Seychelles* enn fwa ki i ti'n stabiliz son lekor, pa ti a kapab antre koman en lakonpanyen aeryen Lafrik, pe al anmenn sa konektivite Lafrik, ki Lafrik i bezwen e ki *Air Seychelles* in aprann pou li byen lo en nivo rezyonal.

Oli regard Lerop, toultan pou al rod touris pou anmenn isi, akoz nou pa al rod sa larzan la *next door*, kot nou kapab montre sa bann pei, ki pa'n kapab fer li pou bann rezon ki nou konnen, ki mannyer nou nou kapab montre zot e fer larzan atraver sa.

Sa se bann lespri Mr Speaker, ki nou bezwen kiltive. E se pou sa rezon ki mon dir ki mon kontan - mon konpran ki mannye sa deba in deroule e mon sorti isi avek bokou pozitivite. Akoz mon konnen ki avek sa bann lide, e avek en popilasyon ki kapab *innovate* e avek en Gouvernman ki annan - pa per al dan bann nouvo direksyon, nou kapab koman en pei bouz devan e fer Sesel e Seselwa fyer.

Mr Speaker, mon koz lo Lafrik, e mon bezwen malerezman an terminan, retourn lo sa size Lafrik. Lafrik set en kontinan ekstraordiner. Ou menm ou Mr Speaker, ou fek fer en vwayaz Lafrik. Bokou Manm lo sa kote i vwayaz Lafrik souvan. Mwan menm mwan mon fek fer en tournen *Zambia* e *Kenya*.

E mon bezwen dir ki parey mon'n dir taler, ki Lafrik i kontan nou en kantite. Lafrik i kontan Sesel e ler ou mansyonn Sesel, Lafrik i vreman bann

dirizan Afriken ki vreman kontan, konsider nou koman enn zot.

E mon'n pas 4 a 5 zour dan en konferans lo lafason ki sekter legal i kapab ed bann pei Afriken, pou sirmont zot *debt crisis*, ki bokou zot, zot pe fer fas avek. E nou'n anmenn bokou, bokou kontribisyon e zot in apresye kontribisyon Sesel dan sa domenn.

E mon'n atriste - mon'n atriste ki yer nou'n tonm dan en moman tris, e mon ti a kontan ozordi dir Mr Speaker, ki sa koze rasis napa plas dan nou Lasanble, ni dan nou pei. Mon ti a kontan krwar ki sa mansyon ki Gouvernman Sesel i en Gouvernman rasis, ti en mank - ti en mank konpreansyon par sa Manm ki'n mansyonn sa yer. E ki i pa pou ariv ankor.

Sesel nou'n fyer, ki pandan 250an sa size rasis zanmen in trouble nou, e nou sa pei ki pei mwen rasis ki annan dan Kontinan Lafrik. Annefe i annan pei Afriken ki bokou, bokou pli rasis ki nou.

E mon bezwen pran laparol koman *Leader* Gouvernman dan sa Lasanble, pou mwan defann Gouvernman e dir nou bann dimoun ki'n ekout sa parol yer, ki Gouvernman Sesel i pa en

Gouvernman rasis e zanmen in en Gouvernman rasis!

**(APPLAUSE)**

**HON BERNARD GEORGES**

Nou pa bezwen al pli lwen Mr Speaker, ki get *Cabinet of Ministers*, ki get Manm Lasanble isi. E la bomaten regard en portre ki lo rezo sosyal, ki montre nou Prezidan antoure avek bann zenn zanfan, pou montre ki sa nosyon rasizm pa egziste. E i sertenman pa egziste lo nivo nou Gouvernman.

Donk mon pa anvi al pli lwen lo sa size, me mon pa ti pou fer mon devwar, koman reprezantan Gouvernman isi dan sa Lasanble, si mon pa ti soulev sa pwèn e dir ki mon espere ki sa Manm ki'n mansyonn sa i ava aksepte ki sa ti en mankman lo son par.

Ki in pa'n reflesir avan in servi sa parol e ki sa parol pa reste koman en boul otour nou lipye, e ki nou kapab byento e souvan met li deryer nou, dir ki sa sete en arberasyon e ki i napa en plas pou rasizm dan nou pei.

Mr Speaker, avek sa detrwa mo, mon ti a kontan reasir Onorab William, ki son Mosyon pou ganny sipor. Remersye li pou anmenn en

Mosyon osi enteresan e dir avek Gouvernman ki ankor enn fwa mon reprezante dan sa Lasanble, ki nou pou anmenn sa bann lide devan zot, e nou ekspekte ki zot ava pran li e bouz devan avek. Mon remersye ou Mr Speaker.

**(APPLAUSE)**

**MR SPEAKER**

Onorab Pillay mon realize ki ou'n lev lanmen. Ou pa'n lev lanmen pou ou fer en ladres, letan mon ti dir mon ti pe al ferm deba. E mon realize poudir kekfwa oule reasir, mon pa war naryen dan ladres Onorab Georges ki okazyonn en nesedit ki ou bezwen reponn.

Alor mon pa war aköz ou pe lev, lanmen, mon pa war ki i annan okenn point of order oubyen okenn mater of privilege, alor mon pe dir ou mon pa kapab donn ou laparol, aköz ou pa ti'n donn mwan laparol pou ou kapab koze.

Mon pou demann Onorab William pou *sum up* e pou fer konklizyon lo son Mosyon. Mersi. Onorab Willaim?

**HON WAVEN WILLIAM**

Mersi Mr Speaker. Mr Speaker, dan konteks pou pez "*piper calls the tune*" dan sa vilaz global, e dan konteks "tay nou



palto dapre nou latwal”, ozordi atraver sa Mosyon nou pe demande, pou les nou kontribye dan ekri sa tune e anmenn presizyon dan rod latwal pou fer en palto ki konfortab pou mete, olye fer en palto dapre nou mezir latwal, ki nou konnen ozordi i pa relevan pou nou dan konteks lenvestisman e dan lekonomi mondyal.

Mr Speaker, mon remerci Bondye e remerci tou Manm ki letan zot in fer deba lo sa Mosyon, zot in montre restren pa pou glis dan politiz sa Mosyon. E mon dir bravo zot tou!

**(APPLAUSE)**

### **HON WAVEN WILLIAM**

Mon remerci tou Manm ki’n kontribye anver anrisir deba lo sa Mosyon, e pou bann kontribisyon vreman valab e enteresan.

Mr Speaker, mon apresye bann diferan lopinyon e rekomandasyon anver size sa Mosyon. Mon’n adopte *still* ki letan mon prezant en Mosyon, mon fer en reprezantasyon limite e kit lespas pou lezot Manm koz lo plizyer size, pou anpes en deba repetitif lo parol.

Mr Speaker, par lefe ki mon’n amann Mosyon pou

demann en letid pli aprofondi, i fer li vreman relevan dan konteks annan plis kordinasyon, pou egzekt aksyon presi pou transform sa size aktivite devlopman ekonomik e lenvestisman dan pei.

Mr Speaker, nou Gouvernman in koz lo en transformasyon miltidimensional dan tou sektor. In met lanfaz lo plis efikasite pou sa arive. Pou mezir performans travayer dan en fason pli presi, stratezi *results-based management*, in relans ek plis komitman pou redinamiz Sektor Piblik de nouvo.

Le 13 *juillet* Sesel in lans son map ouswa plan devlopman soutenab lenvestisman. Sa plan i fasilite lenformasyon lo sektor potansyel dan bezwen imedyat pou investir, tel parey dan lekonomi ble parmi lezot.

Mr Speaker, mon felisit sa zefor e demars pou Gouvernman fasilite sa. Sa i zis zouti lenformasyon selman Mr Speaker. Me prezan tou mwayen konsernen dan sa lasenn, bezwen fer aksyon konkret, pou realiz sa bann aktivite ekonomik, finansyel adisyannel.

Lasanble Nasyonal i annan en rol enportan pou zwe, pou asir sa balans enklizivite sitwayen, konsiltasyon dan lenplimantasyon plan devlopman. Mon anvi fer en pledwari ek nou Gouvernman ki nou'n met la, pou pa vwar bann komite Lasanble, koman en lannwi, ouswa koman pe enterfer dan zot travay; par dir "la ki zot pe rode ankor par deryer rido?"

Vwar nou koman en partener ki anvi travay akote zot, pou pous nou sekter biznes pli o posibil.

Dan sa konteks, e pou anmenn en diferans avek sa sanzman pou fer pli byen. Parey in dir dan sa Lasanble, mon pe demann nou menm alor, pou nou ekout ou gidans Mr Speaker, pou kre en mekanizm ki pe ganny vwar pe ed devlopman. Me pa zis ganny vwar koman zis kozer, me pa pe abouti dan nanryen ek sa fason fer ki Mosyon pa *binding*.

Annou osi anmenm transformasyon apre bokou koze, vizit parti vizit, e aksyon vizib Mr Speaker. Mr Speaker, ti pou gou tann dan ou rapor anyel, ouswa tou le 6 mwan pou donn en kontrandi ek piblik dan Lasanble, lo bann rezolisyon Lasanble ki Gouvernman in azir lo la.

Lev stati Lasanble Nasyonal pa zis koman e *talk shop*, me koman sa 2enm pilye governans, ki pe pous pou pli aksyon par Egzekitiv san vremen pe al an deor nou rol *oversight* lo Gouvernman, ki pou azir dan lespri bonn governans, rann kont dan latransparans. Ki Lasanble, Egzekitiv, ouswa medya a raporte ki swe Lasanble, ki lavwa Lepep in ganny ekoute Mr Speaker.

Mr Speaker, i a fer ki sitwayen a rekonnet e respe travay Lasanble dan en pli meyer fason, olye ki krwar nou pe tiray kanmarad, vin en lannwi devan zot laport, Mr Speaker.

Pou anmenn sa diferans, dan fason fer pou montre Lepep Seselwa ki nou reprezant zot, vwar e kapab mezir nou travay, alor mon rekomande ki en mekanizm kominikasyon i ganny etabli, pou fasilite sa lesanz kominikasyon swa lo nivo *Cabinet*, ouswa kot Minister konsernen Mr Speaker, pou anbelir deza sa fason fer ki nou pe fer.

Mr Speaker, sa zafer Manm Lasanble anmenm Mosyon, konmsi pe koz dan vid fodre i arete, si vremen sanzman governans ki i pe vin siporte in arive.

Nou Lasanble merit montre en diferans. E koman sa 2enm lebra gouvrenans ki pe zwen sa rol *oversight*, ki nou swe i ganny konsidere e nou apresye ki wi, nou swe in ganny konsidere.

Alor mon pe met sa devan e demande ki swa Komite Lasanble, Komite ABC, Komite Chair, bann Komite zot evalye sa rekomandasyon Mr Speaker. Sa fason fer i pa merit ganny vwar koman en konfli lentera Mr Speaker, e mon pe rod en direksyon pou ede koman 2enm lebra gouvrenans, dan demars pou en devlopman soutenab.

Mr Speaker, avek sa, mon ti a kontan met devan bann propozisyon konkret; Mr Speaker ki Gouvrenman i idantifye tou mwayen posib pou angaz ek akter kle dan lekonomi Sesel e lezot ki enterese pou fer biznes, dan sa partenarya Gouvrenman ek Sekter Prive atraver sa plan lenvestisman soutenab ki wi Sesel in sey pouse pou entegre dan en partenarya komers o Kontinan Lafrik. E Mr Speaker, pou kapab kre plis larises ankor.

Ki lazans enplike dan fasilite permi pou fer nenport biznes, zot vin abaz dan en frekans letan agre ek Lotorite Distrik, pou promot e asiste

sitwayen, pou inisye zot demars pou realiz zot lanvi antre dan biznes;

Ki Lara ek son proze resiklaz, a bouz devan ki pe tarde Mr Speaker, nou pa konnen aköz, me solman Sesel in anvi bouz dan bann aktivite resiklaz.

E deplis, sa endividi Mr Speaker, pa pe rod en sou ek Gouvrenman pou lanse, sel keksoz ki pe espere, se en laprouvasyon. Mon demann Lara pou pa *give up*, enkli Genevieve Basset, annou kontinyen fer tande nou lavwa. Mon frer Michel St Ange, ou osi pa *give up* e al tonm dan lalkol. Nou bezwen servis *lifeguard* e *beach policing*.

Mr Speaker, lo rekomandasyon, ki tou lazans kle Gouvrenman, zot revwar konstaman lapros dan lenplimantasyon stratezi, pou etabli en nivo poursantaz lotosifizans, ver en nivo soutenabilite.

Ki zot regard dan konteks *ease of doing business*, kwa ki kapab amelyore parmi bann seri defi pti e mwayen e gro biznes, tel parey limitasyon ek finans pou ogmant zenerasyon larises, mank kapasite e pou en plan biznes, problem *cashflow*, difikilte pou anploy mende kalifye, difikilte pou

promote zot lantrepriz e prodwi lo marse, dekourazman pou kontinyen reste dan biznes pou diferan rezon, mank linisyativ e lespri linovasyon e mank kapasite pou modernize, ki bezwen form parti labaz sa letid aprofondi ki Mosyon pe demande.

Minister Lagrikiltir pou bezwen vin pli proaktiv kot i konsern en nivo stratezi relevan ek menas sekirite alimanter, eski pei Mr Speaker, nou pe demande la, pe prepare avek nouvo latak dan lager Ikrenn avek Larisi, kot komodite parey lafarin ek mai, Mr Speaker, pri byento pou monte.

Mr Speaker, ki Gouvernman atraver tou son bann lazans Sesel, e atraver bann misyon Sesel deor e zot bann Konsiler Onorer, pou kontinyen pouse, la ki apre mon koze, ki lemonn in pronons li lo kreasyon en fon *loss and damage* ki zot pouse.

Ki sa size Lendeks Miltidimasyonnel, Vilnerabilite i ganny konsidere. E en formil in ganny adopte o pli vit posibil.

Ki zot lev zot nivo langazman pou aktivite diplomasi, ki nou bann diplomat zot ganny akse ek tou lenformasyon posibil, pou ed pei.

Mr Speaker, mon'n deza servi dan sa pozisyon

Anbasader, ti vremen fristran, difisil letan ou rod lenformasyon pou promot Sesel e sekter lenvestisman e ou pa ganny sa bann lenformasyon atan e presi.

Mr Speaker, ki zot osi kontinyen pouse e enkli nou, ki nou fer sa laplenn o nivo enternasyonal vin pli nivo an relasyon avek ek groser lekonomi, ki nou pa ganny kit deryer. Mon felisit nou bann dirizan ki pe fer nou bann pei zanmi konpran enkli bann lorganizasyon enternasyonal kle mondyal, nou limitasyon.

E akoz ki zot bezwen konpran nou e donn nou letan pou aziste ek demann ki zot pe enpoz lo nou san tenir kont nou kapasite.

Mr Speaker, ki Gouvernman de nouvo i revwar ankor plis dinamiz e biznes lokal, e ki i protez serten aktivite biznes lokal, pour reste soutenab. Koman en pei souveran, letan nou pe siny lagreman ouswa form parti en konvansyon, annou pa zis sinyen, me fer konpran nou limitasyon e ki fason pei promoter ouswa lorganizasyon zot respekte nou dezir.

Ou pa zis vin en Manm me pou reste soutenab; ki zot permet nou lespas Polisi, pou met an plas bann *safeguard*

dan nou Lalwa pou protez serten sektor, ouswa aktivite ekonomik konsekan pou sofgard sa eleman soutenabilite nou devlopman Mr Speaker.

Atraver bann diferan mezir, tel parey nou nouvo Lalwa, tarif e kontrol pou balans sa lapse dominans e kontrol par serten, ki annan pouwar an term resours, pou kontrole e osi enflyans direksyon biznes.

Mr Speaker ki Gouvernman i konsider kre bann diferan *think tank* e group diskisyon dan diferan sektor pou develop bann pli meyer lide, lapros *in the way forward*.

Mr Speaker, nou annan en group Seselwa deor la, ki'n ganny *train*, ki annan labank lenformasyon pou partaze, me ki pa ganny sa sans pou partaze. Si zot ganny envite pou annan ban diskisyon parmi zot e rikorde, ki Gouvernman ava annan en larsiv lespri sa bann *think tank* lokal.

Wi, mon dakor ek Onorab Woodcock, Gouvernman koman fasiliter ek Sektor Prive, i bezwen investir dan resers ek teknolozi e diversifye lanplwa, pou nou bann zenn antre ladan, parey dan sektor ekonomi ble. Pa ti a ankourazan pou annan en fon pou ankouraz resers, kot nou bann pei zanmi

e nenport ki, i kapab met larzan ladan Mr Speaker, pou kapab fasilite sa size resers?

Mr Speaker, prezan lo kote Sektor Prive, mon annan sa bann rekomandasyon swivan, ki bann endividi ki deza dan biznes, zot kontinyen angaze e Gouvernman ki parti moter lekonomi, pou alert fasiliter lo probleman, danze, e konsern, pou gard sa lanvironnman biznes soutenab, pou osi konpran ki ler movetan, serten nivo konsiderasyon ki ganny pran pou permet rekiperasyon.

Ki zot fer otan kot i posibil pou elev standar, pour reste relevan e konpetitiv dan sa lanvironnman liberalizasyon an term modernizasyon e lenvestisman neser, kot i posibil.

Lakor Kontinan Lafrik Komers Lib, wi, i prezant loportinite an deor nou pei, tel parey dan tourizm, transportasyon, biznes e servis, servis telekominikasyon, servis finansyel parmi lezot. Eski nou akter dan lekonomi Sesel nou'n pare? E avek swa nou tousel, swa avek akter partener etranzer, pe zis ekoute, gete ouswa zot pe reaziste zot lo sa springboard pou *takeoff*?

Rod sipor, pou plis divan anba zot lezel pou reste flote e pers sa marse larezyon.

Mr Speaker, sa lagreman in anmenn ansanm 55 pei Lafrik ini, e 8 kominote ekonomik rezyonal, Labank Mondyal pe predir ki sa lagreman pou fer provizyon pou elarzi lentegrasyon ekonomik atraver kontinan e son bann zil.

Atrakte lenvestisman, lev nivo komers, fer provizyon pou meyer lanplwa, redwir lapovrete e ogmant prosperite partaze ant pei Manm.

Kestyon; Gouvernman koman fasilitater e Sekter Prive koman moter lekonomi an partenarya, e konpran groser sa gato rezyonal pou al rod nou bout koman en Manm, pou agrandi potansyel soutenabilite.

Mr Speaker, koze i gou, me devlopman e realizasyon sa proze Mr Speaker, i vin osi ek son lakantite defi lo kontinan. E pou son bann Manm baze lo zot konpozisyon devlopman ekonomik, tel parey lo nivo lenfrastruktir, kapasite finansyel, eliminasyon baryer tarif e lagreman bilateral antre diferan pei Lafrik antre kanmarad, parmi lezot.

Pou montre ki parfwa motivasyon i la par Gouvernman e Sekter Prive e dan konteks Sesel, lwen ek kontinan, i annan son prop defi li osi Mr Speaker, me nou pa

devret les lebra tonbe Mr Speaker, me pouse pou zenerasyon batir lo sa ki nou'n reisir ozordi.

I osi bon mansyonnen ki lagreman i kapab osi trenn lanplwa dan bann pei ki kou prodiksyon i pli ba. Ki en fenomenn ki pa nouvo Mr Speaker, atraver lemonn, ki kapab afekte pti lantrepriz ki fek lanse, si Lalwa adekwat pa an plans.

I kapab osi fer lekonomi depandan lo detrwa prodwi Selman; rann en pei vilnerab si pei i vin depandan lo lenportasyon e sours vital, e diriz pei anver standar *minimum*, lanvironnman e sa bezwen pou antre an konpetisyon ek bann standar lanvironnman i ba Mr Speaker.

Mr Speaker, ki lendividi ki annan en lentere lantreprenner, pou fer ase resers e demann ase kestyon, avan lans pou reste soutenab, me pa mor an nesans par en gaspiyaz nou resours ki limite.

Ki malgre dan biznes ki menm si rol sosyal pa nou priyorite, ki Sekter Prive i osi annan en pe konsyans sosyal pou fer lavi lezot fasil; ki Sekter Prive Mr Speaker, dan sa partenarya ek Gouvernman, zot regard zis zot lentere biznes e

oubliy problemn sosyal pei e les sa tousel ek Gouvernman.

Nou dan menm bato dan sa tanpet problem sosyal. Annou ed Gouvernman nou kapab osi ed sa group travayer ki nou anploye. Pa koman en travayer selman, me koman imen ek bann bezwen lavi.

Sa eleman *counseling*, montre lentere dan son konsern i a ede kot i posibil, pou ed nivo prodiktivite Mr Speaker, monte dan serten sans i parfwa labi osi Mr Speaker.

Mon zis demann pou annan en pe plis konpasyon Mr Speaker, dan sa sekter.

Mr Speaker ki Gouvernman i angaz avek Sekter Prive, pou ede ek *financial literacy*, ki ozordi son lenportans dan sa demars pou kreasyon larises e lev nivo sa kiltir fer fer *savings*, ouswa anmas larzan pou ed soutenabilite ekonomi pei.

Ler sak sitwayen i mazin depans lo sa ki i bezwen an premye, me regard lo en plan sa ki i anvi entern, pou sekiriz Bidze lemwan lafanmir; ki olye perdi resours dan bann domenn ki pa ti nesaser, akoz serten eleman mank responsabilite personnel vizavi ledikasyon ek lasante, ti pou ogmant rezilyans pouwar ekonomik pei, pou investir dan

sekter ki pou ed pep met plis larzan dan pos e vin pli endependan ekonomikman Mr Speaker.

Finalman Mr Speaker, mon le felisit tou Seselwa ki angaze dan en biznes, gran, mwayen, ouswa pti. I pa fasil dan en pti lekonomi, me i pa enposib, si ou anvi annan sa depandans ekonomik, tap tou laport pou reste soutenab.

Zis mazine si ou ouswa nou, pa fer li ansanm pou Sesel, pa espekte nou bann pei zanmi tel parey; Linyon Eropeen, Ameriken, Sinwan ouswa Endyen, pou vin fer li pou nou.

Si nou pa travay dir Mr Speaker, Mosyon pe ankouraz Gouvernman pou fer sa letid pli aprofondir, avek tou bann akter kle ekonomik, ki nou a reste lo target No.8 ek 9 Mr Speaker, se sa 2 target devlopman soutenab ki pou ed pei e lemonn zwenn le 17 target devlopman soutenab ki Nasyon z-Ini in prezant devan nou. Avek sa 2 mo Mr Speaker, mon dir ou mersi e envit Manm po upran vot. Mersi.

**(APPLAUSE)**

**MR SPEAKER**

Mersi Onorab. Mon aprezan demann Manm pou vot lo sa Mosyon. Manm ki an faver lev

lanmen silvouple? Mersi Manm ki kont?

Lo Mosyon prezante par Onorab Waven William, 22 Manm in vot pour, 0 kont e 9 Manm in *abstain*. Alor sa Mosyon in aprouve par Lasanble.

Mon a dir felisitasyon Onorab William pou ganny ou Mosyon aprouve e mersi bann Manm pou zot partisipasyon.

Bon, nou'n ariv a lafen nou travay e mon swet zot bonn kontinyasyon dan lasemenn pou travay ki reste zot pou fer.

E osi en pe repo dan *weekend* e nou a rebran travay Mardi prosen 9er. Lasanble a *adjourn*.

**(ADJOURNMENT)**